


ಮದಪ್ಪರಾವಂದಿ ತುಳುವೆರ್ ಮಾಲಿಕೆ - ೩೧

ಸಿಂಗಾರಕವಿ ಹಂಸರಾಜೆ

ರತ್ನಾಕರ ವರ್ಣಿ



ಕರ್ನಾಟಕ
ತುಳು ಸಾಹಿತ್ಯ
ಅಕಾಡೆಮಿ

ಮುನಿರಾಜ ರೆಂಜಾಳ

ಮದಪ್ಪರಾವಂದಿ ತುಳುವೆರ್ ಮಾಲಿಕೆ - ೩೧

ಸಿಂಗಾರಕವಿ ಹಂಸರಾಜೆ
ರತ್ನಾಕರ ವರ್ಣಿ

ಮುನಿರಾಜ ರೆಂಜಾಳ



ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ
ಮಹಾನಗರಪಾಲಿಕೆ ಕಟ್ಟಡ, ಲಾಲ್‌ಬಾಗ್, ಮಂಗಳೂರು - 575 003

SINGARAKAVI HAMSARAJE RATNAKARA VARNI

Life Sketch of great poet Ratnakara Varni, writer of 'Bharatheshavaibhava' and his other literary works by Sri Muniraja Renjala, teacher, Jain High School, Moodubidre - 574 227

Author

Muniraja Renjala

Chief Editor

Dr. Palthady Ramakrishna Achar

President

Karnataka Tulu Sahitya Academy

Publisher

Chandrasahasa Rai B.

Registrar

Karnataka Tulu Sahitya Academy

First Edition : 2011

© : Karnataka Tulu Sahitya Academy

Pages : 40

Price : ₹ 33

Cover Design : **Kalloor Nagesh**

Designed & Printed at :

Aakrithi Prints

K.S. Rao Road, Mangalore - 575 001

Tel. : 0824 2443002

ಗುರ್ಕಾರ್ತೆನ ಮದಿಪು

ತುಳುವೆರ್ ಪಿರಾಕ್‌ಡ್ಡಿಂಚಿ ನಡತೊಂದು ಬತ್ತಿನ ಆರಾಧನೆ, ಆಚರಣೆ, ನಂಬೊಳಿಗಲೆನ್ ಮಾತ ಒರಿತೊಂದು ಬತ್ತಿನಕುಲು. ಅಂಚಾದೇ ತುಳುನಾಡ್ ಪುಣ್ಯೊದ ನಾಡ್‌ಂದ್ ಪುದರ್ ಪಡೆತ್‌ಂಡ್. ಕರಿದ್ ಪೋಯಿನ ಎಡ್ಡೆ ವಿಸಯೊಲೆನ್ ಒರಿತೊಂದು ಪೋಪಿನವು ಎಡ್ಡೆ ಸಂಸ್ಕೃತಿ. ಸಂಸ್ಕೃತಿ ವೈಜ್ಞಾನಿಕತೆದ ಸುತ್ತುಗಟ್‌ಬ್ಲಾಡ್ ಉಪ್ಪೊಡು. ಸಾಮಾಜಿಕ ಪ್ರಜ್ಞೆ ಬೊಕ್ಕ ಧಾರ್ಮಿಕ ನಿಲೆಗಟ್ ಅಯಿಕ್ ಬೋಡು. ಅಂಚಿನ ಸಂಸ್ಕೃತಿಯೇ ದುಂಬೊತ್ತೊಂದು ಪೋಪುಂಡು. ಬಾಸೆ, ಸಾಹಿತ್ಯೊ, ಕಲೆ, ಪರಪೋಕು, ಸೇವೆ - ಉಂದು ಮಾತ ಸಂಸ್ಕೃತಿದ ಬಾಗೊಲು. ನೆನ್ನ್ ಒರಿತ್‌ದ್ ಬುಳೆಪಯರೆಗಾದ್ ಬೆಂದಿನ ತುಳುವೆರ್ ಏತೋಜನ. ತುಳುವೆರ್ ಪಂಡ ಬಜೀ ತುಳು ಆಪ್ತೆ ಬಾಸೆದಕುಲು ಮಾತ್ರ ಆತ್ಮ, ತುಳುನಾಡ್‌ಡ್ ಜಲ್ಲೊಗು ಬತ್ತಿನಕುಲು, ತುಳು ಬಾಸೆ ತೆರಿನಕುಲು, ತುಳುತ ಬಗಟ್ ಉಡಲ್ ದಿಂಜಿ ಹೆಗ್ಗಳಿಕೆ ದೀವೊನ್ನಕುಲು ಮಾತ ತುಳುವೆರ್.

ಒವ್ವಾಂಡಲಾ ಒಂಜಿ ಮರ್ಗಿಲ್ಡ್ ತುಳುಬಾಸೆ ಸಂಸ್ಕೃತಿ, ತುಳು ಸಂಪೊತ್ತದ ಬುಳೆಚಿಲ್‌ಗಾದ್ ಅಕುಲೆ ಸೇವೆ ಸಂದ್‌ದಿತ್ತಂಡ ಅಂಚಿನ ಪುಣ್ಯಾತ್ಮೆರೆನ ಬದ್ಕ, ಸಾಧನೆಲೆನ್ ನೆಂಪುಡು ಒರಿತೊನುವು ನಮ್ಮ ಧರ್ಮೊ. ಈ ನಿಲೆಟ್ ಕರಿದ್ ಪೋಯಿನಕುಲೆನ ಪುದರ್‌ಡ್ ಅಕಾಡೆಮಿ ಬೂಕುಲೆನ್ ಬರೆಪಾದ್ ಮದಪ್ಪೆರಾವಂದಿ ತುಳುವೆರ್ ಪನ್ನಿ ಗ್ರಂಥ ಮಾಲೆಡ್ ಬೊಳ್ಳು ಗು ಕನವೊಂದುಂಡು.

ಭರತೇಶವೈಭವ ಪನ್ನಿನ ಮಹಾಕಾವ್ಯೋನು ಬರೆಯಿನ ರತ್ನಾಕರವರ್ಣಿ, ತುಳುನಾಡ್‌ದ ಮೂಡಬಿದ್ರೆಡ್ ಪುಟ್ಟನ್ನ, ತುಳು ಮಹಾಕವಿ. ಕವಿ ತುಳುಟ್ ಬರೆಯಿನ ಬೇತೆ ಗ್ರಂಥೊಲು ತಿಕ್ಕಾದ್‌ಜ. ಆಂಡಲಾ ಆಯೆ ತುಳುತ ಅಭಿಮಾನಿ ಪಂಡ್‌ದ್ ಭರತೇಶ ವೈಭವೊಡು ಆಯೆ ಸುರುಟ್ ಬರೆತಿನ ಪದ್ಯ 'ಅಯ್ಯಯ್ಯ ಎಂಚ ಪೊರ್ಲಾಂಡ್‌ಂದ್ ತುಳುವರು ಮೈಯುಬ್ಬ ಕೇಳಬೇಕಣ್ಣಾ' ಪನ್ನಿನ ಸಾಲ್‌ನ್ ಓದ್‌ನಗ ಗೊತ್ತಾಪುಂಡು. ರತ್ನಾಕರವರ್ಣಿ ಭರತೇಶ ವೈಭವ ಮಾತ್ರ ಅತ್ತ ತ್ರಿಲೋಕಶತಕ, ಅಪರಾಜಿತೇಶ್ವರ ಶತಕ, ರತ್ನಾಕರಾಧೀಶ್ವರ ಶತಕ ಇಂಚಿನ ಗ್ರಂಥೊಲೆನ್ ಬರೆತೆ. ಸೋಮೇಶ್ವರ ಶತಕ ಬೊಕ್ಕ ಬಸವಪುರಾಣ ಗ್ರಂಥೊನ್‌ಲಾ ಆಯೆನ್ ಬರೆತಿನ ಪಂಡ್‌ದ್ ಕೆಲವರೆನ್ ಅಭಿಪ್ರಾಯೊ. ಆಂಡ ನೆಕ್ಕ್ ದಿಂಜ ಆಧಾರ ತಿಕ್ಕಜಿ.

ರತ್ನಾಕರವರ್ಣಿನ ಬದ್ಡದ ಕತೆನ್ ತೆರಿಯೊಂದು ಪೋಂಡ ಅವೊಂಜಿ ಏರ್ತೆ ಜಪ್ಪೆಲ್ಲ ಮಲ್ಲ ಕಡಲ್. ಜೈನಕುಲೊತ್ತ ಸಾಮಾನ್ಯ ಬೇರೊದ ಸೆಟ್ಟಿ ದೇವರಾಜಯ್ಯನ ಮಗ ರತ್ನಾಕರವರ್ಣಿ. ಕವಿಯಾದ್ ಕಾರ್ಲದ ಬೈರವರಸುನ ಓಟಗೊಗ್ ಸೇರೈ ಆಯೆ ಕವಿ ಮಾತ್ರ ಅತ್ತ ಯೋಗ ವಿದ್ಯೆ, ಮಾಯಾವಿದ್ಯೆಲೆಡ್ ಸಾಧನೆ ಮಲ್ತಿ ಒರಿ ಅವಧೂತೆ. ಬೈರವರಸುನ ಮಗಲ್ ಕಲಾವಿದ. ರತ್ನಾಕರಗ್‌ಲಾ ರಾಜಕುಮಾರಿಗ್‌ಲಾ ಇನೆಮೋಕೆ ಪುಟ್ಟುಂಡ್. ಮಾಯಾವಿದ್ಯೆಡ್ ಆಯೆ ರಾಜಕುಮಾರಿನೊಟ್ಟುಗೆ ಸೇರೈ ಉಂದು ಗೊತ್ತಾಯಿನ ಬೈರವರಸು ಆಯನ್ ಬಂಧನೊಡು ದೀಪೆ. ಅವಧೂತೆ ಆಯಿನ ರತ್ನಾಕರ ಬಂಧನೊಡ್ ತಪ್ಪೊಂಡ್ ಪಿರ ಮೂಡಬಿದ್ರೆಗೇ ಬರೈ ಮೂಡಬಿದ್ರೆಡ್ ಆಯನ ನಿರಕರೆತ ಇಲ್ಲಲ್ ಒಂಜಿ ವೀರಶೈವ ಕುಟುಮೊ ಇತ್ತಂಡ್. ಆ ಕುಟುಮೊಡ್ತಿ ರತ್ನಾಕರವರ್ಣಿನ ಸಮಾನ ಪ್ರಾಯೊದ ಪೊಣ್ಣು ಗಿರಿಜಾ ರತ್ನಾಕರವರ್ಣಿಗ್ ಬಂಧನ ಆಂಡ್‌ಂದ್ ಪನ್ನಿ ಸುದ್ದಿ ಕೇಂಡ್‌ದ್ ಬಾಳೆಹೊನ್ನೂರುದ ವೀರಶೈವ ಮಲೊಕ್ ಪೋದು ದೀಕ್ಷೆ ಪಡೆದ್ ಸನ್ಯಾಸಿನಿ ಆತಲ್ ಪನ್ನಿ ಸುದ್ದಿ ಆಯಗ್ ತೆರಿದ್ ಬರುಂಡು.

ಭರತೇಶ ವೈಭವ ಮಲ್ಲ ಕಾವ್ಯ ಆಂಡಲಾ ಅಯಿಟ್ ಕವಿ ಯೋಗ, ಭೋಗ ಸಮನ್ವಯ ಮಲ್ತ್‌ದ್ ಧರ್ಮೊಡ್ಲೆಚ್ಚಿ ಬೋಗನ್ ವರ್ಣನೆ ಮಲ್ತ್‌ದೆ ಪನ್ನಿ ಕಾರಣಡ್ಲಾವರ ಜೈನ ಮತಾಧೀಶೆರೇರಾ ಆ ಕಾವ್ಯೊಗ್ ಮಾನಾದಿಗ್ ಕೊರುಚೆರ್. ಇಂಚ ಬೇಜಾರ್‌ಡ್ ಆಯೆ ಬಾಳೆಹೊನ್ನೂರುಗು ಪೋದು ಲಿಂಗ ಧಾರಣೆ ಮಲ್ತ್‌ದ್ ವೀರಶೈವ ಧರ್ಮೊಗು ಸೇರೈ ಅಲ್ಲ ದುಂಬೇ ಪೋದಿತ್ತಿನ ಆಯನ ನೆರೆಕರೆತ್ತ ಪೊಣ್ಣು ಗಿರಿಜೆಡ ಪಾತೆರೈ ಸನ್ಯಾಸಿನಿ ಆದಿತ್ತಿನ ಗಿರಿಜೆ ಪಿರ ಗೃಹಸ್ಥ ಧರ್ಮೊಗ್ ಬರಿಯೆರೆ ಒಪ್ಪುಜಲ್. ಈ ಸಂಗತಿನ್ ಎನ್ನೊಂದ್ ಆಯೆ ಬರೆತಿನ

“ಕರ್ಮವೇ ಬಲ್ಲಿತಲ್ಲ ಚಿನಧರ್ಮವ
ನುಳಿದೆನ್ನ ನೀಪರಿ ಹುಚ್ಚು ಮಾಡಿತಲ್ಲ
ಕರ್ಮವಶದಿ ಕಾರ್ಗತ್ತಲೆ ಕವಿದೆನ್ನ

ಚರ್ಮಕೆ ಲಿಂಗವು ಬಿತ್ತಲ್ಲ ನಿರ್ಮಲ ಶ್ರೀ

ಜಿನಧರ್ಮದೊಳಿದ್ದೆನ್ನೆ ಈ ಮೈ ಹುಚ್ಚು ಮಾಡಿತಲ್ಲ'

ಪನ್ನಿ ಪಾತೆರೊಡು ಆಯೆ ಒರ ವೀರಶೈವ ಧರ್ಮೊಗ್ ಸೇರ್ದ್ಲ ಪಿರ ಆಯಿನ ಬುಡ್ಡು ಜೈನಧರ್ಮೊಗ್ ಬತ್ತದೆ ಪನ್ನಿ ವಿಚಾರ ತೆರಿದ್ ಬರ್ಪುಂಡು. ವೀರಶೈವ ಧರ್ಮೊಡುಪ್ಪುನಗನೇ ಆಯೆ ಸೋಮೇಶ್ವರ ಶತಕಲಾ, ಬಸವ ಪುರಾಣಲಾ ಬರೆದಿಪ್ಪೆರೆ ಸಾಧ್ಯತೆ ಉಂಡು.

ಬಾಳೆಹೊನ್ನೂರುಡ್ಲ ಆಯೆ ಶ್ರವಣಬೆಳಗೊಳಗ್ ಪೋಪೆ. ಶ್ರವಣಬೆಳಗೊಳಡ್ ಅಣುವೃತ ಕೈಕೊಂದು ಸನ್ಯಾಸಿ ಆದ್ ಪಿರ ಮೂಡಬಿದ್ರೆಗ್ ಬತ್ತಾದ್ ದರ್ಮೊಗು ಸಮ್ಮಂದ ಪಟ್ಟಿನ ಶತಕೊಲೆನ್ ಬರೆಪೆ. ದಿಂಜ ಕೀರ್ತನೆಲೆನ್ ಬರೆಪೆ. ಆಯೆ ಬರೆಯಿನ ಕೀರ್ತನೆಲು ಇತ್ತೆಲಾ ಮೂಡಬಿದ್ರೆಡ್ ಮಾತ್ರ ಆತ್ಮ, ಜೈನರ್ ಓಲೋಲು ಉಲ್ಲೆರಾ ಅಕುಲೆಗ್ ಪೂರ ಆರಾಧನೆದ ಪದೊಕುಲಾದುಂಡು ಪನ್ನಿ ವಿಚಾರೊನು ರತ್ನಾಕರನ ಬಗೆಟ್ ಸಂಶೋಧನೆ ಮಲ್ತಿನ ವಿದ್ವಾಂಸೆರನಕುಲು ಅಭಿಪ್ರಾಯ ಕೊರ್ತೆರ್.

ಜೈನ ಸನ್ಯಾಸಿಲು ಭರತೇಶ ವೈಭವೊಗ್ ಆ ಕಾಲೊಡು ಮಲ್ಲ ಮಾನ್ಯತೆ ಕೊರ್ಚೆರಂದಾಂಡಲಾ ಸಾಹಿತ್ಯ ದೃಷ್ಟಿಡ್ ಅವೊಂಜಿ ಮಹಾಕಾವ್ಯ. ಜೈನಧರ್ಮೊಡ್ ಬಾಹುಬಲಿ, ಭರತೆ ಮೆಗ್ಗಿ-ಪಲೆ. ತ್ಯಾಗ, ಅಹಿಂಸೆ, ಯೋಗ ದಾನೊಗು ಬಿಲೆ ಕೊರ್ಪ್ ಬಾಹುಬಲಿ ಜೈನರ್ ಒರಿ ತೀರ್ಥಂಕರೆ ಆಯೆ. ಆಂಡ ಕವಿ ಬಾಹುಬಲಿನ್ ಬುಡ್ಡು ಭರತೇಶನ್ ಪುಗರ್ಡ್ಲ ಯೋಗ - ಭೋಗ ಉಂದ್ ರಡ್ಡೆಲಾ ಬದಕ್‌ಡ್ ಸಮಾನವಾದಿಪ್ಪೊಡು ಪಂಡ್‌ಡ್ ತೋಜದ್ ಕೊರ್ತಿನ ವಿಶೇಷ ಈ ಕಾವ್ಯ ದೇಸೀ ಪದ್ಧತಿದ ಸಾಂಗತ್ಯ ರೂಪೊಡುಂಡು.

“ಜ್ಞಾನಾನವನಾತ್ಮಗರ್ಪಿಸುತಿಹ ನನ್ನ ಪಾನವ ಮೈಗೀವುತಿಹನು

ಜ್ಞಾನಿಗಳಲ್ಲದೆ ಭರತೇಶನೆದೆಯೆ ಸಂಧಾನವ ಬಲ್ಲವರಾರು”

ಪಂಡ್‌ಡ್ ಕವಿ ಭರತೇಶನ್ ಯೋಗ - ಭೋಗ ಸಮನ್ವಯವಾದ್ ಮಲ್ತೊಂದಿತ್ತಿ ಬಲಿಷ್ಠ ಅರಸುಂದ್ ವರ್ಣನೆ ಮಲ್ತದೆ.

ಈ ಕಾವ್ಯೊಡ್ ತುಳುನಾಡ್‌ದ ಪರಿಸರದ ವಿವರಣೆ ಉಂಡು. ಕಡಲ್‌ದ ವರ್ಣನೆ ಉಂಡು. ಜೋಕುಲೆನ ಗೊಬ್ಬುದ ಬಗ್ಗೆ ಬರೆತೆ. ತುಳುನಾಡ್‌ದ ತಿಂಡಿ ತೆನಸ್‌ದ ಬಗ್ಗೆ ಬರೆತೆ. ತುಳು ಸಂಸ್ಕೃತಿನ ನೆಗತ್ ತೋಜಾಡೆ. ತುಳುವರ್ ಈ ಕಾವ್ಯೊನು ಓದುದು ಬೆಕ್ಕಸ ಅವೊಡ್‌ಂದ್ ಪನ್ನೆ. ಅಯಿನೊಟ್ಟಿಗನೆ ಆಯೆ 'ರಯ್ಯ ಮಂಚಿದಿ ಎನೆ ತೆಲುಗಾ' ತೆಲುಗುದಕ್‌ಲೆಲಾ ಈ ಕಾವ್ಯೊನು ಓದ್‌ದ್ ಸಂತೋಸ್ ಪಡವೊಡ್‌ಂದ್ ಪನ್ನೆ. ತುಳುಕೆಲಾ ತೆಲುಗುಗುಲಾ ದಾಲ ಸಮ್ಮಂದ ಇತ್ತಿಲೆಕ ತೋಜುಜೆ. ಆಯೆ ತೆಲುಗರ್‌ನ ವಿಚಾರೊನ್ ದಾಯೆ ಬರೆತೆಂದ್ ಅಂದಾಜಿ ಆಪುಜೆ. ಭವಿಷ್ಯ ಆಯೆ ಆಯನ ಕಾವ್ಯೊಗ್ ತುಳುನಾಡ್‌ಡ್ ಪುಗರ್ತೆ ತಿಕ್ಕುಜಿಂಡ್ ಪನ್ನೆಗ ವಿಜಯನಗರೊದ ಅರುಸುಲೆನ ಆಸ್ಥಾನೊಗ್ ಪೋದಿಪ್ಪೊಡು. ಅತ್ತೆಂಡ ಬಾರ್ಕೂರುಡ್ ಆಳೊಂದಿತ್ತಿನ ವಿಜಯನಗರದ ರಾಜಪ್ರತಿನಿಧಿನೆ

ತೂದಿಪ್ಪೊಡು. ವಿಜಯನಗರೊಡ್ ತೆಲುಗು ಮೆರೆವೊಂದಿತ್ತಂಡ್. ಅಲ್ಪ ಆಯಗ್ ಆಸ್ಥಾನ ಕವಿಯಾವೊಡು ಪನ್ನಿನ ಆಸೆ ಇತ್ತಿನೆಡ್ಲಾವರ ಆಯೆ ಈ ವಾಕ್ಯೊನು ಬರೆದಿಪ್ಪೊಡು. ಆಂದ ಅವು ಸಾಧ್ಯ ಆಯಿಜಿ. ಆಯೆ ವಿಜಯನಗರೊಗ್ ಪೋದಿತ್ತಿನ ಪೂರ್ತು ಅವು ವಿಜಯನಗರದ ಅವಸಾನೊದ ಪೂರ್ತಾದಿಪ್ಪೊಡು.

ದಾನೆನೆ ಆವಡ್ ರತ್ನಾಕರವರ್ಣಿ ಮಲ್ಲ ಕವಿ. ಸಿಂಗಾರ ಕವಿ ಹಂಸರಾಜೆ. ಅಯಿತೊಟ್ಟಿಗೆನೆ ಮಲ್ಲ ಯೋಗಿಲಾ ಆದಿತ್ತ ಪನ್ನಿನೆಕ್ ದಾಲ ಸಂಶಯ ಇಜ್ಜಿ. ಈ 'ಭರತೇಶ ವೈಭವ' ಇಂಗ್ಲಿಷ್, ಹಿಂದಿ, ಗುಜರಾತಿ, ಮರಾಠಿ ಇಂಚ ಬೇರೆ ಬೇತೆ ಭಾಷೆಲೆಗ್ ತರ್ಜುಮೆ ಆದ್ ಲೋಕ ಸಾಹಿತ್ಯದ ಸಾಲ್ಗ್ ಸೇರ್ಪ್ಪೆಂಡ್ ಪನ್ನಿನವು ನಂಕ್ ಮಲ್ಲ ಸಂತೋಷದ ವಿಚಾರ.

ರತ್ನಾಕರವರ್ಣಿನ ಬಗೆಟ್ ತುಳುಟ್ ಬತ್ತಿನ ಒಂಜಿ ಸುರುತ ಬೂಕು ಪಂಡ್ ದ್ ಪನ್ನಿನ ಅಕಾಡೆಮಿಗೊಂಜಿ ಪುಗರ್. ನೆನ್ನ್ ಬರೆದ್ ಕೊರ್ನ್ ಮೂಡಬಿದ್ರೆದ ಮುನಿರಾಜ ರೆಂಜಾಳ ಮೇರ್ ತುಳುಭಾಷೆದ ಮಿತ್ತ್ ಅಭಿಮಾನ ಇತ್ತಿನಾರ್. ತುಳು - ಕನ್ನಡೊದ ಮಲ್ಲ ವಾಗ್ಗಿ ಸಾಹಿತ್ಯದ ಮಲ್ಲ ಮಲ್ಲ ಲೇಸ್‌ಲೆನ್ ಪೊರ್ಲು ಪೊಲಿಗಿಡ್ ಸುಧಾರಿಕೆ ಮನ್ವನ ಸಾಮರ್ಥ್ಯವಂತೆ. ಮೂಡಬಿದ್ರೆದ ಜೈನ ಪ್ರೌಢಶಾಲೆಡ್ ಕನ್ನಡ ಗುರುಕುಲಾದ್ ಬೇಲೆ ಬೆಂದೊಂದುಪ್ಪುನ ಮೇರ್ ಕನ್ನಡೊಡು ಕೆಲವು ಬೂಕುಲೆನ್ ಬರೆತರ್. ತುಳುಟು ಉಂದು ಆರೆನ ಸುರುತ ಬೂಕು. ಸುರುತ ಬೂಕುಡೇ ಆರ್ ತುಳು ಬಾಸೆದ ಮಿತ್ತ್ ಆರೆಗಿತ್ತಿನ ಹಿಡಿತೊನು ತೋಜಾದ್ ಕೊರ್ತರ್. ಆರೆನ ಸೋದನೆದ ಪ್ರವೃತ್ತಿನ್ ತೆರಿಪದೆರ್. ಇತ್ತಿನೆನ್ ಇತ್ತಿಲೆಕ, ಕೇಂಡಿನೆನ್ ಕೇಂಡಿಲೆಕ ಪ್ರಾಮಾಣಿಕತೆ ದೀದ್ ಬರೆತರ್. ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿದ ಸದಸ್ಯರಾದಿತ್ತದ್ ಆರ್ ತುಳುತ ಬಗ್ಗೆ ಬೂಕು ಬರೆಪಿನೆತ ಬಗ್ಗೆ ಎಚ್ಚ ವಿಚಾರೊಲೆನ್ ತೆರಿಯೊಂದರ್. ಕೇಂಡಿ ಸಾತ್‌ಗ್ ಬೂಕ್ ಬರೆದ್ ಕೊರ್ತಿನ ಆರೆಗ್ ಅಕಾಡೆಮಿದ ಪುದರ್‌ಡ್ ಸೊಲ್ವೆ ಸಂದಾವೊಂದುಲ್ಲೆ. ಅಂಚನೆ ಬೂಕುನು ಬೊಲ್ಪುಗು ಕನತಿನ ಅಕಾಡೆಮಿದ ರಿಜಿಸ್ಟ್ರಾರ್ ಶ್ರೀ ಬಿ. ಚಂದ್ರಹಾಸ ರೈ ಬೊಕ್ಕ ಸರ್ವ ಸದಸ್ಯರೆಗ್‌ಲಾ, ಬೂಕುನು ಪೊರ್ಲು ಪೊಲಿಗಿಡ್ ಅಚ್ಚಿ ಮಲ್ತ್ ಕೊರ್ನ್ ಆಕೃತಿ ಪ್ರಿಂಟ್ಸ್‌ದ ಶ್ರೀ ಕಲ್ಲೂರು ನಾಗೇಶ್ ಬೊಕ್ಕ ಕೂಟೊದಕುಲೆಗ್‌ಲಾ ಸೊಲ್ವೆಲು.

ಕುಡ್ಲ

೨೦೧೧ ಬೇಸ್ಮ ೧೨

ಡಾ. ಪಾಲ್ತಾಡಿ ರಾಮಕೃಷ್ಣ ಆಚಾರ್

ಎನ್ನ ರಡ್ಡ್ ಪಾತೆರೊ

ತುಳು ಎಂಕ್ಲ ಎಲ್ಲಿಡ್ಲಿಂಚ ಇಲ್ಲಡ್ ಪಾತೆರುನ ಎನ್ನ 'ಅಪ್ಪೆ ಬಾಸೆ'. ಆಂಡ ಬರೆಪ್ಪುನ ವಿಸಯೊಗು ಬತ್ತಂಡ, ಯಾನ್ ತುಳುಟ್ಟು ಈಶ್ ಪೊರ್ತು ದಾಲಾ ಬರೆತ್ತೆ. ಇತ್ತೆ ಬರೆವೊಂದಿಪ್ಪುನ ಈ "ಮಹಾಕವಿ ರತ್ನಾಕರ ವರ್ಣಿ" ಪುಸ್ತಕನೇ ಎನ್ನ ತುಳುತ್ತು ಸುರುತ್ತ ಪುಸ್ತಕೊ. ಎನ್ನ ಭಾಗ್ಯೊಡ್ಲಾತ್ತ ಯಾನ್ 1998ಡ್ಲೆ 2001 ಮುಟ್ಟ ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿದ ಸದಸ್ಯೆ ಆದಿತ್ತೆ. ಆ ಪೊರ್ತುಗು ಪೊಳಲಿ ಬಾಲಕೃಷ್ಣ ಶೆಟ್ಟಿನ ಗುರ್ಕಾರ್ಡೆಡ್ ಎಂಕ್ಲ ಅಕಾಡೆಮಿದ ಬೇಲೆ ಮಲ್ಪುನಗ ಎನಡ ನನಲಾತ್ ತುಳುತ್ತು ಮೋಕೆ ದಿಂಜಿಂಡ್. ಅಡೆಮುಟ್ಟ ಸಭೆಕ್ಲೆಡ್ ಕನ್ನಡೊಡು ಪಾತೆರೊಂದಿತ್ತಾನ ಯಾನ್ ಐಡ್ಲೆಬೊಕ್ಕ ತುಳುಟ್ಟು ಪಾತೆರೆ ಸುರುಮಲ್ತೆ. ಎಂಕ್ಲೆನ್ ಕಾರ್ಲಡ್ ತುಳು ಅಕಾಡೆಮಿದ ವರ್ಸೊದ ಪ್ರಶಸ್ತಿ ಕೊರ್ಪಿನ ಲೇಸ್ ಮಲ್ತೊ. ಅಪಗ ನನಲಾತ್ ತುಳುತ್ತು ಮಿತ್ತಾದ ಅಭಿಮಾನ ಎಚ್ಚಾಂಡ್. ಅಂಚೆನ ನನಲಾತ್ ತುಳುಕಾತ್ರ ಬೇಲೆ ಮಲ್ಪೊಡು ಪನ್ನಿನ ಆಸೆ ಪುಟ್ಟುಂಡ್.

ಯಾನ್ ಸಾಲೆಡ್ ಪಾಟ ಮಲ್ಪುನು ಕನ್ನಡೊಡು. ಅಂಚಾದ್ ಕನ್ನಡದ ಮಿತ್ತಾಲಾ ಎಂಕ್ ದಿಂಜ ಮೋಕೆ ಉಂಡು. ಕನ್ನಡೊಡು ಕೆಲವು ಪುಸ್ತಕೊಲೆನ್ನ ಬರೆತ್ತೆ. ಆಂಡ ತುಳುಟ್ಟು ದಾಲಾ ಬರೆತ್ತೆ. ಇತ್ತೆ ಕನ್ನಡ ಪ್ರೀತಿ ತುಳುಕ್ಕಾವಡ್, ಅತ್ತಂಡ ತುಳುತ್ತು ಮೋಕೆ ಕನ್ನಡಗಾವಡ್ ದಾಲಾ ತೊಂದ್ರೆ ಕೊರ್ಪುಜೇಂದ್ ಗೊತ್ತಾತ್ತಾಂಡ್. ಅಂಚಾದ್ ತುಳುಟ್ಟಲಾ ನನಲಾತ್ ಬರೆವೊಡು ಪನ್ನಿ ಆಸೆ ಇತ್ತೆ ಪುಟ್ಟುದುಂಡು.

ಯಾನ್ ಕರಿನ ಇರ್ವ ವರ್ಸೊ ಪಿರಾವು ಬೇಲೆಗಾತ್ರ ಬೆದ್ರಗ್ ಪೋಯಿ ಬೊಕ್ಕ, ಆ ಬೆದ್ರದ ಮಣ್ಣೆಡ್ ಪುಟ್ಟುದುನ ಮಾಮಲ್ಲ ಬರ್ಸಿ ರತ್ನಾಕರ ವರ್ಣಿನ ಬಗ್ಗೆ ತೆರಿಯೆ. ದಿನ ಪೋಯಿಲೆಕ್ಕನೇ ಆಯನ ಬಗಟ್ ಪೊಸ ಪೊಸ ವಿಸಯೊಲೆನ್ ತೆರಿಯೊಂಡೆ. ಅಂಚೆ ನನಲಾತ್ ತೆರಿಯೊಡ್ ಪನ್ನಿ ಮೋಕೆಡ್ ದುಂಬು ಪೋಯೆ. ಮಸ್ತ್ ವಿಸಯೊಲೆನ್ ಅಲ್ಪ-ಮುಲ್ಪ ಕನ್ನಡೊಡು ಬರೆವರ, ಪಾತೆರೈರೆ ಸುರುಮಲ್ತೆ. ಬೆದ್ರದ "ಮಹಾಕವಿ

ರತ್ನಾಕರ ವರ್ಣಿ" ವೇದಿಕೆದಕ್ಲ ನಡಪ್ಪಾವೊಂದಿತ್ತನ ರಾಜ್ಯ ಮಟ್ಟೊದ ಪ್ರಬಂಧ ಸ್ಪರ್ಧೆಲೆಡ್ ಏಪೊಲಾ ಭಾಗವಹಿಸಾದ್, ರತ್ನಾಕರನ ವಿಷಯೊಡೇ ಬೇತೆ ಬೇತೆ ಸಂಗತಿಲೆನ್ ಬರೆದ್, ಐನ್ ಸರ್ತಿ 'ಬಹುಮಾನ' ಪಡೆಯೆ. ಉಂದು ಪೂರ ಆಯನ ಬಗ್ಗೆ ಎಂಕ್ ನನಲಾತ್ ತೆರಿಯೊಂದೇ ಪೋವೊಡು ಪನ್ನಿ ಅರ್ತಿನ್ ಪುಟ್ಟೊಂಡ್.

ಇಂಚಪ್ಪ ಐನಾಜಿ ವರ್ಸೊಡ್ಡಿಂಚಿ ರತ್ನಾಕರ ವರ್ಣಿನ 'ಭರತೇಶ ವೈಭವೊ' ಬೊಕ್ಕ ಶತಕೊಲೆನಂ ಅಲ್ಪಲ್ಪ 'ವಾಚನ-ಪ್ರವಚನ' ಮಲ್ಪುನ ಬೇಲೆ ಸುರುಮಲ್ತೆ. ಕುಡ್ಲ, ಕಾರ್ಲ, ಬೆದ್ರ... ಇಂಚ ಕೈತಲ್ದ ಊರುಲೆಡ್ ಅತ್ತಾಂದೆ ಉತ್ತರ ಕರ್ನಾಟಕೊದ ಕೆಲವು ಊರುಲೆಡ್ಲಾ ಭರತೇಶ ವೈಭವೊನು ದೀವೊಂದ್ ವಾರಗಟ್ಟಿ 'ಪ್ರವಚನ' ಮಲ್ತೆ. ಇಂಚ ಮಾತ ಆದ್ ಎಂಕಿತ್ತೆ ರತ್ನಾಕರೆ ಪಂಡ ಮಸ್ತ್ ಮೋಕೆ, ಗೌರವ. ಉಂದುವೇ ಪೂರ್ತುಡು ತುಳು ಅಕಾಡೆಮಿದ ಗುರ್ಕಾರ ಪಾಲ್ತಾಡಿ ರಾಮಕೃಷ್ಣ ಆಚಾರ್ ಈ ಪುಸ್ತಕ ಬರೆವೊಡು ಪಂಡಿನವು ಎನ್ನ ಭಾಗ್ಯೊ. ನೆಡ್ಲ ಎಂಕ್ ಮಸ್ತ್ ಕುಸಿ ಆಂಡ್. ಆಂಡ ತುಳುಟ್ಟು ಸುರು ಬರೆವೊಂದಿಪ್ಪುನೊಡ್ಲಾತ್ ಒಂತೆ ನಿಧಾನ ಆಂಡ್. ಇತ್ತೆ ಮುಗಿತ್ತೆ ಕೊರೊಂದುಲ್ಲೆ.

ಯಾನ್ ಇತೂರ್ತು ತುಳುಟ್ಟು ಬರೆತ್ತಿಜಿ. ಆಯಿನಾಡ್ಲಾತ್, ನೆಟ್ ಮಸ್ತ್ ಬಾಸೆದ ದೋಸೊಲು ಇಪ್ಪುಂದು ಎನ್ನುವೆ. ಅವೆನ್ ಮಾತ ತುಳು ಬಂಧುಲು ಮಾಪು ಮಲ್ತಾದ್, ಎಂಕ್ ನನಲಾತ್ ಬರೆವರ ಉಮೇದ್ ಕೊರೊಡುಂದ್ ಕೇಂಡೊನ್ನೆ ಎಂಕ್ ನೆನ್ ಬರೆವರ ಬೆರಿ ತಟ್ಲಾದ್ ಅವಕಾಶ ಕೊರಿನ ಪಾಲ್ತಾಡಿ ದಾರೆಗ್ಲಾ, ರಿಜಿಸ್ಟ್ರಾರ್ ಬಿ. ಚಂದ್ರಹಾಸ ರೈ, ಅಂಚನೆ ಅಕಾಡೆಮಿದ ಮಾತೆರಗ್ಲಾ ಯಾನ್ ಮೋಕೆಡ್ ಸೊಲೈಸಂದಾವೆ. ನೆನ್ ಓದುನ ತುಳು ಬಂಧುಲೆಗ್ಲಾ ಎನ್ನ ಸೊಲೈಲುಂಡು. ಮಾತೆರೆಡ್ಲಾ ಹೆಚ್ಚಿಗೆ ದಿನೊಡ್ಲಾ ದಿನೊಕ್ಕು ಎನನ್ 'ಆಕರ್ಷಣೆ' ಮಲ್ತೊಂದಿಪ್ಪುನ, ಎಂಕ್‌ಲಾ ಎಡ್ಲೆ ಪುರದ್ ಕನತ್ತೆ ಕೊರಿನ ಆ ಮಾಮಲ್ಲ ಕವಿ ರತ್ನಾಕರ ವರ್ಣಿಗ್ ಎನ್ನ ಉಡಲ್ ದಿಂಜಿನ ಸಾರೊ ಸಾರೊ ಸುಗಿಪು ಸಂದಾವೆ.

ಮುನಿರಾಜ ರೆಂಜಾಳ

ಅಧ್ಯಾಪಕರು

ಜೈನ ಪ್ರೌಢಶಾಲೆ, ಮೂಡುಬಿದಿರೆ, ದ.ಕ.

ಸಿಂಗಾರಕವಿ ಹಂಸರಾಜಿ

ರತ್ನಾಕರ ವರ್ಣಿ

ಪರಶುರಾಮನ ಸೃಷ್ಟಿವಿದ್ ಪುದರ್ ಪಡೆಯಿನ ನಮನ ಪೂರ್ವದ ತುಳುನಾಡ್, ತುಳುವಪ್ಪೆ ಬಂಗಾರ್ ಜೊಕ್ಕೆ ಜನ್ಮ ಕೊರಿನ ಪುಣ್ಯಭೂಮಿ. ಉಂದು ದುಂಬುಡ್ಡಿಂಚಲಾ ಬುದ್ಧಂತೆರೆಗ್, ಸಾಹಸಿಲೆಗ್, ಎಡ್ಡೆ ಬೆನ್ನಿನ ಬಿಸೆರೆಗ್, ಸತ್ಯ-ಧರ್ಮೋಡು ನಡಪ್ಪುನ ಎಡ್ಡೆ ನರಮಾನ್ಯೆರೆಗ್, ಪ್ರಾಮಾಣಿಕರಾಯಿನ ಜನೊಕುಲೆಗ್ ನಿಲೆ ಕೊರ್ದು ದೆರ್ತ ಪತ್ತಿನ ಮಣ್ಣ್ ಪಡ್ಡಾಯಿ ಗಟ್ಟೊದ್ ಮುದೆಲ್‌ಡ್ಡ್ ಕಡಲ ಬರಿ ಮುಟ್ಟು ಪರಡ್‌ದಿಪ್ಪುನ ಈ ತುಳುವೆರೆ ತೊಟ್ಟೆಲ್‌ಡ್ ಪುಟ್ಟುದು ಬಲತ್ತಿನ ಏತೋ ಜನ, ಊರು-ಪರಊರುಡು ತನ್ಕೆಲೆ ಬಿಸಾರದಿಗ್ಡ್ ಎಡ್ಡೆ ಬೇಲೆ ಮಲ್ತೆದ್ ಮಲ್ಲ ಪುದರ್ ಪಡೆತ್ತೆರ್. ಅಂಚಿತ್ತಿ ಜನೊಕ್ಕೆಡ್ಡಾತ್ರ ನಮನ ಈ ತುಳುನಾಡ್‌ಗ್‌ಲಾ ಎಡ್ಡೆ ಮಾನಾದಿಗ್ ತಿಕ್ಕೊಂಡ್. ತುಳುನಾಡ್‌ದ ಜನೊಕ್ಕುಲು ಬಾರೀ ಬಿಸೆರ್ ಪನ್ನಿನ ಕೀರ್ತಿ ತಿಕ್ಕೊಂಡ್. ನಮನ ತುಳುವಪ್ಪೆನ ಮಟ್ಟೆಲ್ ಪುಟ್ಟುದ ಬಲತ್ತೆದ್ ಬಿಸಾರದಿಗ್‌ದ ಎಡ್ಡೆ ಬೇಲೆ ಮಲ್ತೆದ್ ಎಡ್ಡೆ ಪುದರ್ ಕೊಣತ್ತಾನೆಂಚಿತ್ತಿ ಮಹಾಪುರುಷೆರೆನ್ ನಮ ಏಪಲಾ ಮದಪ್ಪರಾವಂದ್. ಆಕ್ ಮಲ್ತಿ ಬೇಲೆ, ಕೊಣತ್ತಿನ ಪುದರ್ ನನದ ಜೊಕ್ಕೆಗ್ ಸ್ತೂರ್ತಿಯಾವೊಡು.

ಇನಿ ನಮನ ತುಳುನಾಡ್‌ನ್ ನೆಂಪು ದೀವೊಂದು ಸಾಹಿತ್ಯ ಕ್ಷೇತ್ರೊನು ನೆನತ್ತೆಂಡ ಕೂಡ್ಲೆ ನಂಕ್ ತೋಚಿದ್ ಬರ್ಪುನಾಯೆ 'ಮಹಾಕವಿ ರತ್ನಾಕರವರ್ಣಿ'. ಆಯೆ ಬಜೀ ತುಳುನಾಡ್‌ದ ಕವಿ ಆತ್ಮ; ಇಡೀ ಪ್ರಪಂಚೊಡೇ ಕನ್ನಡ ಸಾಹಿತ್ಯ ಕ್ಷೇತ್ರೊಡು ಆಯೆ ಪುಗರ್ತೆ ಪಡೆಯಿನ ಕವಿ. ಆಯನ 'ಭರತೇಶ ವೈಭವ' ಪನ್ನಿ ಮಾಮಲ್ಲ ಕೃತಿಟ್ತ್, "ಅಯ್ಯಯ್ಯ ಎಂಚ ಪೊರ್ಲಾಂಡೆಂದ್ ತುಳುವರು ಮೈಯುಬ್ಬಿ ಕೇಳಬೇಕಣ್ಣಾ" ಪಂಡ್‌ದ್, ಸುರುಟ್ಟಿ ನೆನ್ನೊನ್ನ ಪಾತೆರೆ ಆಯಗ್ ತುಳುತ

ಮಿತ್ತಿತ್ತಿ ಅಭಿಮಾನೋನು ತೋಜವುಂಡು. ತುಳತ್ತ ಮಲ್ಲ ಅಭಿಮಾನಿ ಆಯಿನ ಆಯೆ ತುಳುನಾಡ್ ಪೆರ್ಮೆದ ಕವಿ. ಈ ಭೂಮಿ ಬುಡ್ಡ್ ಆಯೆ ಪೋದು ನಾಲ್ ನೂದ್ ವರ್ಸ ಕರಂಡಲಾ ಜನೊಕ್ಕುಲು ಇನಿಕ್ಕಲಾ ಆಯನ್ ಏಪಲಾ ಎನ್ನೊನುವೆರ್. ಆಯಿನ ಬರವುಲೆನ್ ಮಾತೆಲ್ಲಾ ಮೋಕೆಡ್ ಓದುದು ಕುಸಿಪಡೆವೊಂದೇ ಉಲ್ಲೆರ್. ಇಂಚ ಎಡ್ಡೆ ಬರವುದ ಮೂಲಕ ಏಪೊಲಾ ಮಾತೆರೆಗ್ಲಾ ಸಂತೋಸು ಕೊರುನಂಚಿತ್ತಿ ಮಹಾಕವಿ ರತ್ನಾಕರನ್ ಏಪೊಗ್ಲಾ ಮದಪ್ಪರ ಸಾಧ್ಯ ಇಜ್ಜಿ.

ರತ್ನಾಕರ ಪುಟುದು ಬಲತ್ತಿ ನೂರು, ನಮನ ತುಳು ಸೀಮೆದ ನಡುಟ್ಟಿಪ್ಪುನ ಬೆದ್ರ. ದುಂಬು ಈ ಊರುಡು ಮಸ್ತ್ ಬೆದ್ರ್, ಬುಳೆವೊಂದಿತ್ತಂಡ್ಗೆ. ಅಂಚೆ ಇಡೆಗ್ ಬೆದ್ರಾಂದ್ ಪನ್ಪೆರ್. ಉಂದು ಸತ್ಯೋನೆ. ದಾಯೆ ಪಂಡ ಇತ್ತೆ ಕಾಡ್ ಪೋದ್ ಊರು ಆತ್ಂಡಲಾ ಮುಲ್ಲ ಮಸ್ತ್ ಕಡೆಟ್ ಅಲ್ಪ-ಮುಲ್ಪ ಬೆದ್ರ್ ಪುಂಡೆಲ್ ತೋಜಿದ್ ಬಪುಂಡು. ಇಂಚಿನ ಬೆದ್ರ್ಗ್ ಕನ್ನಡೊಡು ಅವ್ವೇ ಅರ್ಥೊಡು 'ಬಿದಿರೆ' ಪಂಡ್ ಪುದರಿತ್ತಂಡ್. ಐಡ್ಲ ಬೊಕ್ಕ ಅಂಚೆ ಕಡಲ ಬರಿಟ್ ನನೊಂಜಿ 'ಬಿದಿರೆ' ಪನ್ನಿ ಊರು ಉಂಡುಂದು ತೆರಿದ್ ಬತ್ತಂಡ್ಗೆ. ಅಪಗ ಪಡ್ಲಾಯಿದ ಅರಸುಲಕ್ಕುಲು ಬೆದ್ರನ್ 'ಮೂಡುಬಿದಿರೆ'ಂದ್, ಅವೆನ್ ಪಡುಬಿದಿರೆಂದ್ ಲೆತ್ತೆರ್. ರತ್ನಾಕರನ ಊರು ಮೂಡುಬಿದಿರೆ. ನೆಕ್ಕ್ ಮಸ್ತ್ ಪಿರಾಕಾಡ್ "ಕ್ಷೇಮ ವೇಣುಪುರ" ಪಂಡ್ ಪುದರಿತ್ತಂಡ್ ಮುಲ್ಪದ ಶಾಸನೊಲೆಡ್ಲ ತೆರಿದ್ ಬಪುಂಡು.

ಒಂಜಿ ಕಾಲೊಡು ಪದಿನೆಣ್ಣ ಕೆರೆ, ಪದಿನೆಣ್ಣ ದೇವಸ್ಥಾನ, ಪದಿನೆಣ್ಣ ಜೈನ ಬಸದಿಲೆಡ್ಲ ಮೆರೆವೊಂದಿತ್ತನ ಈ ಬೆದ್ರ್ಗ್ 'ಜೈನಕಾಶಿ'ಂದ್ಲಾ ಪುದರ್ ಉಂಡು. ಒಂಜಿ ಐನೂದ್ದು ವರ್ಸೊ ಪಿರಾವುಡು ಮುಲ್ಲ ಮಸ್ತ್ ಜೈನರ್ ಇತ್ತೆರ್. ಅಪಗ ಮುಲ್ಪದ ಜೈನರ್ ಪೇಟೆಡೇ 700 ಜೈನರ್ ಇಲ್ಲುಲು ಇತ್ತಂಡ್ ತೆರಿದ್ ಬಪುಂಡು. ಇಂಚೆ ಮಸ್ತ್ ಇತ್ತಿನ ಜೈನರ್, ಅಂಚಿನೆ ಪೋರ್ಲುದ ಪದಿನೆಣ್ಣ ಬಸದಿಲು ಮಲ್ಲಾದಿಗ್, ಮಾನಾದಿಗ್ ಡಿತ್ತಿನ ಈ ಊರುನು 'ಜೈನಕಾಶಿ' ಮಲ್ತಂಡ್. ಇಂಚಿತ್ತಿ 'ಜೈನಕಾಶಿ' ಬೆದ್ರದ ಜೈನ ಪೇಟೆದ ಜೈನರ್ ಇಲ್ಲಡ್ ಪುಟ್ಟಿನ ಪುಣ್ಯ ಪುರುಷನೇ 'ಮಹಾಕವಿ ರತ್ನಾಕರವರ್ಸೆ'.

ರತ್ನಾಕರನ ಬದ್ಕಾದ ಬಗ್ಗೆ ತೆರಿಯೊಡುಂದು ನಮ ಪಿದಾಡ್ಂಡ, ನಂಕ್ ಹೆಚ್ಚಿಗೆ ವಾ ವಿಷಯೊಲಾ ತೆರಿದ್ ಬಪುರ್ಜಿ ಪನ್ನಿನವು ಬಾರೀ ಬೇಜಾರ್ ದ ಸಂಗತಿ. ದಾಯೆ ಇಂಚಾಂಡ್ ಪಂಡ, ಮಲ್ಲ ಮಲ್ಲ ಸಾಹಿತ್ಯೊದ ಗ್ರಂಥೊಲೆನ್ ಬರೆಯಿನ ರತ್ನಾಕರ ವರ್ಸೆ ದುಂಬುದ ಕಾಲದ ಮಸ್ತ್ ಕವಿಕ್ಕುಲು ಮಲ್ಲಿಲೆಕ್ಕ ಒಲ್ಪಲಾ ಆಯನ ಬಗ್ಗೆ ಆಯನೇ ದಾಲಾ ಬರೆವೊಂದಿಜೆ. ಆತೆ ಅತ್ತಾಂದೆ ಆಯನ ಬಗ್ಗೆ ಆಯನ ಕಾಲೊದ ಬೇತೇರ್ಲಾ ಒಲ್ಪಲಾ ದಾಲಾ ಬರೆದಿಜೆರ್. ಆಯನ ಬಗ್ಗೆ ಆ ಕಾಲೊದ ವಾ ಶಾಸನದಂಚಿನ ಆಧಾರೊಲ್ಲಾ ತಿಕ್ಕುಜಿ. ಆಯನ ಬಗ್ಗೆ ಆಯನೇ ದಾಲಾ ಪಂಡೊನಂದೆ ಇಪ್ಪುನವು ಆಯನ ಮಲ್ಲ ಗುಣೊ, ನಿರಂಹಕಾರತ್ವೆಂದ್ ಪನೊಲಿ. ಆಂಡ ಐಡ್ಲ ಇತ್ತೆದ ನಮಕ್ ವಗ್ತ ಮಸ್ತ್ ಬಂಜ ಆಂಡ್.

ರತ್ನಾಕರನ ಬರವು ಇಡೆಕ್ಲೆಡ್ ಸರೀ ನಾಡ್‌ಂಡ ನಮಕ್ ತಿಕ್ಕುನ ವಿವರ ಈತೆ : 'ಆಯೆ ಪುಟ್ಟಿನ ಊರು ವೇಣುಪುರಂದ್ ಲೆತ್ತೊಂದಿತ್ತಿನ ಬೆದ್ರ. ಆಯನವು ಕ್ಷತ್ರಿಯ ವಂಶ. ದೇವೆರಾಯಿನ ಶ್ರೀ ಮಂಧರ ಸ್ವಾಮಿಯೇ ಆಯನ ಅಮ್ಮರ್. ದೀಕ್ಷೆ ಕೊರಿನ ಗುರುಕ್ಕುಲು ಚಾರುಕೀರ್ತಿ ಸ್ವಾಮಿಲು.' ಈತೆ ಅತ್ತಾದೆ ನನೊಂಜಿ ಕಡೆಟ್ಟ 'ಬಾರೀ ಬುದ್ಯಂತೆರಾಯಿನ ಜಗದುರು ದೇವೇಂದ್ರ ಕೀರ್ತಿ ಸ್ವಾಮಿಲು ಎನ್ನ ಗುರುಕ್ಕುಲು, ಮೋಕ್ಷೋಗು ಗುರು ಹಂಸನಾಥೆಂದ್' ಪಂತೆ. ಈತ್ ಬುಡುಂಡ ಆಯನ ಬಗ್ಗೆ ಆಯೆ ಬರೆಯಿನ ವಾ ವಿಷಯೊಲಾ ನಮಕ್ ತಿಕ್ಕುಜಿ.

ಇಂಚಿನ ಪೂರ್ತುಡು ನಮ ಬೇತೆ ಎಂಚಾಂಡ್ಲ ರತ್ನಾಕರನ ಬಗ್ಗೆ ತೆರಿಯೊಡುಂದು ಪಿದಾಡ್‌ಂಡ, ಜನಕ್ಕುಲು ಬಾಯಿಡ್ ಪನೊಂದು ಬತ್ತಾದ್‌ನ ಕೆಲವು ಕಟ್‌ಕೆಕ್ಕುಲು; ರತ್ನಾಕರಡ್ ಮುನ್ನೂದ್ದು ವರ್ಸೋಡ್ ಬೊಕ್ಕ ಬತ್ತಿನ ದೇವಚಂದ್ರ ಪನ್ನಿನ ಕವಿ ಬರೆಯಿನ 'ರಾಜಾವಳೀ ಕಥೆ' ಪುಸ್ತಕೊಡು ಬರೆತ್ತಿನ ಕೆಲವು ವಿಷಯೊಲು; ಅಂಚೆನೆ ಬೇತೆ ಬೇತೆ ಕಡೆಡ್ಲ ವಿಷಯ ಸಂಗ್ರಹ ಮಲ್ತಾದ್ 1957ಟ್ ರಾಮೋ ವಿಶ್ವಾಮಿತ್ರರ್ ಬರೆಯಿನ 'ರತ್ನಾಕರಸಿದ್ಧ' ಕಾದಂಬರಿ, ಬೊಕ್ಕ 1961ಟ್ ಎಂ.ವಿ. ಶ್ರೀನಿವಾಸ್ ಬೊಕ್ಕ ಜಿ. ಬ್ರಹ್ಮಪ್ಪರ್ ಸೇರ್ದ್ಲ ಬರೆತ್ತಿನ 'ರತ್ನಾಕರ' ಕಾದಂಬರಿ-ಉಂದೆನ್ ಮಾತ ಓದುಂಡ ನಮಕ್ ಒಂತೆ ವಿಷಯೊ ತಿಕ್ಕುಂಡು. ಅಂಡ ತಿಕ್ಕಿನ ವಿಷಯೊಲು ಪೂರಾ ಸತ್ಯೊನಾ ಸುಳ್ಳುಂದ್ ಯೋಚನೆ ಮಲ್ತಾದ್ ದೆತೊನೊಡಾಯಿನ ಸಂಗತಿಲು ಉಂಡು. ದಾಯೆ ಪಂಡ ಕೆಲವು ವಿಷಯೊಲು ಮಾತ ಒಂಜೊಚ್ಚೆಟ್ ಒಂಜೊಂಜಿ ರೀತಿಡ್ ಉಂಡು. ಈತಾನಗ ನಮಕ್ ಒಂಜಿ ಪ್ರಶ್ನೆ ಬರು. ಆತ್ ಕಷ್ಟೊಡು ನಮ ರತ್ನಾಕರನ ಜೀವನದ ವಿಷಯೊನು ದಾಯೆ ತೆರಿಯೊಡು? ಆಯೆ ಪನಂದಿ ಸಂಗತಿಲೆನ್ ನಮ ತೆರಿಡ್ ದಾದ ಆವೊಡು?

ವಿಷಯ ಅಂದ್, ಅಂಡ ಯೇರೇ ಕವಿನ ಬರವುನು ಸರೀ ಅರ್ಥ ಮಲ್ತೊನೊಡುಂದಾಂಡ, ಆ ಬರವುದ ಪಿರಾಡ್ಲ ಇಪ್ಪುನ ಕವಿನ ಬದ್‌ಕನ್ಲಾ ನಮ ತೆರಿಡಿತ್ತಂಡ ಎಡ್ಲೆ ಏಪೊಲಾ ಕವಿಕ್ಲೆನ ಬದ್‌ಕನ್ಲಾ ಬರವುಗ್ಲಾ ನಡುಟ್ಟು ಸಂಬಂಧ ಇಪ್ಪುಂಡು. ಅಂಚಾದ್ ನಮ ರತ್ನಾಕರ ವರ್ಣನ ಬದ್‌ಕನ್ ಎಡ್ಲೆ ತೆರಿಂಡ, ಆಯನ ಪುಸ್ತಕೊಲೆನ ಬರವು-ಭಾವನೆಲೆನ್ ಎಡ್ಲೆಡ್ ಅರ್ಥ ಮಲ್ತೊನೊಲಿ. ಅಂಚಾದ್ ನಮ ಸುರುಟ್ಟು ಒಂತೆ ಆಯನ ಬದ್‌ಕನ್ ತೆರಿಯೊನುಗ.

ಜನೊಕ್ಲೆನ ಬಾಯಿಡತ್ತಿನ ಕಥೆಕ್ಲೆನ್ ಬುಡುಂಡ, ರತ್ನಾಕರವರ್ಣನ ಬಗ್ಗೆ ನಮಕ್ ಮಸ್ತ್ ವಿಷಯೊ ತೆರಿಪಾದ್ ಕೊರಿನಾಯೆ ದೇವಚಂದ್ರ. ರತ್ನಾಕರೆ ಇತ್ತನೆ ಪದಿನಾಚೆನೆ ಶತಮಾನೊಡು. ದೇವಚಂದ್ರ ಬದ್‌ಕಾದಿತ್ತನ್ ಕ್ರಿ.ಶ. 1770ಡ್ಲ 1841 ಮುಟ್ಟು ಪಂಡ ಪದಿನೆಂ-ಪದಿನೊಂಬನೆ ಶತಮಾನೊಡು. ಇಂಚ ಮುನ್ನೂದ್ದು ವರ್ಸೊಡ್ಲ ಬೊಕ್ಕ ಪುಟ್ಟಿನ ದೇವಚಂದ್ರ, ಆಯನ 'ರಾಜಾವಳೀ ಕಥೆ' ಪನ್ನಿನ ಪುಸ್ತಕೊಡು ಇಂಚ ಪನೊಂದು ಪೋಪೆ:

"ತುಳುವ ದೇಶೊಡು ಬೆದ್ರದ ಊರುಡು ಸೂರ್ಯವಂಶೊದ ಅರಸು ಮನೆತನೊಟ್ಟು

ದೇವರಾಜೆ ಪನ್ನಿನಾರೆಗೆ ಮಗೆ ಆದ ಪುಟ್ಟಿನಾಯೆ ರತ್ನಾಕರ. ಕಡಲ ದೇವರನ ಪುದರ್ ಪಡೆಯಿನ ಈ ರತ್ನಾಕರ ಎಲ್ಲಿಡೇ ಕಾವ್ಯ ಅಲಂಕಾರ ಲಕ್ಷಣ ಶಾಸ್ತ್ರಾಲೆಡ್ ಮಸ್ತ ಬರ್ಸಾದಿಗೆ ಪಡೆದಿತ್ತೆ. ಸಾರತ್ರಯ ಪನ್ನಿ ಪುಸ್ತಕೂಗ್ ಕೇಶವವರ್ಯರ್ ಬರೆಯಿನ ವ್ಯಾಖ್ಯಾನೊಲೆನ್; ಕುಂದ ಕುಂದಾಚಾರ್ಯರ ಆಧ್ಯಾತ್ಮ ಸಿದ್ಧಾಂತೊಲೆಗ್ ಪ್ರಭೇಂದು ಬರೆಯಿನ ಟೀಕೆಲೆನ್, ಸಮಾಧಿಶತಕ ಏಕಸಪ್ತತಿ ಸ್ವರೂಪ-ಸಂಬೋಧನ ಇಂಚ ಮಸ್ತ ಆಗಮ ಗ್ರಂಥೊಲೆನ್ ಮಸ್ತ ಮನಸ್ ದೀಡ್ ಓದುದ ತೆರಿದಿತ್ತಿನ ರತ್ನಾಕರ ಮಲ್ಲ ಕವಿ ಆಯೆ. ಆಯನ ಕಾವ್ಯ ಬರೆಪ್ಪನ ಬರ್ಸಾದಿಗೆನ್ ಕೇಂಡ್ ತೆರಿನ ಆ ದೇಶೊದ (ಕಾರ್ಲದ) ಅರಸು ಚಂದ್ರವಂಶೊದ ಭೈರವ ಅರಸೆ ಇಂಬ್ಯನ್ ಲೆಪ್ಪಡಾದ್ ರಾಜಸಭೆಟ್ 'ಶೃಂಗಾರ ಕವಿ'ಂದ್ ಪುದರ್ ಕೊರ್ದು ಎಡ್ಡೆ ಮಾನಾದಿಗೆ ಮಲ್ತೆ. ಅಲ್ಲ ಪಂಡಿತೆರೆ ನಡುಟ್ಟು ಮಲ್ಲ ಪಂಡಿತೆ ಆದ್ ತೋಜಿದ್ ಬತ್ತನ ರತ್ನಾಕರ ಎಡ್ಡೆ ಯೋಗ ಸಾಧನಲಾ ಮಲ್ತೆ. 'ಯೋಗ ರತ್ನಾಕರ'ಂದ್ ಪುದರ್ ಪಡೆಯಿನ ಆಯೆ ಜೋಕ್ಲಾಟಿಗಿದ ಆ ಪ್ರಾಯೊಡೇ ಭೈರವ ಅರಸೆರ್ದ ಮಗಲೆನ್ ಮೋಕೆ ಮಲ್ತೆ. ಆತ್ ಪೂರ್ತುಗು ಆಯೆ ಮಸ್ತ ಸಾಧನ ಮಲ್ತಾದ್ ದಶವಾಯು ಸಿದ್ಧಿ ವಿದ್ಯೆನ್ ಕಲ್ತದಿತ್ತೆ. ಆ ವಿದ್ಯೆನ್ ಉಪಯೋಗ ಮಲ್ತೊಂದು ಗಾಲಿಡೇ ರಾಜಕುಮಾರಿ ಇತ್ತನ ಉಪರಿಗದ ಮಿತ್ತ್ ಪೋದು ಬರೊಂದಿತ್ತೆ. ಇಂಚೆನೇ ರಾಜಕುಮಾರಿನ ಮಿತ್ತ್ ಆಯನ ಮೋಕೆ ಹೆಚ್ಚಾಯಿ ಪೂರ್ತುಗು, ಆಯೆ ಅಲೆನೊಟ್ಟುಗು ಸೇರ್ಕರ ರಾತ್ರಡ್ಲಾ ಉಪರಿಗದ ಮಿತ್ತ್ ಪೋದ್, ಯೋಗ ವಿದ್ಯೆದ ಮೂಲಕ ಗವಾಕ್ಷಿಡ್ ಪಿದಾಯಿ ಬರೊಂದಿತ್ತೆ. ಇಂಚ ರಾಜಕುಮಾರಿದ ಆಯನ ಇನೆಮೋಕೆ ಜಾಸ್ತಿಯಾಯಿನ ಪೂರ್ತುಗು, ಅವು ಅರಸಗ್ ತೆರಿಂಡ್. ರಾಜೆ ಆಯನ್ ಅಲ್ಪನೇ ಪತ್ತೊಡುಂದು ಪೂರ್ತು ಕಾತೊಂದಿತ್ತೆ. ಕಡೆಕ್ ಒಂಜಿದಿನ ರಾತ್ರೆ ರಾಜೆ ಆಯನ್ ಪತ್ನಿ ಅಲ್ಪ ತಪ್ಪಾದ್ ಪೋಯಿನ ರತ್ನಾಕರ ರಾತ್ರೆನೇ ಗುರುಕುಲಾಯಿನ ಮಹೇಂದ್ರ ಕೀರ್ತಿನಡೆ ಪೋದು ಅಣುವ್ರತ ದೀಕ್ಷೆ ಗೆತೊಂಡೆ. ಐಡ್ ಬೊಕ್ಕ ಕುಡ ಆಗಮೊಲೆಡ್ ಬರ್ಸಾದಿಗೆನ್ ಹೆಚ್ಚ ಮಲ್ತೊನ್ನ ಆಯೆ ದಿಂಜ ಪೂರ್ತು ರಾತ್ರಿ-ಪಗಲ್ ಆಧ್ಯಾತ್ಮ ಸಾಧನೆಡ್ ಕಳೆಯೆ. ಆ ಕಾಲೊಡು ವಿಜಯಕೀರ್ತಿ ಪನ್ನಿನ ಭಟ್ಟಾಚಾರ್ಯರ ಶಿಷ್ಯೆ ಆಯಿನ ವಿಜಯಣ್ಣೆರ್ 'ದ್ವಾದಶಾನುಪ್ರೇಕ್ಷೆ'ಲೆನ್ ಕನ್ನಡೊಡು ಸಂಗೀತದ ರೀತಿಡ್ ವೃತ್ತ-ವಚನ ಭಂದಸ್ಡ್ ಬರೆಯರ್. ಆ ಪುಸ್ತಕೊನು ಆನೆದ ಮಿತ್ತ್ ದೀಡ್ ಮೆರವಣಿಗೆ ಮಲ್ತರ್. ಐನ್ ತೂಯಿನ ರತ್ನಾಕರ ಎಂಕ್ಲಾ ಆ ಮಾನಾದಿಗೆ ತಿಕ್ಕೊಡುಂದ್ ಭರತೇಶ್ವರನ ಚರಿತ್ರೆನ್ ಎಣ್ಪತ್ತನಾಲ್ ಸಂಧಿಡ್ ಬರೆದ್, ಅವನ್ ಆನೆದ ಮಿತ್ತ್ ದೀಡ್ ಮೆರವಣಿಗೆ ಮಲ್ತೊಡುಂದ್ ಕೇಂಡೆ. ಅಪಗ ಭಟ್ಟಾಚಾರ್ಯರ್ ಅವನ್ ಓದುದು, ನೆಚ್ಚ ರಡ್ಡೆ ಮೂಜಿ ವಾಕ್ಯೋ ನಮನ ಪುರಾಣೊಗು ವಿರುದ್ಧವಾದ್ ಉಂಡು. ಅಂಚಾದ್ ನೆಚ್ಚ ಆನೆದ ಮಿತ್ತ್ ಮೆರವಣಿಗೆದ ಮಾನಾದಿಗೆ ತಿಕ್ಕಂದ್ ಪಂಡರ್. ಅವ್ವೆ ವಿಷಯ ಮಸ್ತ ಜೋರುಡು ಚರ್ಚೆ ಆದ್ ಆಯಗ್ ಊರುಡ್ಲ ಬಹಿಷ್ಕಾರ ಪಾಡ್ಯರ್. ಊರುದ ಏಳೆನೊಡ್ಲ ಜೈನೆರ್ದ ಇಲ್ಲಾಡ್ ಆಯಗ್ ಒನಸ್ ತಿಕ್ಕಂದಿ ಪೂರ್ತುಗು ಆಯೆ ಆಯನ ತಂಗಡಿನಲ್ಲ ಒನಸ್

ಮಲ್ಲೊಂದಿತ್ತೆ. ಆಂಡ ಉಂದು ಕಡೆಕ್ ಆಯಗ್ ಗರ್ವ ಬರ್ಪಾಂಡ್. ಆತ್ಮೊನು ತೆರಿನಾಯಗ್ ಜಾತಿ ಕುಲ ಒವುಲಾ ಸಮನೇಂದ್ ಪಂಡ್‌ದ್ ಆಯೆ ವೀರಶೈವ ಧರ್ಮೊಗು ಸೇರೈರೆ ಆಲೋಚನೆ ಮಲ್ತೆ. ಲಿಂಗೊನು ಕಟ್ಟೊಂಡೆ, ವೀರಶೈವ ಧರ್ಮೊದ ಶಾಸ್ತ್ರ-ಗ್ರಂಥೊಲೆನ್, ಬಸವ ಪುರಾಣೊನು ಓದೊಂಡೆ. ಕೆಲವು ದಿನೊಡ್ಡ್ ಬೊಕ್ಕ, ಆಯನ ಕೋಪೊ ಕಡಮೆ ಆದ್, ಕುಡ ದುಂಬುದ ಸಾದಿಗೇ ಬತ್ತಾದ್, ಅವೆನೇ ನಂಬುದು ನಡತ್ತೆ. ರತ್ನಾಕರ ಶತಕ, ಅಪರಾಜಿತ ಶತಕ, ತ್ರಿಲೋಕ ಶತಕ, 2,000ದಾತ್ ಆಧಾತ್ಮ ಗೀತೆಲೆನ್ ಬರೆಯೆ... ಚಾಮರಾಜ ಒಡೆಯೆರ್ ಕಾಲೊಡು ರತ್ನಾಕರ ಬರೆಯಿನ ಭರತೇಶ್ವರ ಚರಿತೆದ ಎಣ್‌ಪತ್ತನಾಲ್ ಸಂಧಿಲೆನ್ ಓದೈರ್" ಪಂಡ್‌ದ್ ದೇವಚಂದ್ರ ಪನ್ನೆ.

ದೇವಚಂದ್ರ ಈತ್‌ಮಾತ ವಿಷಯೊನು ವಾ ಆಧಾರೊಡು ಬರೆಯೆ? ಆಯನ ಕಾಲೊದ ಅತ್ತಾಂದ್‌ನ ಕವಿನ ವಿಷಯ ಈತ್ ಆಯಗ್ ಎಂಚ ತೆರಿಂಡ್? ಉಂದು ಒವುಲಾ ನಮಕ್ಕ್ ತೆರಿದ್ ಬರ್ಪುಜಿ. ಆಂಡ ರತ್ನಾಕರ ಆಯನ ಬಗ್ಗೆ ದಾಲಾ ಪನಂದಿ ಪೊರ್ತುಡು, ನಮಕ್ಕ್ ದೇವಚಂದ್ರ ಒಂತೆ ವಿಷಯ ತೆರಿಪಾದ್ ಸಕಾಯ ಮಲ್ತೆಂದ್ ಪನೊಲಿ. ಬಹುಶಃ ಜನೊಕ್ಲೆನ್ ಬಾಯಿಡ್ ಇತ್ತಾನೆ ವಿಷಯೊಲೆನ್ ಕೇಂಡ್‌ದ್ ತೆರಿದ್ ದೇವಚಂದ್ರ ಬರೆಯೆನಾ ದಾನ್ನ.

ನನ ಜನೊಕ್ಲೆನ್ ಬಾಯಿಡ್ ಕಟ್ಟಕತ್ತಲೆಕ್ ಪರಡೊಂದು ಬತ್ತಿನ ನನಲಾ ಒಂಜಿ ಸಂಗತಿ ನಮಕ್ ತೆರಿದ್ ಬರ್ಪುಂಡು. ಐಟ್ ಒಂತೆ ಬೇತೆ ವಿಷಯೊಲಾ ಉಂಡು. ಅಂಚಾದ್ ಅವೆನ್ನಾ ನಮ ತೂವೊಡು. ಉಗ್ರಾಣ ಮಂಗೇಶರಾಯೆರ್ ತ.ಸು. ಶಾಮರಾಯೆರ್ ಸಂಪಾದನೆ ಮಲ್ತಿನ 'ಭರತೇಶ ವೈಭವ' ಗ್ರಂಥೊದ ಮುನ್ನುಡಿಟ್ ಆ ಕತೆನ್ ಇಂಚ ಬರೆತ್ತೆರ್ : "ಚಾರುಕೀರ್ತಿ ಸ್ವಾಮಿಲೆಡ ಎಲ್ಲಿಡೇ ದೀಕ್ಷೆ ಪಡೆಯಿನ ರತ್ನಾಕರ ದಿನೊಡ್ಡ್ ದಿನೊಕ್ಕು ಮಸ್ತು ಪೆರ್ಮೆ ಪಡೆವೊಂದು ಮಲ್ಲಜನ ಆವೊಂದಿತ್ತೆನ್ ಪೊರ್ತುಡು, ಆಯನ ಸುತ್ತ ಮಸ್ತು ಜನ ಶಿಷ್ಯರೆಕ್ಕುಲು ಸೇರೊಂದಿತ್ತೆರ್. ಅವೆನ್ ತೂದು ಕಿಚ್ಚಿ ಆಯಿನ ಕೆಲವುದಕ್ಲೆ ಆಯಗ್ ಅಪಕೀರ್ತಿ ಕನವೊಡುಂದ್, ಆಯನ ಚರ್ಪುನ ಮಂಚವುದ ಅಡಿಟ್ ಒರ್ತಿ ಸೊಳೆನ್ ದೆಂಗಾದ್ ಕುಲ್ಲಾಯೆರ್. ನೆಡ್ಡ್ ಅವಮಾನವಾಯಿನ ರತ್ನಾಕರ ಶಿಷ್ಯರೆಕ್ಕುಲು ಎಂಚಿನ ಸಮಾಧಾನ ಪಂಡೆರ್‌ಡಲಾ ಕೇನಂದೆ, ಸೀದ ಸುದತ್ತೆಡೆ ಪೋದು ನೀರ್‌ಡ್ ಮುರ್ಕುದು ಲಕ್ಕಾದ್ ಜೈನಧರ್ಮೊಗು ಜಲಾಂಜಲಿ ಕೊರೈ ಪಂಡ್‌ದ್ ಘೋಷಣೆ ಮಲ್ತಾದ್, ಕುಡವೊರ ನೀರ್‌ಡ್ಡ್ ಮುರ್ಕುದು ಲಕ್ಕಾದ್ ಘಟ್ಟದ ಮಿತ್ತ್ ಪೋಯೆ. ಅಲ್ಲ ಒಂಜಿ ಶೈವಗ್ರಂಥೊನು ಆನೆದ ಮಿತ್ತ್ ದೀದ್ ಮೆರವಣಿಗೆ ಮಲ್ಲುನ್ನೆನ್ ತೂದ್, ಆ ಗ್ರಂಥೊಡು ದಾಲ 'ರಸ' ಇಜ್ಜಿಂದ್ ಮಾತೆರ್ ಎದುರುಡೆ ದಾಲಾ ಅಲ್ಕದಾಂತೆ ಪಂಡೆ. ಉಂದೆನ್ ಕೇಂಡ್‌ದ್ ಕೋಪ ಬತ್ತಿನ ಜನೊಕ್ಕುಲು ಸೀದಾ ಪೋದು ರಾಜಗ್ ದೂರು ಕೊರೈರ್. ರಾಜೆ ರತ್ನಾಕರನ್ ಲೆಪುಡಾದ್ ವಿಚಾರಣೆ ಮಲ್ಲುನಗ, ಆಯೆ ಪೋಡಿಗಿ ದಾಂತೆ ಉತ್ತರ ಕೊರೈ. ಸವಾಲ್ ಪಾಡೈ. ಅಂಚೆ ಬಜೀ ಒಂಭರ್ ತಿಂಗೊಕ್ಕು ಪತ್ತ್ ಸಾವಿರ

ಪದ್ಯೋಲಿಪ್ಪನ 'ಭರತೇಶ ವೈಭವ' ಪನ್ನಿ ಮಹಾಗ್ರಂಥಾನು ಬರೆದ್ ಕೊರ್ದು ಅಲ್ಲದ ರಾಜನಲಾ ಜನೊಕುಲೆನಲಾ ಪುಗರ್ತ ಪಡೆಯೆ. ಐಡ್ ಬೊಕ್ಕ ರಾಜನ ಪಾತೆರ ಕೇಂಡ್ 'ವೀರಶೈವ' ಧರ್ಮೋಗು ಸೇರೈ. ಆಂಡಲಾ ಆಯೆ 'ಯಾನ್ ಸೈತಿಯೊಕ್ಕ ಎನ್ನ ಉತ್ತರಕ್ರಿಯೆನ್ ಮಾತ ಜೈನರೇ ಮಲ್ಪೊಡುಂದ್' ತೆರಿಪಾಯಿನತ್ತಾಂದೆ, 'ಯಾನ್ ಏಪೊಲಾ ಮನಸ್ಸಾಡ್ ಜೈನೇ ಆದಿತ್ತೆ; ಎನ್ನ ಕಂಟಲ್ಡ್ ಕಟ್ಟಿನವು ಲಿಂಗ ಅತ್ತ, ಗೊಂಟು ಬಜ್ಜೆಯಿ' ಪಂಡ್ ಅವೆನ್ ಮಾತೆರೆಗ್ಲಾ ಪ್ರತ್ಯಕ್ಷ ತೋಜಾದ್ ಕೊರಿಯೆ'

ಈ ಕಥೆಲಾ ಪೂರಾ ಸತ್ಯ ಇಪ್ಪಂದ್‌ಂದಾಡ್ಲಾ, ಪೂರಾ ಸುಳ್ಳುಲಾ ಆದಿಪ್ಪಂದ್. ನೆಟ್ಲಾ ನಮಕ್ ಬೋಡಾಯಿನ ರತ್ನಾಕರನ ಬದ್‌ಕದ ಕೆಲವು ಸಂಗತಿಲೆನ್ ಪೆಜ್ಜಿದ್ ದೆಪ್ಪೊಡಾಪುಂಡು. ನನ ಮೂಜಿನದಾದ್ ಸುರುಟ್ಟೇ ಪಂಡಿಲೆಕ್ಕನೇ ರತ್ನಾಕರವರ್ಣನ ಬಗ್ಗೆ ರಡ್ಡ್ 'ಕಾದಂಬರಿ'ಲು ಬೈದ್‌ಂಡ್. ನೆನ್ನ ಬರೆನಗಲಾ, ಐನ್ ಬರೆಯಿನಕುಲು ಮಸ್ತ ಕಡೆಡ್ ಮಾಹಿತಿಲೆನ್ ಸಂಗ್ರಹ ಮಲ್ದಾದ್ ಬರೆತ್ತರ್. ಆಂಡ ಐತ್ತ ಒಟ್ಟುಗೇ ಐಕುಲು ಕಾದಂಬರಿಲು ಆಯಿನ್ನೆಡ್ಲಾತ್ತ ಕೆಲವು ಕಲ್ಪನೆಲೆನ್ನಾ ಸೇರ್ದಾದ್ ಪೊರ್ಲು ಮಲ್ದರ್. ಐಕ್ಲೆಡ್ಲಾ ನಮ ಸತ್ಯೊಗು ಕೈತಲಿಪ್ಪನ ಸಂಗತಿಲೆನ್ ಸರಿ ತೊದು ನಾಡ್ ಪೆಜ್ಜಿದ್ ದೆಪ್ಪೊಡು. ಮುಲ್ಲ ಯಾನ್ ಆ ರಡ್ಡ್ ಕಾದಂಬರಿಲೆಡ್ ಇಪ್ಪನ ಕತೆನ್ ಪನರ ಪೋಪುಜಿ. ದಾಯೆ ಪಂಡ ಅವು ಬಾರೀ ಮಲ್ಲೆ ಉಂಡು. ಆಂಡ ಆ ಕಾದಂಬರಿಲೆಡ್ ತೋಜದ್ ಬರ್ಪುನ ಸತ್ಯೊಲು, ಅಂಚೆನೆ ನೆಡ್ ದುಂಬು ಪಂಡಿನ ದೇವಚಂದ್ರೆ ಬೊಕ್ಕ ಜನೊಕ್ಲೆ ಬಾಯಿಡ್ಲಾ ಕೇಂಡ್ ಬರೆಯಿನ ಕಟ್‌ಕತೆಟ್ಟುಪ್ಪನ ಸತ್ಯೊಲೆನ್ ದೀವೊಂದು ರತ್ನಾಕರವರ್ಣನ ಬಗ್ಗೆ ಒಂತೆ ಪನ್ನೆ.



ಕ್ರಿ.ಶ. ಪದಿನಾಜನೆ ಶತಮಾನದ ಪೂರ್ತುಡು ಕಡಲ ಬರಿತ್ತ ತುಳುನಾಡ್‌ದ ಮಧ್ಯೊಡ್ಲಿತ್ತನ 'ಜೈನಕಾಶಿ' ಬೆದ್ರ ಒಂಜಿ ಮಾಮಲ್ಲ ಬ್ಯಾರೊದ ಕೇಂದ್ರ ಆದಿತ್ತೆಂಡ್. ಅಪಗ ಅಂದಾಜಿ ಏಳ್‌ನೂದ್ದು ಇಲ್ಲಲು ಜೈನರ್ದವ್ವೇ ಇತ್ತೆಂಡ್‌ಂದ್ ತೆರಿದ್ ಬರ್ಪುಂಡು. ಈ ಜೈನರಡ್ ಹೆಚ್ಚಿನಕ್ಲ ಪಿದಾಯಿ ಊರು-ದೇಶೊಲೆಗ್ ಪೋದು ಬೊಲ್ಲಿ ಬಂಗಾರ್, ಮುತ್ತು, ರತ್ನ ವಜ್ರ, ವೈಡೂರ್ಯ... ಇಂಚ ಬಾರಿ ಬಿಲೆತ್ತ ಸೊತ್ತುಲೆನ್ ಬ್ಯಾರ ಮಲ್ಪೊಂದಿತ್ತರ್. ಅಪಗ ಮೊಕ್ಲೆಗ್ ಶ್ರೇಷ್ಠಿಯೆಂದ್ ಪುದಾರ್ ಇತ್ತೆಂಡ್. ಇತ್ತೆ ಅವ್ವೇ ಶೆಟ್ಟಿಂದ್ ಆತ್‌ಂಡ್. ಇಂಚಿತ್ತಿ ಶ್ರೀಮಂತರಾಯಿನ ಶ್ರೇಷ್ಠಿಯೆನಕುಲು ಬೆದ್ರಡ್ ಎಷ್ಟಿ ಬಸ್ತಿಯೆ ಕಟ್ಟಾಯಿರ್, ಮೂರ್ತಿಲೆನ್ ಮಲ್ಪಾಯಿರ್, ದಾನ-ಧರ್ಮ ಮಲ್ದರ್. ಇಂಚಿನ ಬೆದ್ರಡ್ ಜೈನರ್ದ ಪೇಟೆದ ಜೈನರ್ದ ನಡುಟ್ಟು ದೇವರಾಜಯ್ಯ ಪನ್ನಿನಾರ್ ಜೀವನ ಮಲ್ಪೊಂದಿತ್ತರ್. ಮೇರ್ ಕ್ಷತ್ರಿಯ ರಾಜವಂಶೊಗು ಸೇರಿನ ಎಡ್ಡೆ ಮಾನಾದಿಗದ ಇಲ್ಲದಾರ್. ದೇವರಾಜಯ್ಯರ್ ಸೂರ್ಯ ವಂಶೊಗು ಸೇರಿನ ಕ್ಷತ್ರಿಯ ಮನೆತನೊದಾರ್ ಆಯಿನ್ನೆಡ್ಲಾತ್ತ ಊರ್ದ ಬಾಕಿ ಜೈನ ಶ್ರೇಷ್ಠಿಲೆಕ್ಕ

ಬ್ಯಾರ ಮಲ್ಟೋಂದು ಇತ್ತೆರಾ, ಇಚ್ಚಾ; ಬೇತೆ ಎಂಚಿನ ಕಸುಬು ಮಲ್ಟೊಂದಿತ್ತೆರ್ಂದ್ ತೆರಿದ್ ಬರ್ಪುಜೆ. ಈ ದೇವರಾಜಯ್ಯರ್ ಶೃಂಗೇರಿದಂಚಿದ ಪೊಣ್ಣನ್ ಮದ್ದೆ ಆದಿತ್ತರ್. ಬುಡೆದಿನ ಪುದರ್ ಯಶಸ್ವತೀಂದ್, ಕುಸುಮಮ್ಮಂದ್ ಕಾದಂಬರಿ ಬರೆಯಿನಕ್ಲ ಪಂತೆರ್. ಎಡೆ ಆಚಾರ-ವಿಚಾರ ಇತ್ತಿನ ಈ ಸಂಸಾರೊಡು ಮೋಕೆದ ಮಲ್ಲ ಮಗ ಆದ್ ರತ್ನಾಕರ ಪುಟ್ಟಿ. 'ರತ್ನಾಕರ' ಪಂಡ ನವರತ್ನೋಲೆನ್ ಉಲಾಯಿ ದಿಂಚಾವೊಂದಿಪ್ಪನ ಮಲ್ಲ ಸಮುದ್ರಾಂದ್ ಅರ್ಥ. ರತ್ನಾಕರಡ್ ಬೊಕ್ಕ ಪುಟ್ಟಿನಾಲ್ ಆಯನ ತಂಗಡಿ ಮರುದೇವಿ.

ದೇವರಾಜಯ್ಯರ್ ನೆರೆ-ಕರೆಟ್ ಲಿಂಗಾಯಿತೆರ್ ಇಲ್ಲ ಇತ್ತೆಂಡ್ಂದ್, ಆ ಇಲ್ಲದ ಪೊಂಚೊವುಲಾ ಶೃಂಗೇರಿದಂಚಿಡ್ಲೆ ಮದಿಮೆ ಆದ್ ಬತ್ತಿನಾಲ್ಂದ್, ಆ ರಡ್ಡೆ ಇಲ್ಲದಕ್ಕಲ್ಲಾ ಭಾರೀ ಎಡ್ಲೆ ಇತ್ತೆಂಡ್ಂದ್, ಆ ಕೈತಲ್ಲ ಲಿಂಗಾಯಿತೆರ್ ಇಲ್ಲಡ್ ರತ್ನಾಕರನನೇ ಪ್ರಾಯೊದ ಗಿರಿಜೆ ಪನ್ನಿ ಒರ್ತಿ ಪೊಣ್ಣು ಬಾಲೆ ಇತ್ತೊಲುಂದು; ರತ್ನಾಕರ, ಮರುದೇವಿ, ಗಿರಿಜೆ - ಮೊಕ್ಕು ಮೂಜಿ ಜನಲಾ ಏಪಲಾ ಒಟ್ಟುಗು ಸೇರೊಂದು ಗೊಬ್ಬೊಂದು ಮೋಕೆಡಿತ್ತೆರ್ಂದ್ ಕಾದಂಬರಿ ಬರೆಯಿನಕ್ಲ ತೆರಿಪಾವೆರ್. ರತ್ನಾಕರಗ್ ಒಂತೆ ಪ್ರಾಯ ಆನಗ ಬರವು ಕಲ್ಪೆರಂದ್ ಬೆದ್ದದ ಜೈನ ಮಠೊಕ್ಕು ಪೋವರ ಸುರುಮಲ್ಲೆ. ಅಲ್ಲ ಎಡ್ಲೆ ತೆರಿದನ ಶಾಸ್ತ್ರಿಯ ಊರ್ದ ಜೈನರೆ ಜೊಕ್ಕೆನ್ ಒಟ್ಟು ಸೇರಾವೊಂದು ಬರವು ಕಲ್ಪಾವೊಂದಿತ್ತೆರ್. ಅಪಗ ಇತ್ತದ ಲೆಕ ಸ್ಲೇಟ್, ಕಡ್ಡಿ ಪೆನ್, ಪೆನ್ಸಿಲ್, ಕಾಗಜಿ ಇಚ್ಚಾಂದಿನ ಕಾಲ. ತೆರಿದನಕ್ ದಾಲ ಗ್ರಂಥೊ ಮಿನಿ ಬರೆವೊಡುಂದಾಂಡ ತಾರಿದೋಲೆದ ಮಿತ್ತ್ ಕರ್ಮೊದ ಕಂಠೊಡು ಬರೆವೊಂದಿತ್ತೆರ್. ಆ ಪೊರ್ತುಡು ಜೊಕ್ಕೆಗ್ ಅರಿಟ್ ಪೊಯ್ಯೆಡ್ ಬಿರೆಲ್ ತಿರ್ಗಾದ್ ಅಕ್ಷರ ಕಲ್ಪಾವೊಂದಿತ್ತೆರ್. ಆ ಪೊರ್ತುಡು ಅಂಚಿನೆ ಬರವು ಕಲ್ಪೆ. ಅಪಗ ಇಲ್ಲ ಇಲ್ಲಡ್, ಮಠೊಟ್ಟು ಮಾತ ಪುರಾಣ ಓದುನ ಕ್ರಮ ಇತ್ತೆಂಡ್. ಶಾಸ್ತ್ರಿಯಲಾ ಜೊಕ್ಕೆಗ್ ಪುರಾಣ ಓದು ಪನೊಂದಿತ್ತೆರ್; ಅಂಚಿನೆ ಮಠೊಟ್ಟು ಸ್ವಾಮಿಯಲಾ ಜನೊಕ್ಕೆಗಾತ್ರ ಪುರಾಣ ಓದೊಂದು, ಓದ್ಪಾವೊಂದು ಇತ್ತೆರ್. ರತ್ನಾಕರ, ಇಲ್ಲಡ್, ಮಠೊಟ್ಟು ಈ ಪುರಾಣ ಓದುನೊಲ್ಲಾ ಕೇಂಡ್ ಮಲ್ಲ ಬರ್ಸೆ ಆಯೆ. ಆಯಗ್ ಜೈನ ಪುರಾಣೊದ ಮಿತ್ತ್, ಕಾವ್ಯದ ಮಿತ್ತ್ ಎಡ್ಲೆ ರುಚಿ ಪುಟ್ಟುಂಡ್. ಐಟ್ಲಾ ಆಯಗ್ ಮಸ್ತ್ ಕುಸಿ ಕೊರಿನ್ಯ ಕಾವ್ಯ ಪಂಡ 'ಆದಿಪುರಾಣ'. ಐತ ಉಲಾಯಿಡ್ ಬರ್ಪುನ ಭರತ-ಬಾಹುಬಲಿನ ಕತೆನ್ ರತ್ನಾಕರ ಮನಸ್ ದೀದ್ ಮೋಕೆಗ್ ಕೇಂಡ್ ದಿಪ್ಪೊಡು.

ಉಂದ್ವೇ ಪೊರ್ತುಡು ನೆನೆತ್ತೊನೊಡಾಯಿನ ನನೊಂಜಿ ಸಂಗತಿ ಪಂಡ, ಉಂದು ಹರಿದಾಸರೆನಕ್ಲ ಕಾಲ. ಬೆದ್ದಡ್ಲಾ ವಿಷ್ಣುಭಕ್ತರಾಯಿನ ಹರಿದಾಸರೆಕ್ಲ 'ಕೀರ್ತನೆ' ಪನ್ನಿ ಭಜನೆಲೆನ್ ಪಂಡೊಂದು ಊರುಡು ತಿರ್ಗೊಂದಿತ್ತೆರ್ಂದ್ ತೋಜುಂಡು. ಅಪಗ ಪದ ಪನೊಂದು ಪೋಪಿನ ದಾಸರೆಕ್ಲ ಪಿರಾವುಡ್ ಭಜನೆಲೆನ್ ಕೇನೊಂದು ರತ್ನಾಕರ ಪೋವೊಂದಿತ್ತೆಂದ್ ಕಾದಂಬರಿ ಬರೆಯಿನಕುಲು ಪಂತೆರ್. ಉಂದು ಸತ್ಯಾಂದೆ ಪನೊಲಿ. ದಾಯೆ ಪಂಡ ಇಂಚ ದಾಸರೆ ಪಿರಾಡ್ ತಿರ್ಗಿನ ರತ್ನಾಕರಗ್ "ಆಧ್ಯಾತ್ಮ ಗೀತಲು" ಪನ್ನಿ ಭಜನೆ ಪದ್ಯೊಲೆನ್ ಬರೆವರ ಸ್ಫೂರ್ತಿಯಾಂಡ್ಂದ್ ತೋಜುಂಡು. ಹರಿದಾಸರೆ

ಪೊರ್ಲುಡ ಕೀರ್ತನೆಲು ಆಯನ್ ಮರ್ಲ್‌ಕಟ್ಟಾಡ್ ತಾನ್‌ಲಾ ಅಂಚಿನನೆ ಪದ್ಯೊಲೆನ್ ಬರೆವೊಡು ಪನ್ನಿ ಆರ್ತಿ ಪುಟ್ಟಾಡಿಪ್ಪೊಡು. ದುಂಬೆ 'ಆದಿಪುರಾಣ'ದಂಚಿನ ಕಾವ್ಯೊಲೆನ ಪೊರ್ಲು-ತಿರ್ಲ್ಗ್ ಮರ್ಲ್‌ದಾನ ಆಯೆ ಪಗಲ್‌ಡ್ ದಾಸೆರ್ ಪದ್ಯೊಲೆನ್ ಕೇಂದ್, ರಾತ್ರೆ ಕುಲೋಂದು ಅಂಚಿನನೇ ಪದ್ಯೊಲೆನ್ ಬರೆದಿಪ್ಪೊಡು.

ನೆಕ್ಕು ಒತ್ತು ಕೊರ್ಪುಲೆಕ್ಕ ರತ್ನಾಕರೆ ಎಲ್ಲಿಡೇ ಕಾವ್ಯರಚನೆದ ಬಗ್ಗೆ ಮಸ್ತ ಉಮೇದ್ ತೋಜಾದಿತ್ತೆ; ಐತ ಬಗ್ಗೆ ದಿಂಜ ವಿಷಯೊಲೆನ್ ತೆರಿಯೊನ್ನ ಪ್ರಯತ್ನ ಮಲ್‌ದಿತ್ತೆಂದ್ ತೆರಿದ್ ಬರ್ಪುಂಡು. ಎಂಚ ಪಂಡ ದೇವಚಂದ್ರ ರಾಜಾವಳಿ ಕಥೆಟ್ ಪಂಡಿಲೆಕ್ಕ 'ರತ್ನಾಕರೆ ಎಲ್ಲಿಡೇ ಕಾವ್ಯಾಲಂಕಾರ ಲಕ್ಷಣ ಶಾಸ್ತ್ರಲೆಡ್ ದಿಂಜ ಬಿಸ್ ಆದ್, ಸಾರತ್ರಯೊಕ್ಕು ಕೇಶವ ವರೈರ್ ಬರೆಯಿನ ವ್ಯಾಖ್ಯಾನೊಲೆನ್ನಾ, ಕುಂದ ಕುಂದಾಚಾರೈರ್ ಆಧ್ಯಾತ್ಮ ಸಿದ್ಧಾಂತೊಲೆಗ್ ಪ್ರಭೇಂದು ಬರೆಯಿನ ಟೀಕೆಲೆನ್ನಾ, ಸಮಾಧಿ ಶತಕ ಏಕಸಪ್ತತಿ ಸ್ವರೂಪ-ಸಂಬೋಧನೆ ಇಂಚಿತ್ತಿ ಮಸ್ತ ಓದುದು ಮಲ್ಲ ಆಗಮ ಗ್ರಂಥೊಲೆನ್ನಾ ಎಡ್ಡೆ ಮನಸ್‌ದೀಡ್ ಮಲ್ಲ ಕವಿ ಆಯೆ.' ನೆಡ್ ಎಲ್ಲಿಡೇ ಆಯಡ ಇತ್ತಿನ ಬರವುದ ಬಿಸಾಡಿಗ ತೋಜಿದ್ ಬರ್ಪುಂಡು.

ನನಲಾ ಒಂಜಿ ತಿಳುವಳಿಕೆದ ಪ್ರಕಾರ ರತ್ನಾಕರೆ ಜವನಾದಿಗ್ ಬರ್ಪುನ ಆ ಪೊರ್ತುಡು ಎಡ್ಡೆ ರಾಗೊಡ್ ಪನೊಲಿಯಾಯಿನ ಕೀರ್ತನೆಲು ಆತ್ತಂದೆ, ಭರತೇಶ ವೈಭವದ ಪ್ರತಿ ಸಂಧಿದ ಸುರುಟ್ಟು ತಿಕ್ಕುನ 'ನಿರಂಜನ ಸ್ತುತಿ' ಪನ್ನಿ ಪೊರ್ಲುಡ ಸಾಂಗತ್ಯ ಪದ್ಯೊಲೆನ್ನಾ ಬರೆದಿಪ್ಪೊಡುಂದ್ ತೆರಿನಕ್ ಪಂತರ್. ದಾಯೆ ಪಂಡ ಆ ಪೊರ್ತುಗು ರತ್ನಾಕರನ ಮಸ್ತ ಪದ್ಯೊಲೆನ್ ಬೆದ್ರದ ಇಲ್ಲ ಇಲ್ಲಡ್ ಪನೊಂದಿತ್ತೆಂದ್ ತೆರಿದ್ ಬರ್ಪುಂಡು. ಅಂಚ ಪನೊಡುಂದಾಂಡ ಅವು ಈ ಕೀರ್ತನೆ ಬೊಕ್ಕ ನಿರಂಜನ ಸ್ತುತಿಕ್ಕಲೇ ಆದಿಪ್ಪೊಡು. ಒಟ್ಟಾರೆ ರತ್ನಾಕರೆ ಆ ಪೊರ್ತುಗು ಆಯನ ಪೊರ್ಲುಡ ಕಾವ್ಯೊಲೆಡ್‌ದಾತ್ರ ಊರುಡು ಎಡ್ಡೆ ಪುಗರ್ತೆ ಪಡೆಯೆ. ಕೆಲವು ವಿದ್ವಾಂಸೆರ್‌ಕುಲು ರತ್ನಾಕರನ ಶತಕೊಲೆಡ್ ಒಂಜಾಯಿನ, ಬೇತೆಕ್ಲೆಗ್ ತಾರ್ಕಣೆ ಮಲ್ತಂಡ ಆತ್ ಎಡ್ಡೆಂದ್ ಪನರೆ ಆವಂದಿನ 'ತ್ರಿಲೋಕ ಶತಕ' ಪನ್ನಿ ಕಾವ್ಯೊನು ಈ ದಿನೊಕ್ಕೆಡೇ ಬರೆದಿಪ್ಪೊಡೊಂದ್ ಪನ್ನೆರ್. ಅಂತೂ ಎಲ್ಲಿಡೇ ಆಯೆ ಮಲ್ಲ ಕವಿ ಆಪುನ ಲಕ್ಷಣ ತೋಜಿದ್ ಬತ್ತಂಡ್ ಪನ್ನಿನವು ಸತ್ಯ.

ಬೆದ್ರದ ಏಳೊನೊದು ಜೈನೆರ್ ಇಲ್ಲಲೆಡ್ ದಿನೊಲಾ ಬೈಯದ ಪೊರ್ತುಗು ರತ್ನಾಕರನ ಪದ್ಯೊಲು ಕೇನರೆ ಸುರುವಾಂಡ್. ಆಯಗ್ ಬಾರೀ ಮೋಕೆದ ಸಾಂಗತ್ಯೊಲಂತೂ ಏರಾಂಜ್ ಪನೊಂದಿತ್ತನ್ನೆನ ಕೇಂಡ, ಒರ ಅಡೇಗೆ ಬತ್ತದ್ ಕೇನ್ ಪನ್ನಿನ ರೀತಿದ ಪದ್ಯೊಲು. ಅಂಚಾದ್ ಅಂಚಿನ ಪದ್ಯೊಲೆಡ್‌ದಾತ್ರ ಕವಿ ರತ್ನಾಕರನ ಪುದರ್ ಊರುಡು ಮಾತ್ರ ಆತ್ ಪರಊರುಡ್ಲಾ ಪರಡ್‌ಂಡ್. ಕಾರ್ಲದ ಅರಸುಲೆನ ಕೆರಿಕಾ ಮುಟ್ಪೊಡ್.

ಆ ಪೊರ್ತುಡು ಕಾರ್ಲದೂರುಲಾ ಬೆದ್ರದ ಊರ್ದಲೆಕ್ಕನೇ ಪದಿನೆಣ್ಣು ಬಸದಿಲೆಡ್‌ದಾತ್ರ ಒಂಜಿ ಪುಣ್ಯಾದಿಗಿದ ಕ್ಷೇತ್ರ ಆದಿತ್ತೆಂದ್. ಆತೆ ಅತ್ತಾಂದೆ ಅವು ಭೈರವ

ಅರಸೆರ್ ರಾಜಧಾನಿ ಆದಿತ್ತಾಂಡ್. ರತ್ನಾಕರೆ ಬೆದ್ರಡ್ ಪುಗರ್ತೆ ಪಡವೊಂದಿತ್ತಿನ ಪೊರ್ತುಡು, ಕಾರ್ಲಡ್ ಚಂದ್ರವಂಶದ ಇಮ್ಮಡಿ ವೀರಭೈರವರಸೆ ಆಡ್ಲೆ ಮಲ್ತೊಂದಿತ್ತೆ. ಆಯಗ್ ಬೆದ್ರದ ಸೂರ್ಯವಂಶದ ರಾಜಮನೆತನೊಕ್ಕು ಸೇರಿನ ದೇವರಾಜಯ್ಯರೆನ ಮಗ ರತ್ನಾಕರನ ಬರವುಡು ಬಿಸಾರ್ಲದಿಗ್ ಸುದ್ದಿ ತಿಕ್ಕುಂಡ್. ಆಯನ್ ರಾಜ ಓಲಗ ಚಾವಡಿಗ್ ಲೆಪುಡಾದ್ ಇಸಯೋ ತೆರಿಯೊಂಡೆ. ರತ್ನಾಕರನ ಕಾವ್ಯ ಪ್ರತಿಭೆನ್ ಕಣ್ಣಾರ ತೂಯಿನ ಭೈರವ ರಾಜೆ ಆಯನ್ ಕಾರ್ಲದ ಅರಮನೆಟ್ 'ಆಸ್ಥಾನ ಕವಿ' ಆವೊಡುಂಡ್ ಕೇಂಡೆ. ಬೆಚ್ಚ ನತ್ತೆರ್ದ ಉಲ್ಲೆಸ ಉರ್ಕುನ ಜವನೆ ರತ್ನಾಕರೆ, ಉಂದು ಪದ ಬರೆವರೆ ಒಂಜಿ ಎಡ್ಡೆ ಅವಕಾಶಾಂಡ್ ಎನ್ದ್ ಒತ್ತೊಂಡೆ. ಕಾರ್ಲ ಸೇರೊಂಡೆ.

ಇತ್ತೆ ಆಯನ ಕಾವ್ಯ ಬರೆಪ್ಪುನ ಉಮೇದ್ ರೆಂಕೆ ಬತ್ತಲೆಕ್ಕ ಆಂಡ್. ಎಡ್ಡೆ ಜಾಗೆಡ್ ಆಯನ ಬಿಸಾರ್ಲದಿಗ್ ಒಂಜಿ ಎಡ್ಡೆ ನಿಲೆ-ಬಿಲೆ ತಿಕ್ಕುಂಡ್. ಅವು ಆಯನ ಯೋಗ್ಯತೆಡ್ಲ ಆಯಗ್ ತಿಕ್ಕಿನ ಮಾನಾದಿಗ್ ಅತ್ತಂದೆ ಬೇತೆ ದಾಲಾ ಅತ್ತಂಡ್ ಪನೊಲಿ. ಇಪ್ಪಡ್, ಅಂತೂ ದುಂಬೇ ಪದ್ಯ ಬರೆಪ್ಪುನು ಪಂಡ ಮಸ್ತ ಕುಷಿ ಪಡವೊಂದಿತ್ತಿನ ರತ್ನಾಕರಗ್ ಇತ್ತೆ ಅವ್ಲೇ ಬೇಲೆ ಆಂಡ್. ಆಸ್ಥಾನ ಕವಿಯಾಯಿನ ಈ ಪೊರ್ತುಡು ಆಯೆ ಇತೊರ್ತು ಮಲ್ತೊಂದಿತ್ತಿನ ಪೊಡಿ ಬರವಣಿಗೆ ಬುಡುಡು, ದಾದಾಂಡ್ಲ ಮಲ್ಲಗ್ಗಂಥ ಬರೆವೊಡುಂಡ್ ಯೋಚನೆ ಮಲ್ತಿಪ್ಪೊಡು. ಅಪಗ್ ಆಯಗ್ ಮರೊಟ್ಟು ಇಲ್ಲಡ್ ಎಲ್ಲಿಡೇ ಕೇನ್ನ 'ಆದಿಪುರಾಣ' ನೆನಪಾದಿಪ್ಪೊಡು. ಐಟ್ಲಾ ಆಯಗ್ ಬಾರಿ ಅರ್ತಿ ಆಯಿನ ಭರತ ಚಕ್ರವರ್ತಿನ್ ದುಂಬುದೀವೊಂದು, ಪೊಸ ರೀತಿಡ್ ಕಾವ್ಯ ಬರೆವೊಡುಂಡ್ ಮನಸ್ ಮಲ್ತದಿಪ್ಪೊಡು. ಅಂಚೆ ಈ ಪೊರ್ತುಡು ಆಯೆ 'ಭರತೇಶ ವೈಭವ' ಬರೆಯೆರೆ ಸುರು ಮಲ್ತಂದ್ ಪನೊಲಿ. ದಾಯೆ ಪಂಡ 'ಭರತೇಶ ವೈಭವ' ಬರೆಯೆರೆ ಏಪ ಸುರುಮಲ್ತಂದ್ ಸರಿಯಾದ್ ಗೊತ್ತಿಜ್ಜಿ ಕೆಲವೆರ್ ಆಯೆ ಆಸ್ಥಾನ ಕವಿ ಆಯಿಬೊಕ್ಕ ಬೆದ್ರಗ್ ಪೋಡು, ಔಲು ವಿಜಯಣ್ಣ ಕವಿನ 'ದ್ವಾದಶಾನುಪ್ರೇಕ್ಷೆ' ಪನ್ನಿ ಗ್ರಂಥೊನು ಆನೆದ ಮಿತ್ತ್ ದೀದ್ ಮೆರವಣಿಗೆ ಮಲ್ತೊಂದಿಪ್ಪುನೈನ್ ತೂದ್ ಎಂಕ್ಲಾ ಅಂಚೆನ ಮಾನಾದಿಗ್ ತಿಕ್ಕೊಡುಂಡ್ 'ಭರತೇಶ ವೈಭವ' ಬರೆಯೆಂಡ್ ಕೆಲವುದಕ್ಕು ಪನ್ನೆರ್. ಬೊಕ್ಕ ಕೆಲವುದಕ್ಕು ಆಯೆ ಜೈನಧರ್ಮ ಬುಡ್ಲ ಘಟ್ಟಗ್ ಪೋಯನಲ್ಪ ಬೇತೆ ಶೈವಗ್ರಂಥ ಮೆರವಣಿಗೆ ಮಲ್ಪುನೈನ್ ತೂದ್, ಐಟ್ ದಾಲಾ ರಸ ಇಜ್ಜಿಂದ್ ಪಂಡ್, ಐಕ್ ಸವಾಲಾದ್ ರಸವತ್ತಾಯಿನ 'ಭರತೇಶ ವೈಭವೊ'ನು ಬರೆಯೆಂಡ್ ಪನ್ನೆರ್. ಕಾದಂಬರಿಕಾರರೆಕ್ಕು ಆಯೆ ಆಸ್ಥಾನ ಕವಿಯಾಯಿನ ಪೊರ್ತುಡೇ ಬರೆಯಿನ ನಿರಂಜನ ಸ್ತುತಿನ್ ದುಂಬು ದೀವೊಂದು ಪೊರ್ಲುದ ರಾಗೊಡು ಪನೊಲಿಯಾಯಿನಂಚಿತ್ತಿನ 'ಸಾಂಗತ್ಯ' ಶೈಲಿಡ್ ಭರತೇಶ ವೈಭವೊನು ಬರೆಯೆ. ಉಂದುವೇ ಪೊರ್ತುಡು ಆಯೆ ಈ ಕಾವ್ಯೊನು ಬರೆಯೆಂಡ್ ಪನರೆ ನನವೊಂಜಿ ಕಾರಣ, ಐಟಿತ್ತಿನ ಶೃಂಗಾರ ವರ್ಣನೆ. ಅವು ಆಯೆ ಅಲ್ಪ ರಾಜಕುಮಾರಿನ್ ಮೋಕೆ ಮಲ್ತನ್ನೆತ್ತ ಫಲಾಂಡ್ ಮಸ್ತಜನ ಪನ್ನೆರ್.

ಬಹುಶಃ ಇಂಚೆ ಆದಿಪ್ಪೊಡು. ಆಸ್ಥಾನ ಕವಿ ರತ್ನಾಕರ ರಾಜನ ಓಲಗ ಚಾವಡಿಡ್ ಅಪಗದ ಕ್ರಮೋತ್ತಲೆಕ್ ತಾನ್ ಬರೆಯಿನ ಕಾವ್ಯೋಲೆನ್ ಓದುದಿಪ್ಪೊಡು. ಐನ್ ಕೇಂಡ್ ರಾಜೆಲಾ ಬೆರಿ ಬೊಟ್ಟೊಂದಿತ್ತೆ. ಉಂದು ಪೂರಾ ಮಸ್ತಜನ ಆಯನ್ ಮೆಚ್ಚುಲೆಕ್ ಆಂಡ್. ಐಟ್ಲಾ ಇಮ್ಮಡಿ ವೀರಭೈರವನ ಮಗಲೆಗ್ ರತ್ನಾಕರನ ಕಾವ್ಯೊಡ್ಲಾ, ಬರೆಯಿನ ಆಯನ ಮಿತ್ತಲಾ ಮಸ್ತ ಮೋಕೆ ಪುಟ್ಲಾಂಡ್. ಅಂಚೆನೆ ಆ ರಾಜಕುಮಾರಿ ಶಾಂತಲೆಲಾ ಎಡ್ಡೆ ಚಿತ್ರ ಕಲಾವಿದೆ ಆದಿತ್ತೊಲುಂದ್ ಕಾದಂಬರಿಕಾರೆರ್ನಕ್ ಪಂತರ್. ಅಂಚೆ ರಾಜಕುಮಾರಿ ಬುಡ್ಡಾಯಿನ ಚಿತ್ರಲಾ, ಐನ್ ಬುಡ್ಡಾಯಿನ ಆಲ್‌ಲಾ ರತ್ನಾಕರಗ್ ಪೊರ್ಲು ತೋಜಿಯೆರ್. ಒಟ್ಟಾರ್ ಎಡ್ಡೆ ಬಿಸ್ಪಾದಿಗದ ಅಕ್ಲೆ ಇರ್ವೆರಾ ಒರೈನೊರಿ ಮೆಚ್ಚೊಂಡರ್. ಬೊಕ್ಕ ಅವ್ವೇ ಮೋಕೆಡ್ ಅಕ್ಲೆ ಅಪಗಪಗ ತಿಕ್ಕದ್ ಪಾತೆಯಿರ ಸುರುಮಲ್ತರ್. ಉಂದು ಭರತೇಶ ವೈಭವೊದ ಶೃಂಗಾರ ವರ್ಣನೆಗ್ ಶಕ್ತಿ ಕೊರುಂಡು.

ರಾಜಗ್ ಆಸ್ಥಾನೊಡು ರತ್ನಾಕರನ ಶೃಂಗಾರ ವರ್ಣನೆದ ಪದ್ಯೊಲೆನ್ ಕೇಂಡ್ ಭಾರೀ ಕುಸಿಯಾದಿಪ್ಪೊಡು. ಐಕಾತ್ರ ಆಯೆ ಇಂಬ್ಯಗ್ 'ಶೃಂಗಾರ ಕವಿ ಹಂಸರಾಜ' ಪಂಡ್ ಬಿರುದು ಕೊರ್ದು, ಮಾನಾದಿಗಲಾ ಮಲ್ತೆ. ಇಜ್ಜಿ ಈ ಬಿರುದುನು ಬೆದ್ರದ ಪಂಡಿತ ಮಂಡಲಿಡ್, ಗುರು ಮಾಹೇಂದ್ರ ಕೀರ್ತಿ ಕೊರ್ಪಾಯೆರ್‌ಂದ್ ರಾಮೋ ವಿಶ್ವಾಮಿತ್ರರ್ ಆರ್ ಕಾದಂಬರಿಡ್ ಬರೆತ್ತರ್. ಇಪ್ಪಡ್, ಅಂತೂ ಆಯನ ಬರವುಗು ಸರಿಯಾಯಿನ ಪುಗರ್ತೆ ಪಡೆಯಿನ ರತ್ನಾಕರ ರಾಜನ ಒರ್ತಿಯೇ ಮಗಲೆ ಶಾಂತಲೆಗ್ ಮಸ್ತ ಕೈತಲಾಯೆ. ಆಲ್ ಆಯನ ಎಡ್ಡೆ ಪದ್ಯೊಲೆಗ್ ಪೊರ್ಲು ರಾಗ ಪಾಡ್ಲಾಲಾ ಪನೊಂದಿತ್ತೊಲುಗೆ. ಆಯೆ ಆಲೆನೆ ಚಿತ್ರೋಲೆನ್ ಪುಗರೊಂದಿತ್ತೆಗೆ. ಇಂಚೆ ರಾಜಕುಮಾರಿನ ಸಹವಾಸೊಡು ಇತ್ತಿನ ರತ್ನಾಕರನ ಬರವುಡ್ಲಾ, ಬದ್‌ಕಡ್ಲಾ 'ಶೃಂಗಾರ' ಮಿತಿ ಮೀರ್ಡ್ ಪೋಂಡು. 'ಭರತೇಶ ವೈಭವ' ಅಯ್ಯಯ್ಯ ಎಂಚ ಪೊರ್ಲಾಂಡ್ ಪನ್ನುನಲೆಕ್ ಆಂಡ್.

'ರಾಜಾವಳಿ ಕಥೆ' ಬರೆಯಿನ ದೇವಚಂದ್ರನ ಪ್ರಕಾರ ಉಂದುವೇ ಪೂರ್ತುಡು ರತ್ನಾಕರ 'ಯೋಗ' ಸಾಧನೆಲಾ ಮಲ್ತೊಂದಿತ್ತೆ. ಯೋಗೊಗು ಸಂಬಂಧಪಟ್ಟಿನ ಮಸ್ತ ಶಾಸ್ತ್ರ ಗ್ರಂಥೊಲೆನ್ ಆಯೆ ಓದುಡ್ ತೆರಿಯೆ. ಯೋಗೊದ ಬಗಟ್ ಆಯಗ್ ಎಡ್ಡೆ ತಿಳುವಳಿಕೆ ಇತ್ತೊಂಡ್ ನಮಕ್ಕ ಭರತೇಶ ವೈಭವೊಡ್ಲಾಲಾ ತೆರಿಡ್ ಬರ್ಪುಂಡು. ಇಂಚೆ ರತ್ನಾಕರನ ಯೋಗ ಸಾಧನೆ ಓಡೆಮುಟ್ಟು ಮುಟ್ಟುಡು ಪಂಡ, ಆಯೆ ಐಡ್‌ದಾತ್ರ 'ದಶವಾಯು ಸಿದ್ಧಿ' ಪನ್ನಿನ ವಿದ್ಯೆನ್ ಕೈವಶ ಮಲ್ತೊಂಡೆ. ಪಂಡ ಆಯೆ ನಿಲತ್ತ ಮಿತ್ತ ಮಾತ್ರ ಅತ್ತಾದೆ ಗಾಳಿಡ್ ಓಡೆ ಬೋಡಾಂಡ್ಲಾ ಪೊವರ-ಬರಿಯರ ಕಲ್ತೊಂಡೆ. ಗಾಳಿ ಪೋಯಿನಲ್ಲ ಪೂರ ಪೋದು-ಬರ್ಪಿನಂತಿತ್ತಿನ ವಿದ್ಯೆ ಅವು. ಉಂದೆನ್ ಆಯೆ ಒಂಜಿ ಸರ್ತಿ ಬೆದ್ರಗ್ ಪೋಯಿನ ಪೂರ್ತುಡು ಅಂಚೆನೆ ಕುಡ್ಲದಂಚಿ ಪೋನಗ, ಅಲ್ಪ ಒರಿ ಸನ್ಯಾಸಿಡ್ಲಾ ಈ ದಶವಾಯು ಸಿದ್ಧಿ ವಿದ್ಯೆನ್ ಪಡೆಯೆಂದ್ 'ರತ್ನಾಕರ' ಕಾದಂಬರಿ ಬರೆಯಿನಕ್ ಪಂತರ್. ಅಕುಲು ಪನ್ನಿ ಪ್ರಕಾರ ರತ್ನಾಕರ ಬೆದ್ರದ ಇಲ್ಲಡೆ ಪೋನಗ, ಆಯನ ಕೈತಲ್ದ ಇಲ್ಲದ ಲಿಂಗಾಯಿತೆರೆ ಸಂಸಾರದ

ಗಿರಿಚೆಗ್ ಹಿರಿಯಾಕ್ಲ ಮದಿಮೆ ಮಲ್ತರೆ ಪ್ರಯತ್ನ ಮಲ್ತನ ಸುದ್ದಿ ಅಂಚೆನೆ ಆಲ್ ಮದ್ದೆ ಬೊಡ್ಡಿಂದ್ ಪಂಡ್ ಪಂಡ್ 'ಶಿವದೀಕ್ಷೆ' ಗೆತೊಂದು ಗಟ್ಟದ ಮಿತ್ತಾದ ಬಾಳೆಹೊನ್ನೂರುದ ರಂಬಾಪುರಿ ಮತೊಕ್ಕು ಪೋಯೊಲು ಪನ್ನಿ ಸುದ್ದಿ ತೆರಿಯೆ. ಎಲ್ಲಿಡ್ಲಿಂಚ ಒಟ್ಟುಗು ಮೋಕೆಡ್ಲಿನ ಗಿರಿಚೆಗ್ ಇಂಚ ಆಂಡತ್ತ ಪಂಡ್ ಬೇಜಾರ್ ಮಲ್ತನ ರತ್ನಾಕರೆ ಅಲ್ತಡ್ಲ ಸೀದಾ ಕುಡ್ಲದಂಚಿ ಪೋಯೆ. ಗುರುಪುರತ್ತಲ್ಪ ಒರಿ ಸನ್ಯಾಸಿ ತಿಕ್ಕಾದ್, ಇಂಬ್ಯನ್ ಪಾತೆರ್ ಪಾದ್ 'ದಶವಾಯು ಸಿದ್ಧಿ' ವಿದ್ಯೆನ್ ಪಂಡ್ ಕೊರಿಯೆ. ಅವೆನ್ ಪತೊಂದ್ ರತ್ನಾಕರೆ ಕಾರ್ಲಗ್ ಬತ್ತೆ. ಉಂದು ಕಾದಂಬರಿಡ್ ತಿಕ್ಕನ ವಿವರ. ಸತ್ಯನಾ ಸುಳ್ಯಂದ್ ತೆರಿಯಂದ್. ಅಂತೂ ಇಂಚಿನ ಒಂಚಿ ವಿಶೇಷ ವಿದ್ಯೆದ ಸಿದ್ಧಿ ಆಯ್ಗ್ ತಿಕ್ಕದಿತ್ತಂಡ್ ಪನ್ನಿನವು ಸತ್ಯ ಇಪ್ಪೊಡು.

'ದಶವಾಯು ಸಿದ್ಧಿ' ವಿದ್ಯೆನ್ ತನ್ನ ಮೋಕೆದ ವ್ಯವಹಾರೊಗು ಉಪಯೋಗ ಮಲ್ತೊಂಡೆ. ಪೆಗಲ್ ಪಡ್ ಮಾತ್ರ ಅತ್ತಂದೆ ರಾತ್ರೆಡ್ಲಾ ರಾಜಕುಮಾರಿನ ಉಪ್ಪರಿಗೆಗ್ ಏರೆಗ್ಲಾ ತೆರಿಯಂದಿಲೆಕ್ಕ ಪೋದ್ ಬರಿಯರ ಸುರುಮಲ್ಲೆ. ಬಾಕಿಲ್ ಪೋದು ಗವಾಕ್ಷಿಡ್ ಪಿದಾಯಿ ಬರೊಂದಿತ್ತೆಗೆ. ಇಂಚ ಆಯನ ಬದ್ ಕಡ್ಲಾ 'ಭರತೇಶ ವೈಭವ'ದ ಬರವುಡ್ಲಾ ಶೃಂಗಾರ ಉರ್ಕುಂಡು. ಉರ್ಕಿನವು ತಮಲೊಡತ್ತೆ. ರತ್ನಾಕರನ ಜೀವನೊಡ್ಲಾ ಅಂಚಿನವೆ ಪೂರ್ತು ಬತ್ತಂಡ್. ಆಯೆ ಕಾರ್ಲಗ್ ಬತ್ತಾದ್ ಆಸ್ತಾನ ಕವಿಯಾದ್ ಬೇಗೊಡೇ ಎಡ್ಲೆ ಪುಗರ್ತೆ ಪಡೆಯಿನ್ನೆನ್ ತೂಯಿನ ಕೆಲವುದಕ್ಲೆಗ್ ಆಯನ ಮಿತ್ತ್ ಕಿಚ್ಚಿ ಆದಿಪ್ಪೊಡು. ಎಂಚಾಂಡ್ಲೆ ಆಯನ್ ತಿರ್ತ್ ಬೂರಾವೊಡು, ಆಯನ ತಪ್ಪುನು ನಾಡ್ಲೆ ಪತ್ತೊಡುಂದು ಅಕ್ಕು ನಾಡೊಂದಿತ್ತೆರ್. ಅಪಗ ಅಕ್ಲೆಗ್ ರತ್ನಾಕರೆ ರಾಜಕುಮಾರಿನೊಟ್ಟುಗು ರಾತ್ರೆ-ಪೆಗಲ್ ಮೋಕೆಡ್ ಮೆಯ್ ಮದವುನ ಸಂಗತಿ ತೆರಿಂಡ್. ಆಯಗ್ ಬುದ್ಧಿ ಕಲ್ಪಾವರ ಉಂದುವೆ ಸರಿಯಾಯಿನ ಸಂದರ್ಭ ಪಂಡ್ ಆಲೋಚನೆ ಮಲ್ತಾದ್, ರಾಜಗ್ ಒಂಚೆಕ್ ರಡ್ಲೆ ಸೇರ್ಸಾದ್ ದೂರು ಕೊರಿಯೆರ್. ಕಾದಂಬರಿಕಾರರೆಕ್ಲಲ್ ಪಂಡಿಲೆಕ್ಕ ಅಕುಲು ಸುರುಟ್ಟು ಕಾರ್ಲದ ಸ್ವಾಮಿಲೆಗ್ ತೆರಿಪಾದ್, ಆರೆನ ಮೂಲಕ ರಾಜಗ್ ತೆರಿಪಾಯೆರ್ಂದ್ ತೆರಿದ್ ಬರ್ಪುಂಡು. ಉಂದೆನ್ ಕೇನ್ಯೆ ಭೈರವ ರಾಜಗ್ ಭಾರೀ ಗರ್ವ ಬತ್ತಂಡ್. ಈ ಮಾತೆ ವಿಷಯೊಲೆನ್ ಕಾರ್ಲದ ಲಲಿತಕೀರ್ತಿ ಸ್ವಾಮಿಲೆಗ್, ಅಂಚೆನೆ ರಾಜಗ್ ತೆರಿಪಾದ್ ರತ್ನಾಕರನ್ ತಿಕ್ಕಾದ್ ಪಾಡುನೈಟ್ 'ದ್ವಾದಶಾನುಪ್ರೇಕ್ಷೆ' ಬರೆಯಿನ ಕವಿ ವಿಜಯಣ್ಣನ ಮಲ್ಲ ಕೈ ಇತ್ತಂಡ್ ಪಂದ್ ಕೆಲವುದಕ್ಲೆ ಪನ್ನೆರ್. ಆಂಡ ಆ ಪೂರ್ತುಡು ವಿಜಯಣ್ಣ ಇತ್ತಿಚೆ. ರತ್ನಾಕರಗ್ಲಾ ವಿಜಯಣ್ಣಗ್ಲಾ ನೂದು ವರ್ಸೊದ ವ್ಯತ್ಯಾಸ ಉಂಡುಂದು ತೆರಿನಕ್ಲೆ ಪಂತೆರ್. ಅವು ಎಂಚಿನಲ ಇಪ್ಪಡ್, ಅಂತೂ ರತ್ನಾಕರೆ ಪೂಣ್ಣ ಮೋಕೆಗ್ ಪೋದು ರಾಜನ ಕೈಟ್ ತಿಕ್ಕಾದ್ ಬೂರ್ನಿ ಅಂತು ಕಂಡಿತೆ.

ಮುಲ್ಪ ಆಲೋಚನೆ ಮಲ್ತೊಡಾಯಿನ ನನೊಂಚಿ ಸಂಗತಿ ದಾದ ಪಂಡ. ಮಸ್ತ್ ತೆರಿದ್ ರತ್ನಾಕರೆ ಇಂಚಿನ ಕೆಲಸ ಮಲ್ತದಿಪ್ಪರೆಲಾ ಯಾವು, ಮಲ್ಪಂದೆ ಇಪ್ಪರೆಲಾ ಯಾವು.

ದಾಯೆ ಪಂಡ ಏಪಲಾ ಪೋಣ್ಣ ಮೋಕೆಡ್ ಬೂರಿನಾಯೆ ಕುರುಡೆರ್ಲೆಕ್ಕ ಆಪೆರಂದ್ ಒಂಜಿ ಪಾತೆರ ಉಂಡು. ರತ್ನಾಕರಲಾ ಅಂಚ ಆದಿಪ್ಪೆ ಮೈ ಮದತ್ತಾದ್ ರಾಜಕುಮಾರಿ ಶ್ಯಾಮಲೆನ ಸಹವಾಸ ಮಲ್ತಾದಿಪ್ಪೆ. ಅತ್ತಾಂಡ ರತ್ನಾಕರ ಇಂಚ ದಾಲ ಮಲ್ತಂದೆ ಇಪ್ಪರಲಾ ಯಾವು. ದಾಯೆ ಪಂಡ ಸಮಾಜೊಡು ಮಲ್ತಾಕ್ ಇಲ್ಲದ ಪೋಣ್ಣ್ ರತ್ನಾಕರನಂಚಿನ ಒರಿ ಆಣ್ ಮೋಕೆ ಮಲ್ತಾದ್ ಕೈತಲ್ ಪೋವೊಡುಂದೇ ದಾಲ ಇಜ್ಜಿ ಸರೀಚೆ ಕಣ್ಣ್ ದೆರ್ತಾದ್ ಒಂತೆ ಜೋರುಡೆ ತೂಂಡಲಾ ಯಾವು. ಅವು ಮಾಮಲ್ಲ ತಪ್ಪು ಆವುಂಡು. ರತ್ನಾಕರನ ವಿಷಯೊಡು ಅಂಚ ಆದುಪ್ಪುರಾ ಯಾವು. ಅಂತೂ ರತ್ನಾಕರನ ಮಿತ್ತ ಆಸ್ಥಾನ ಕವೀಂದ್ ಪಂಡಾದ್, 'ಶೃಂಗಾರ ಕವಿ ಹಂಸರಾಜಾಂದ್' ಬಿರುದು ಕೊರಿನ ರಾಜಗೇ ಗರ್ವ ಬತ್ತಂಡ್.

ರಾತ್ರೋರಾತ್ರೆ ರತ್ನಾಕರ ರಾಜಕುಮಾರಿನೊಟ್ಟುಗು ಉಪ್ಪರಿಗೆಡುಪ್ಪುನ ಪೊರ್ತುಡು ಸಾಕ್ಷಿ ಸಮೇತ ರಾಜನ ಕೈಕ್ ತಿಕ್ಕಾದ್ ಬೂರೈ. ರಾಜಾವಳಿ ಕಥೆ ದೇವಚಂದ್ರ ಪಂಡಿ ಪ್ರಕಾರ ರಾಜನ ಕೈಟ್ ತಿಕ್ಕಾದ್ ಬೂರು ಬೇಜಾರಾದ್ (ಪೋಡಿಡ್, ಆಯಡ ಇತ್ತಿನ ದಶವಾಯುಸಿದ್ಧಿ ವಿದ್ಯೆದ ಬಲೊಟ್ಟು ತಪ್ಪಾದ್ ಪಾರ್ಲ ಪೋದು) ಆ ರಾತ್ರೆಡೇ ಸೀದಾ ಪೋದು ಆಯನ ಮೋಕೆದ ಗುರುಕುಲಾಯಿನ ಮಾಹೇಂದ್ರ ಕೀರ್ತಿಯೆರ್ಡ್ ಜೈನ ಧರ್ಮೋದ 'ಅಣುವ್ರತ ದೀಕ್ಷೆ' ದೆತ್ತೊಂಡೆ.

ಅಣುವ್ರತ ದೀಕ್ಷೆ ಪಂಡ ಐಟ್ ಐನ್ ಸಂಗತಿ ಬರ್ಪುಂಡು. 1) ಸತ್ಯ ಪನ್ನೆ ಸುಳ್ಳು ಪನ್ನಜಿ 2) ಅಹಿಂಸೆನ್ ಪಾಲಿಸಾವೆ, ಹಿಂಸೆ ಮಲ್ಪುಜಿ 3) ಕಂಡುನ ಬೇಲೆ ಮಲ್ಪುಜಿ 4) ದಿಂಜ ಪರಿಗ್ರಹ ದೀವೊನುಚಿ, ಅಂಚಿನೆ 5) ಬ್ರಹ್ಮಚರ್ಯೆ ಪಂಡ ಪೋಣ್ಣ ಜೊಕ್ಕನ್ ಹಾಳ್ ದೃಷ್ಟಿಡ್ ಕಣ್ಣ್ ದೆರ್ತ ತೂಪುಜಿ. - ಉದೆನ್ ಮಾತ ಎನಡ್ ತೀರ್ನಾತ್ ಒಂತೆಡಾಂಡ್ಲಾ ಆಚರಣೆ ಮಲ್ಪುವೆಂದ್ ಗುರುಕ್ಲಡ ವ್ರತ ದೆತೊನ್ನವ್ವೆ 'ಅಣುವ್ರತ ದೀಕ್ಷೆ'. ಉದೆನ್ ರತ್ನಾಕರ ದೆತೊಂಡೆ. ನೆಟ್ವ ರತ್ನಾಕರನ ದೃಷ್ಟಿಡ್ ಕಡೆತ್ತವು ಮಸ್ತ್ ಮುಖ್ಯ. ಅವು ಆಯನ ಜೀವನೊನೇ ಬದಲ್ ಮಲ್ತಂಡ್.

ಮುಲ್ಪ ನಡತ್ತನ ಸಂಗತಿನ ಕಾದಂಬರಿ ಬರೆಯಿನ ಶ್ರೀನಿವಾಸ್ ಬೊಕ್ಕ ಬ್ರಹ್ಮಪೆರ್ ಒಂತೆ ಬೇತೆ ರೀತಿಡ್ ಪನ್ಪೆರ್. ಅಕ್ಲೆನ ಪ್ರಕಾರ ರಾಜಕುಮಾರಿನೊಟ್ಟುಗು ಇತ್ತನ ರತ್ನಾಕರ ರಾಜನ ಕೈಟ್ ತಿಕ್ಕಾದ್ ಬೂರೈ, ರಾಜೆ ರಾತ್ರೆಡೇ ಆಯನ ಜೈಲ್ಡ್ ಪಾಡ್ಪಾಯೆ. ಅಲ್ಪ ಜೈಲ್ಡ್ ಕುಲ್ಲಿನ ರತ್ನಾಕರಗ್ ಬಾರಿ ಪಶ್ಚಾತ್ತಾಪ ಆಂಡ್. ಸನ್ಮಾನ ಆಯಿನ ಈ ಊರುಡೇ, ರಾಜನ ಕೈಟೇ ಅವಮಾನ ಆಯಿನಾಡ್ವತ್ತ ನನ ಮುಲ್ಪ ಇಪ್ಪುನ ಸರಿಯತ್ತಾದ್ ಆಲೋಚನೆ ಮಲ್ತನ ಆಯೆ ದೂರ ಪೋವೊಡುಂದು ನಿರ್ಣಯ ಮಲ್ತೆ. ಎಂಚಲಾ ಆಯನ ಕೈಟ್ 'ದಶವಾಯು ಸಿದ್ಧಿ ವಿದ್ಯೆ' ಇತ್ತಂಡ್. ಐತ್ತ ಬಲೊಟ್ಟು ಏರೆಗ್ಲಾ ಗೊತ್ತಾವಂದಿಲೆಕ್ಕ ರಾತ್ರೆಡೇ ಜೈಲ್ಡ್ ಪಿದಾಯಿ ಬತ್ತೆ. ಒಂಚಿ ಪೋವೊಡುಂದ್ ತೆರಿಯಾಂದೆ ದುಂಬು ಪೋಯೆ. ಅಂಚಿ ವರಂಗ ದಾಂಟ್ಡ್ ಆಗುಂಬೆ ಘಾಟಿದಂಚಿ ಪೋಯೆ. ಅಲ್ಪ ಸೋಮೇಶ್ವರೊಡು

ಆಯಗ್ 'ದಶವಾಯು ಸಿದ್ಧಿ ವಿದ್ಯೆ' ಕೊರಿನ ಸನ್ಯಾಸಿ ತಿಕ್ಕಿ. ಅಪಗ್ 'ಆ ವಿದ್ಯೆ ಯನನ್ ಹಾಳ್ ಮಲ್ತಾಂಡ್'ಂದ್ ಪಂಡ್‌ದ್ ನನ ಬೊಡ್ವಿಂಡ್ ಆಯಗೇ ಪಿರ ಕೊರ್ಯ್. ಐಡ್ ಬೊಕ್ಕ ಗಟ್ಟಿ ಮಿತ್ತರ್ಡ್ ಗಟ್ಟೊಗು ಪೋಯೆ. ಆಗುಂಬೆ, ತೀರ್ಥಹಳ್ಳಿ ದಾಂಟ್‌ದ್ ಪೋನಗ ಆಯಗ್ ಜೈನೆರ್ 'ಅತಿಶಯ ಕ್ಷೇತ್ರ'ವಾಯಿನ, ಅಪ್ಪೆ ಶ್ರೀ ಪದ್ಮಾವತೀ ದೇವಿ ನೆಲೆಯಾದಿವುನ ಹೊಂಬುಚ ಕ್ಷೇತ್ರ ತಿಕ್ಕಾಂಡ್. ಅಲ್ಪ ಬಾರೀ ಪ್ರಾಕ್‌ದ ಗುರು ಪೀಠೊಡು ಶ್ರೀ ದೇವೇಂದ್ರ ಕೀರ್ತಿ ಭಟ್ಟಾರಕೆರ್ ಸ್ವಾಮಿಲಾದ್ ಇತ್ತೆರ್ (ದೇವಚಂದ್ರ ಪಂಡಿನ ಮಾಹೇಂದ್ರ ಕೀರ್ತಿ ದೇವೇಂದ್ರ ಕೀರ್ತಿಲಾ ಅವೆರ್ ಸಾಧ್ಯ ಉಂಡು. ದಾಯೆ ಪಂಡ ಮಹೇಂದ್ರ ಪಂಡ ದೇವೇಂದ್ರಾಂದೆ ಅರ್ಥ. ರತ್ನಾಕರಲಾ ಆಯನ ಕಾವ್ಯೊಡುಲಾ ಮಹೇಂದ್ರ ಕೀರ್ತಿ ಎನ್ನ ಗುರುಂದ್ ಪಂಡೊಂದೆ.) ಅಂಚೆ ಹೊಂಬುಚೊಗು ಪೋಯಿನ ರತ್ನಾಕರ ಗುರುಕುಲಾಯಿನ ದೇವೇಂದ್ರ ಕೀರ್ತಿಯೆರ್ಡ್ ಕಾರ್ ಪತ್ಯೆ. ಆಯನ ಕತೆ ಪೂರ ಸ್ವಾಮಿಲೆಗ್ ಪಂಡೆ. ಆರೆಡ ಅಣುವ್ರತ ದೀಕ್ಷೆ ದೆತೊಂಡೆ.

ಹೊಂಬುಚ ಸೇರಿನ, ಗುರು ಮಾಹೇಂದ್ರ ಕೀರ್ತಿಯೆರ್ಡ್ ಆಶ್ರಯ ಪಡೆಯಿನ ರತ್ನಾಕರ ಪಶ್ಚಾತ್ತಾಪ ಅಂಚೆನೆ ಅಣುವ್ರತ ದೀಕ್ಷೆಡ್ವಾತ್ರ ಮಸ್ತ್ ಬದಲಾಯೆ. ಅಂಡ ಮನಿಪಂದೆ ಕುಲ್ಲುನ ಸುಬಾವು ಆಯನವ್ವತ್ತೆ. ಬಹುಶಃ ಮುಲ್ಪನೇ ಆಯೆ ಬರೆವೊಂದಿತ್ತಿನ 'ಭರತೇಶ ವೈಭವೊ'ನು ಮುಂದುವರ್ತದಿಪೊಡು. ಇತ್ತೆ ಆಯನ ಜೀವನದಲೆಕ್ಕನೆ, ಆಯನ ಕಾವ್ಯೊಡ್ವಾ ಶೃಂಗಾರ, ಭೋಗ ವಿಷಯ ಕಡಿಮೆ ಆಂಡ್, ಆಧ್ಯಾತ್ಮ ಯೋಗ ವಿಚಾರ ಹೆಚ್ಚಾಂಡ್. ಕಾದಂಬರಿ ಕಾರೆರ್‌ನಕ್ಲ ರತ್ನಾಕರ ಭರತೇಶ ವೈಭವೊನು ಮುಲ್ಪನೇ ಬರೆದ್ ಮುಗಿತ್ತೆಂದ್ ಪನ್ನೆರ್. ಕಡೆಕ್ ಅವೆನ್ ಆಯನ ಮೋಕೆದ ಗುರುಕ್ಲೆಗ್ ತೋಜಾಯೆ. ಅವೆನ್ ತೂಯಿನ ಸ್ವಾಮಿಲು ಐಟ್ ಶೃಂಗಾರ ಒಂತೆ ಜಾಸ್ತಿ ಆಂಡ್‌ಂದ್ ಪಂಡೆರ್. ಅವೆನ್ ತಿದ್ವೊನೊಡುಂದ್ ತೆರಿಪಾಯೆರ್. ಗುರುಕ್ಲೆ ಪಾತೆರೊನ್ ಆವುಂದ್ ಒತೊಂಡೆ ರತ್ನಾಕರ.

ಕಾದಂಬರಿದ ಪ್ರಕಾರ... ಒಂತೆ ಸಮಯೊಡ್ವಾ ಬೊಕ್ಕ ನನೊಂಜಿ ಮಲ್ಲ ಜೈನ ಕ್ಷೇತ್ರವಾಯಿನ ಶ್ರವಣ ಬೆಳಗೊಳೊಡು ಪದ್ಮಾಡ್ ವರ್ಸೊಗೊರ ಬರ್ಪುನ ಬಾಹುಬಲಿ ಸ್ವಾಮಿನ (ಗುಮ್ಮಡ್ ದೇವೆರ್) ಮಹಾಮಸ್ತಕಾಭಿಷೇಕ ಬತ್ತಾಂಡ್. ರತ್ನಾಕರ ಭರತೇಶ ವೈಭವೊನು ಪತೊಂದು, ಸ್ವಾಮಿಲ್ಲ ಆಶೀರ್ವಾದ ಪಡೆವೊಂದು ಬೆಳಗೊಳೊಗು ಪೋಯೆ. ಅಲ್ಪಲಾ ಒಂಜಿ ಬಾರೀ ದುಂಬುದ ಗುರುಪೀಠ ಉಂಡು. ಅವು ಶ್ರೀ ಚಾರುಕೀರ್ತಿ ಭಟ್ಟಾರಕೆರ್ಡ್ ಗುರುಪೀಠ. ಅಲ್ಪಲಾ ರತ್ನಾಕರ ಸ್ವಾಮಿಲೆನ ಕಾರ್‌ಪತ್ತ್‌ದ್, ಬದ್‌ಕ್‌ದ ಕತೆ ಪಂಡ್‌ದ್ 'ಭರತೇಶ ವೈಭವ' ತೋಜಾಯೆ. ಆರ್ಲಾ ಶೃಂಗಾರ ಹೆಚ್ಚಾಂಡ್‌ಂದ್ ಪಂಡ್‌ದ್, ಒಂತೆ ಆತ್ಮ-ಪರಮಾತ್ಮನಂಚಿ ಮನಸ್ ಕೊರ್ಲಾಂದ್ ಪಂಡೆರ್. ಆವುಂದ್ ಒತ್ತೊಂಡೆ; ಅಂಚೆನೆ ಮಲ್ತೆ. ಈತಾನಗ ಮಹಾಮಸ್ತಕಾಭಿಷೇಕೊಗು ಬತ್ತಾನ ಬೆದ್ದದ, ರತ್ನಾಕರನ ಗುರ್ತೊದ ದೋಸ್ತಿನಕಲು, ಆಯನ್ ಬೆದ್ದಗ್ ಬಲಾಂದ್ ಲೆತ್ತೆರ್. ಎಡ್ವೆ ಧರ್ಮಗ್ರಂಥೊಲೆಗ್ ಮಾನಾದಿಗೆ ಮುಲ್ಪನ 'ಜೈನಕಾಶಿ' ಬೆದ್ದಡ್ 'ಭರತೇಶ ವೈಭವೊ'ಗ್ರಾ

ಎಡ್ಡೆ ಮಾನಾದಿಗೆ ತಿಕ್ಕೊಡು, ತಿಕ್ಕುಂಡುಂದ್ ಪಂಡರ್. ಅಕ್ಕಿನ ಒತ್ತಾಯೊಗ್ಗಾ, ಆಯನ ಪುಟ್ಟುದುನ ಊರು ಅಂಚೆನೆ ಬರೆಯಿನ ಗ್ರಂಥೊದ ಮಿತ್ತಾದ ಮೋಕೆಡ್ಲಾ ಆಯೆ ಬೆದ್ರಗ್ ಅಕ್ಕೆಡೊಟ್ಟುಗೇ ಬತ್ತೆ. ಆ ಪೊರ್ತುಗು ಬೆದ್ರ ಮರೊಟ್ಟುಲಾ ಕೆಲವು ಬದಲಾವಣೆ ಆದಿತ್ತಾಂಡ್ ಕಾದಂಬರಿಕಾರರ್ ಪನ್ನರ್.

ಕಾದಂಬರಿಡ್ ತಿಕ್ಕುನ ಈ ಹುಂಚ, ಶ್ರವಣ ಬೆಳಗೊಳೊಗು ರತ್ನಾಕರೆ ಪೋದು ಬತ್ತಾನ ವಿಷಯ ಬೇತೆ ಮೂಲೊಡು ನಮುಕ್ ತಿಕ್ಕುಜಿ. ಅಂತೂ ಕಾರ್ಲಡ್ ಭರತೇಶ ವೈಭವ ಪತೊಂದು, ಓಲೋಲಾ ಸುತ್ತುದ್ ರತ್ನಾಕರೆ ಬೆದ್ರಗ್ ಬತ್ತೆಂದ್ ಪನೊಲಿ. ಉಂದುವೇ ಪೊರ್ತುಡು ಮಸ್ತ್ ಬೇಜಾರ್ ಮಲ್ತೊನ್ಯ ಕಾರ್ಲದ ರಾಜಕುಮಾರಿ ಶ್ಯಾಮಲಾ, ರತ್ನಾಕರೆ 'ಅಣುವ್ರತ ದೀಕ್ಷೆ' ಗೆತೊನ್ಯ ಸಂಗತಿ ಕೇಂಡ್, ಆಲ್ಲಾ ದೀಕ್ಷೆ ಗೆತೊಂದು ಹೊಂಬುಚ ಕ್ಷೇತ್ರ ಸೇರೊಲು. ರತ್ನಾಕರೆ ಬೆದ್ರಗ್ ಬರ್ಪಿ ಪೊರ್ತುಗು ಆಯನ ಅಪ್ಪೆ-ಅಮ್ಮೆರ್ಲಾ ತೀರ್ ಪೋದಿಪ್ಪವರ್. ತಂಗಡಿ ಮರುದೇವಿ ಮಾತ್ರ ಇಲ್ಲಡೆತ್ತೊಲು.

ಪುಟುದಿ ಊರುಗು ಬತ್ತಿನ ರತ್ನಾಕರೆ, ಆಯನ ಜೊತೆಟಿತ್ತಿನಕ್ಲ ಪಂಡಿಲೆಕ್ಕನೆ ಆಯೆ ಬರೆಯಿನ 'ಭರತೇಶ ವೈಭವೊ'ಗು ಮಾನಾದಿಗೆ ತಿಕ್ಕೊಂಡುಂದ್ ಕೇನರ ಗುರುಮರೊಕ್ಕು ಪೋಯೆ. ದೇವಚಂದ್ರ ಕವಿ ಪನ್ನಿ ಪ್ರಕಾರ ಬೆದ್ರಡ್ ವಿಜಯಕೀರ್ತಿ ಪಟ್ಟಾಚಾರ್ಯೆರ್ ಶಿಷ್ಯೆಯಾಯಿನ ವಿಜಯಣ್ಣ ಕವಿ 'ದ್ವಾದಶಾನುಪ್ರೇಕ್ಷೆ' ಪುಸ್ತಕೊಗು ಆನಂದ ಮಿತ್ತಾ ದೀಡ್ ಮೆರವಣಿಗೆ ಮಲ್ಪುನ ಮಾನಾದಿಗೆ ತಿಕ್ಕಿನೈನ್ ತೊದು, ರತ್ನಾಕರೆ ಎನ್ನ ಎಣ್ ಪತ್ತನಾಲ್ ಸಂಧಿ ದ 'ಭರತೇಶ ವೈಭವೊ'ಗ್ಲಾ ಮಾನಾದಿಗೆ ತಿಕ್ಕೊಂಡುಂದ್ ಕೇಂಡೆ. ತೊವಂದೆ ಅಂಚ ಮಲ್ಪರಾವಂದ್ ಪಂಡಿನ ಪಟ್ಟಾಚಾರ್ಯೆರ್, ಪುಸ್ತಕೊನು ಓದ್ಯರ್. ಐಟ್ ರಡ್ಡ್-ಮೂಜಿ ವಾಕ್ಯ ಪುರಾಣೊಗು ವಿರುದ್ಧವಾಯಿನ ವಿಷಯೊಲು ಉಂಡು; ಅಂಚಾದ್ ಐಕ್ ಮಾನಾದಿಗೆ ಕೊರಿಯರೆ ಆಪುಜಿಂದ್ ಪಂಡರ್. ಕಾದಂಬರಿಕಾರೆರ್ಕ್ಕ ಪಂಡಿಲೆಕ್ಕ 'ಭರತೇಶ ವೈಭವ' ಗ್ರಂಥೊ ಧರ್ಮ ವಿರೋಧವಾದುಂಡು, ಶೃಂಗಾರ ಹೆಚ್ಚಿಗೆ ಉಂಡುಂದ್ ಐಕ್ಲಾ, ಆಯಗ್ಲಾ ಊರುಡು ಬಹಿಷ್ಕಾರ ಪಾಡ್ಯರ್.

ದೇವಚಂದ್ರ ಪನ್ನಿ ಪ್ರಕಾರ 'ಭರತೇಶ ವೈಭವೊ'ಗು ಮಾನಾದಿಗೆ ಕೊರ್ಟಿ ವಿಷಯೊಡು ಮಸ್ತ್ ಚರ್ಚೆ ಆಂಡ್. ಕಡೆಕ್ ಅವ್ವೇ ಜೋರಾದ್ ಗುರುಕ್ಕುಲು ರತ್ನಾಕರೆನ್ ತಿರಸ್ಕಾರ ಮಲ್ತಾದ್, ಆಯಗ್ ಬೆದ್ರದ ಏಳೊನೊದು ಜೈನೆರ್ ಇಲ್ಲಲೆಡ್ ಏರ್ಲಾ ನುಪ್ಪು-ನೀರ್ ಕೊರಿಯರ ಬಲ್ಲಿ ಬಹಿಷ್ಕಾರ ಪಾಡೊಡು ಪಂಡರ್. ಅಂಚ ಊರುಡು ಮಾತೆರ್ಲಾ ಆಯನ್ ದೂರ ಮಲ್ತಿ ಪೊರ್ತುಗು, ಆಯನ ತಂಗಡಿ ಮಾತ್ರ ಆಯಗ್ ಉನಸ್ ಕೊರ್ರು ತೊವೊನೊಂದಿತ್ತೊಲು. ಆಂಡ ನೆಡ್ಡ್ ಮಸ್ತ್ ಬೇಜಾರ್ಲಾ, ಕೋಪಲಾ ಮಲ್ತೊನ್ಯ ರತ್ನಾಕರೆ ತನ್ಕು ಬಹಿಷ್ಕಾರ ಪಾಡಿನ ಜೈನಧರ್ಮೊಗು ಬಹಿಷ್ಕಾರ ಪಾಡೊಡುಂದ್ ನಿರ್ಧಾರ ಮಲ್ತಿ. ಆಯೆ 'ಆತ್ಮಜ್ಞಾನ ಇತ್ತಿನಾಯಗ್ ಜಾತಿ, ಕುಲ ಒಪ್ಪಾಂಡಲಾ ಒಂಜೆಂದ್' ಪಂಡ್ ಪಂಡ್ ಕಂಠಲ್ ಲಿಂಗೊನು ಕಟ್ಟೊಂದು ಜೈನಧರ್ಮ ಬುಡ್ಡು ವೀರಶೈವ ಧರ್ಮೊಗು ಸೇರೈ. ಐತ

ಧರ್ಮಗ್ರಂಥೋಲೆನ್ ಓದ್ಯ ಪಂಡ್ ಪನ್ವೆರ್.

ಆಂಡ್ ಈ ಸಂದರ್ಭೊನು ಒಂತೆ ವಿಸ್ತರಿಸಾಯಿನ ಕಾದಂಬರಿಕಾರರ್, ಬೆದ್ರಡ್ ಬಹಿಷ್ಕಾರ ಪಡೆದ್ ಬೇಜಾರ್ ಮಲ್ತೊಂದು ಪೋಯಿನ ರತ್ನಾಕರ, ಕೈತಲ್ಪ ಸುದೆಕ್ ಪೋದ್, ಯಾನ್‌ಲಾ ಜೈನಧರ್ಮೋಗು ಬಹಿಷ್ಕಾರ ಪಾಡ್‌ಬೇಂದ್ ಪಂಡ್‌ದ್, ನೀರ್‌ಡ್ ಮುರುಡು ಲಕ್‌ದ್, ಐಡ್ ಬೊಕ್ಕ ಬೆದ್ರ ಬುಡ್ಡು ಸೀದಾ ಗಟ್ಟಿದ ಮಿತ್ತ್ ಪೋಯೆ. ಆ ಪೂರ್ತುಗು ಆಯಗ್ ವೀರಶೈವ ಧರ್ಮ ದೀಕ್ಷೆ ದೆತೊನ್ನ ಆಯನ ಎಲ್ಯ ಪ್ರಾಯೊಡ್ ನೆರೆಕರೆಟ್ ಇತ್ತ್‌ದ್ ಮೋಕೆಡ್ತಿತ್ತಿನ ಗಿರಿಜೆ ನೆನಪಾದಿಪ್ಪೊಡು. ಅಂಚ ಬಾಳೆ ಹೊನ್ನೂರ್ ರಂಭಾಪುರಿ ಮಠಕ್ಕೆ ಪೋದಿಪ್ಪೊಡು. ಇತ್ತೆಲಾ ಬಾಳೆಹೊನ್ನೂರು ಪರಿಸರೊಡು ರತ್ನಾಕರೆ ರಂಭಾಪುರಿ ಮಠಕ್ಕೆ ಬತ್ತ್‌ದ್, ವೀರಶೈವ ಆದ್ ಮಸ್ತ್ ಸಮಯ ಇತ್ತೆಂದ್ ಪನ್ನಿನ ನಂಬಿಕೆ ಉಂಡು.

ಲಿಂಗಾಯಿತೆ ಆಯಿನ ರತ್ನಾಕರೆ, ವೀರಶೈವ ಧರ್ಮೋಗು ಸಂಬಂಧಪಟ್ಟಿನ ಶಾಸ್ತ್ರೊಲೆನ್, ಬಸವ ಪುರಾಣೊನು ಓದ್ಯೆಂದ್ ದೇವಚಂದ್ರ ಪನ್ನೆ ಉಂದುವೇ ಪೂರ್ತುಡು ಮನಿಪಂದ ಕುಲ್ಲಂದಿನ ರತ್ನಾಕರೆ ಬಾಳೆ ಹೊನ್ನೂರುದ ಮಠೊಟ್ಟು ಇಪ್ಪುನ ಪೂರ್ತುಡು 'ಸೋಮೇಶ್ವರ ಶತಕ' ಪನ್ನಿ ಶತಕ ಕಾವ್ಯೊನು ಬರೆಯೆಂದ್ ಪನ್ವೆರ್. ಇಂಚ ಪನ್ನಿನಕ್ ರಡ್ಡ್ ಸಾಕ್ಷಿನ್ ಕೊರ್ಪೆರ್. ಒಂಜಿ ಮಸ್ತ್ ಪ್ರಾಚೀನವಾಯಿನ, ಸೋಮೇಶ್ವರ ಶತಕದ ಒಂಜಿ ಹಸ್ತ ಪ್ರತಿಕ್ ತಿಕ್ಕಿನ ಪದ್ಯ. ಅವು ಇಂಚ ಉಂಡು : (ಕನ್ನಡೊಡು)

“ವರ ಸಮ್ಯಕ್ತ್ವ ಸುಧರ್ಮ ಜೈನ ಮತದೊಳ್ತಾಂ ಪುಟ್ಟಿಯಾ ದೀಕ್ಷೆಯಂ |

ಧರಿಸೀ ಸನ್ನತ ಕಾವ್ಯ ಶಾಸ್ತ್ರಗಳನು ನಿರ್ಮಾಣಮಂ ಮಾಡುತಂ ||

ವರ ರತ್ನಾಕರ ಯೋಗಿಯೆಂದು ನಿರುತಂ ವೈರಾಗ್ಯಂ ಬಂದೇರಲಾಂ |

ಹರ ದೀಕ್ಷಾ ವ್ರತನಾದೆನ್ನೆ ಹರಹರಾ ಶ್ರೀ ಚೆನ್ನ ಸೋಮೇಶ್ವರಾ ||”

“ಜೈನೆ ಆದ್ ಪುಟ್ಟಿನ ಯಾನ್ ದೀಕ್ಷೆ ಗೆತೊಂದು ಕಾವ್ಯ ಶಾಸ್ತ್ರೊಲೆನ್ ಬರೆದ್ ರತ್ನಾಕರ ಯೋಗೀಂದ್ ಪುದರ್ ಪಡೆಯಿನಾಯೆ, ವೈರಾಗ್ಯ ಬತ್ತ್‌ದ್ ಶಿವದೀಕ್ಷೆ ದೆತೊಂಡೆ” ಪನ್ನಿನವು ಈ ಪದ್ಯೊದ ಮುಖ್ಯ ಸಾರು ಆಂಡ ಉಂದೆನೇ ಪತ್ತೊಂದು ಸೋಮೇಶ್ವರ ಶತಕೊನು ರತ್ನಾಕರೆನೇ ಬರೆಯೆಂದ್ ಪನರ ಸಾಧ್ಯ ಇಜ್ಜಿ; ರತ್ನಾಕರೆನ ಕಾವ್ಯೊಲೆನೊಟ್ಟುಗು ದೀಡ್ ತೂಂಡ ಅವು ಮಸ್ತ್ ಪರಾತ್ ತೋಜುಂಡು; ಅಂಚಾದ್ ಅವೆನ್ ರತ್ನಾಕರೆ ಬರೆಯೆಂದ್ ಪನ್ನಿನ ಕಷ್ಟ ಪಂಡ್‌ದ್ ಪಂಡಿತೆರ್‌ನಕ್ ಪಂತರ್. ಶತಕದ ವಿಷಯೋ ಅಂಚ ಇಪ್ಪಡ್. ಆಂಡ ಆಯೆ ವೀರಶೈವ ಧರ್ಮೋಗು ಪೊಯೆ ಪನ್ನಿನೆನ್ ಮಸ್ತ್ ಜನ ಒಪ್ಪುವೆರ್.

ನಮಕ್ ತಿಕ್ಕಿನ ನನೊಂಜಿ ಕಟ್ಟಕತ್ತೆ ಪ್ರಕಾರ ತೂಂಡ ಬೆದ್ರಡ್ ಪಿದಾಡ್ ನೀರ್‌ಡ್ ಮುರುಡು ಜೈನಧರ್ಮೋಗು ಜಲಾಂಜಲಿ ಕೂರಿನ ರತ್ನಾಕರೆ ಘಟ್ಟದ ಮಿತ್ತ್ ಪೋಯಿ ಪೂರ್ತುಗು, ಅವುಲೊಂಜಿ 'ಶೈವ ಗ್ರಂಥೊ'ನು ಆನಂದ ಮಿತ್ತ್ ದೀಡ್ ಮಾನಾದಿಗಿ ಮಲ್ತೊಂದಿತ್ತೆರೆ ಅವೆನ್ ತೂದು ರತ್ನಾಕರೆ ಅವೆಟ್ ದಾಲಾ 'ರಸ' ಇಜ್ಜಿಂದ್ ಪಂಡೆ. ಆಯನ

ಧೈರ್ಯತೂದು ಜನೊಕ್ಕಗ್ ಕೋಪ ಬತ್ತಂಡ್. ಅಕ್ಲ ಪೋದು ಅಲ್ಪದ ರಾಜಗ್ ದೂರು ಕೊರ್ಯೆರ್. ಆ ರಾಜೆ ಇಂಬುನ್ ಲೆಪ್ಪಡಾದ್ ಕೇನ್ನಗ್, 'ಯಾನ್ ಪಂಡಿನವು ಸತ್ಯಾಂಡ್ ವಾದ ಮಲ್ತನತ್ತಂದೆ ಐಡ್ ಪೋರ್ಲುಂದ 'ರಸ' ಇತ್ತನ ಕಾವೊನು ಯಾನ್ ಬರೆಪ್ಪೆಂದ್ ಸವಾಲ್ ಪಾಡ್, ಬಜೀ ಒಂಭ ತಿಂಗೊಕ್ಕು 'ಭರತೇಶ ವೈಭವೊ'ನು ಬರೆದ್ ಕೊರ್ಯೆ. ಅವೆನ್ ತೂದು ಕುಸಿಯಾಯಿನ ರಾಜೆ ಆಯನ್ ವೀರಶೈವ ಧರ್ಮೋಗು ಸೇರ್ದಾಂಡ್ ಪಂಡೆ. ಅಂಚೆ ಆಯೆ ಸೇರ್ದೆಂದ್ ಆ ಕತೆಟ್ ಬರ್ಪುಂಡು. ನೆಡ್ ದುಂಬುಲಾ ನಮ ಇಂಚೆನೇ ಇತ್ತನ ಕತೆನ್ ರತ್ನಾಕರಗ್ ಸಂಬಂಧಪಟ್ಟಿಲೆಕ್ ಕೇಂದ. ಅಂಚಾದ್ ಒಯಿನ್ ನಂಬುನು ಒಯಿನ್ ಬುಡ್ಪುನುಂದ್ ಗೊತ್ತಾಪುಜೆ. ಅಂತೂ ಒಂತೆ ಸಮಯ ಜೈನಧರ್ಮ ಬುಡುದು ವೀರಶೈವ ಧರ್ಮೋಗು ಸೇರ್ದ್ ಇತ್ತ ಪನ್ನಿನವು ಸತ್ಯ ಇಪ್ಪೊಡು.

ಕಾದಂಬರಿ ಬರೆಯಿನಕ್ಲ ಪಂಡಿ ಪ್ರಕಾರ, ರತ್ನಾಕರ ಬೆದ್ರಡ್ ಬಹಿಷ್ಕಾರ ಪಡೆದ ಗಟ್ಟದ ಮಿತ್ತ ಪೋದು ವೀರಶೈವ ಧರ್ಮೋಗು ಸೇರಿನ ಮಾತ ಸಂಗತಿಲಾ ದೀಕ್ಷೆ ದೆತೊಂದು ಹೊಂಬುಚೊಡ್ತಿನ ರಾಜಕುಮಾರಿ ಶ್ಯಾಮಲೆಗ್ ತೆರಿಂಡ್. ಅಲೆಗ್ ಇತ್ತ ಆಯನ ಮಿತ್ತ ಮೋಕೆ ಇತ್ತಿಜಿಂದಾಂಡ್ಲಾ, ಆಯನ ವಿಸಯೊ ದಾದಂದ್ ಎಡ್ ತೆರಿದಿತ್ತನ ಆಲ್, ಆಯನ್ ಕುಡ ಜೈನಧರ್ಮ ಸಮಾಜೊಗು ಕೊನವೊಡುಂದ್ ಮನಸ್ ಮಲ್ತೊಲು. ಅಲೆಗ್ ದೀಕ್ಷೆ ಕೊರಿನ, ಒಂಜಿ ಕಾಲೊಡು ರತ್ನಾಕರಗ್ಲಾ 'ಅಣುವ್ರತ ದೀಕ್ಷೆ' ಕೊರಿನ ಗುರು ದೇವೇಂದ್ರ ಕೀರ್ತಿ (ಮಾಹೇಂದ್ರ ಕೀರ್ತಿ)ಯೆರ್ ಪೂರ ವಿಸಯ ಪಂಡೊಲು. ರತ್ನಾಕರ ಜೈನ ಸಮಾಜೊಗು ಆಸ್ತಿ, ಧರ್ಮದ ದೃಷ್ಟಿಡ್ ಆಯೆ ಕನ್ನಡೊದ ಕುಂದ ಕುಂದಾಚಾರ್ಯ ಪಂಡ್ ದ್ ವಿವರ್ದ್, ಆಯನ್ ಎಂಚಾಂಡ್ಲ ಪಿರಲೆತ್ತೊಂದು ಬರೊಡುಂದ್ ಒತ್ತಾಯ ಮಲ್ತೊಲು. ಸ್ವಾಮಿಲೆಗ್ಲಾ ಆಲ್ ಪಂಡಿನ ಅಂದ್ ತೋಜಿಂಡ್. ಅಂಚೆ ಆರ್ ಬಾಳೆ ಹೊನ್ನೂರುಗು ಪೋಯೆರ್. ಅಲ್ಪದ ಸ್ವಾಮಿಲೆಡ, ರತ್ನಾಕರಡ ಪಾತೆರ್ಯೆರ್. "ಸ್ವಧರ್ಮ ನಿಧನಂ ಶ್ರೇಯಃ" ಪನ್ನಿ ಕನ್ನಡದ ಪಾತೆರೊದ ಲೆಕ್ಕ ಪ್ರತಿಯೊಕ್ಕೊಗ್ಲಾ ಆಯಾಯನ ಧರ್ಮೋನೇ ಮಲ್ಲ ನಿಕ್ಕ್ 'ಧರ್ಮ' ಬಹಿಷ್ಕಾರ ಪಾಡಿಜಿ. ಏರೋ ಕೆಲವು ಆ ಧರ್ಮೋಗು ಸೇರಿನ ಜನೊಕ್ಕುಲು ನಿನನ್ ತಿರಸ್ಕಾರ ಮಲ್ತೆರ್. ಐಕ್ ಈ ಧರ್ಮೋಗು ಬೆರಿ ತೋಜಾಯೆರೆ ಬಲ್ಲಿ ಇಂಚೆ ಮಾತ ಪಂಡ್ ದ್, ರತ್ನಾಕರನ ಮನಸ್ ಬದಲ್ ಮಲ್ತೆರ್.

ನಮ ನೆಡ್ ದುಂಬೇ ಕೇಂಡ್ ತೆರಿದಿನ ಕಟ್ಕತ್ತ ಪ್ರಕಾರ-ರತ್ನಾಕರ ಪಿದಾಯಿದ ಆಚರಣೆಡ್ ವೀರಶೈವೆ ಆದಿತ್ತೆಡಲಾ, ಮನಸ್ ಜೈನಧರ್ಮೋಡೇ ಇತ್ತಂಡ್. ಅಂಚಾದ್ ಆಯೆ ಹೊಂಬುಚೆದ ಸ್ವಾಮಿಲು ಬುದ್ಧಿ ಪಂಡಿ ಪೂರ್ತುಗು, "ಯಾನ್ ಮನಸ್ಸಡ್ ಜೈನೆ ಆದೇ ಉಲ್ಲೆ ನೆಡ್ ದುಂಬೇ ಯಾನ್ ಸೈತ್ತಂಡ ಎನ್ನ ಉತ್ತರಕ್ರಿಯೆ ಪೂರಾ ಜೈನರೇ ಮಲ್ಪೊಡುಂದ್ಲಾ, ಸೈನೆಟ್ಟಿ ಜೈನೆ ಆದೇ ಇಪ್ಪುವೆಂದ್ಲಾ ಬೇತೆಕ್ಲೆಡ ಪಂತೆ" ಪಂಡ್ ದ್ ತೆರಿಪಾಯೆ. ಆತೆ ಅತ್ತಾಂದೆ, "ಕಂಟೆಲ್ಡ ಕಟ್ಟೊಂದಿಪ್ಪಿನವು ಲಿಂಗ ಅವಡ್, ರುದ್ರಾಕ್ಷಿ ಅವಡ್ ಅತ್ತ. ಅವು ಬಜೀ ಗೊಂಟು ಬಜ್ಜಿಯಿ" ಪಂಡ್ ದ್ ಅವೆನ್ ದೆತ್ತ ತೋಜಾಯೆಗೆ.

ಅಂತು ಬಹಿಷ್ಕಾರದ ಕೋಪೊಡ್ಡಾತ್ತ ವೀರಶೈವೇಂದ್ ನಾಟಕ ಮಲ್ಲೊಂದಿತ್ತಿ ರತ್ನಾಕರ ಜೈನ ಧರ್ಮೋಗು ಪಿರಬತ್ತೆ. ಆಯಗ್ ಹುಂಚದ ಸ್ವಾಮಿಲು ಪುನರ್‌ದೀಕ್ಷೆ ಕೊರಿಯೆರ್. ಅಲ್ಲ ಕುಡವೊರ ಆಯಗ್ ಗುರುಕ್ಕುಲು ಬುದ್ಧಿ ಪಂಡ್‌ದಿಪ್ಪೊಡು. “ಭರತೇಶ ವೈಭವೊಡು ಬರತ್ತಿನ ಶೃಂಗಾರ ಎಡ್ಡೆ ಬದ್ಕಗ್ ಒಗುರ್‌ನ ಸಂಗತಿ ಆತ್. ಅಂಚಾದ್ ಶೃಂಗಾರ ಬುಡ್ಡು ಜನಕ್ಕುಲೆಗ್ ಎಡ್ಡೆ ಧರ್ಮೋದ ಸಾದಿ ತೋಜಾವುಲೆಕ್ಕ ಎಡ್ಡೆಡ್ಡೆಂತ್ರಿ ಆಧ್ಯಾತ್ಮ ಕಾವ್ಯೊಲೆನ್ ಬರೆಪ್ಪುನೈಟ್ ನಿನ್ನ ಬಿಸಾರದಿಗೇನ್ ತೋಜಾಲಾ. ಐಡ್ಡ್ ಜನೊಕ್ಲೆಗ್, ಸಮಾಜೊಗು, ಧರ್ಮೋಗು, ಮಾತೆರೆಗ್ಲಾ ಎಡ್ಡೆ ಆಪುಂಡು. ನಿಕ್ಕಲಾ ಎಡ್ಡೆ ಮನಸ್, ಪುದರ್, ಮಾನಾದಿಗ್ ತಿಕ್ಕುಂಡುಂದ್” ಪಂಡರ್. ಉಂದೆನ್ ಪೂರ ಕೇನ್ಯ ರತ್ನಾಕರಗ್ ಗುರುಕ್ಲೆನ ಪಾತೆರ ಸತ್ಯಾಂದ್ ತೋಜಿಂಡ್. ಅಂಚಾದ್ ನನಮಿತ್ತಗ್ ಬದ್ಕಡಾವಡ್, ಬರವುಡಾವಡ್ ಶೃಂಗಾರದ ಸಂಗತಿಯೇ ಬೊಡ್ಡಿಂತ್ ನಿರ್ಧಾರ ಮಲ್ತೆ. ಅಪಗ, ನೆಡ್ಡ್ ದುಂಬೇ ಎಲ್ಲಿಡ್ಡಿಂಚ ಓದುದು ತೆರಿದ್‌ನ ಕುಂದ ಕುಂದಾಚಾರ್ಯೆರ್, ಅಂಚೆನೇ ಬೇತಕ್ಲೆನ ಜೈನ ತತ್ವ-ಸಿದ್ಧಾಂತೊಲೆನ ಪೊಸ ಕಾವ್ಯೊಲೆನ್ ಬರವೆರ ಸುರುಮಲ್ತೆ. ಇತ್ತೆ ಆಯನ ಬರೆಪ್ಪುನ ರೀತಿಲಾ ಬದಲಾಂಡ್. ಆಯೆ ಶತಕೊಲೆನ್ ಬರವೆರ ಸುರುಮಲ್ತೆ.

ಶತಕೊ ಬರೆಪ್ಪುನವು ಆಯಗ್ ದಾಲ ಪೊಸತ್ತತ್ತ್‌ಂದ್ ತೋಜುಂಡು. ದಾಯೆ ಪಂಡ ಆಯೆ ನೆಡ್ಡೆ ದುಂಬೇ ‘ತ್ರಿಲೋಕ ಶತಕ’ ಪನ್ನಿ ಶತಕ ಬರೆಯಿಲೆಕ್ಕ ತೋಜುಂಡು. ಆಂಡ ಇತ್ತೆ ಬರವೆರ ಸುರು ಮಲ್ತನ ಶತಕೊಲು ಆಯನ ಬದ್ಕದ ಅನುಭವದೊಟ್ಟುಗು ಸೇರೊಂದ್, ಆಧ್ಯಾತ್ಮ ರಸದಿಂಜಿದ್ ರಚನೆ ಆಂಡ್. ‘ರತ್ನಾಕರ ಶತಕೊ’ ಬರವೆರ ಸುರು ಮಲ್ತನ ರತ್ನಾಕರ ಒಂತೆ ಸಮಯೊ ಹುಂಚೊಡಿತ್ತಾದ್ ಐಡ್ಡ್ ಬೊಕ್ಕ ಶ್ರವಣಬೆಳಗೊಳದಂಚಿ ಪೋದು ಕಡೆಕ್ ಬೆದ್ರಗ್ ಪಿರ ಬತ್ತಿಲೆಕ್ಕ ತೋಜುಂಡು. ಆತ್ ಪೂರ್ತುಗು ಬೆದ್ರಡ್ಲಾ ಮಸ್ತ ಮಾತಾ ಬದಲಾವಣೆಲು ಆಂಡ್‌ಂದ್‌ಲಾ ತೆರಿನಕ್ ಪಂತರ್. ಒಂಜಿ ಮೂಲೊಡ್ಡು ತೆರಿದ್ ಬರ್ಪಿ ಪ್ರಕಾರ - ದ್ವಾದಶಾನುಪ್ರೇಕ್ಷೆ ಬರೆಯಿನ ವಿಜಯಣ್ಣೆ ಬೊಕ್ಕ ಆಯನ ಗುರುಕ್ಕುಲಾಯಿನ ವಿಜಯಕೀರ್ತಿ ಸ್ವಾಮಿಲು, ಬಹಿಷ್ಕಾರ ಪಡೆಯಿ ರತ್ನಾಕರ, ಜೈನಧರ್ಮೋಗೇ ಬಹಿಷ್ಕಾರ ಪಾಡ್ಡ್ ಗಟ್ಟಿಗ್ ಪೋದು, ವೀರಶೈವ ಆಯೆರ್ ಪನ್ನಿ ವಿಚಾರ ಕೇಂಡ್‌ದ್ ಮಸ್ತ ಬೇಜಾರ್ ಮಲ್ಲೊಂಡರ್. ಉಂದು ಈತ್ ಮಲ್ಲೆ ಆಪುಂದ್ ಅಕ್ ಎನ್ನಿಜೆರಾಂಡ್. ರತ್ನಾಕರನಂಚಿನ ಬರ್ಪಿ ಜೈನಧರ್ಮೋನೇ ಬುಡ್ಡ್ ಪೋಯಿನ ತೂದು ಅಕ್ಲೆಗ್ ತನ್ನುಲು ತಪ್ಪು ಮಲ್ತಾಂದ್ ತೋಜಿಂಡ್. ಆಯನ್ ಎಂಚಾಂಡ್ಲ ಪಿರ ಲೆತ್ತೊಂದು ಬರೊಡುಂದ್ ತೋಜಿಂಡ್. ಆಂಡ ದಾಲಾ ಮಲ್ಲರಾವಂದೆ ಮನಿಪ್ಪಂದ ಇತ್ತರ್. ಐಡ್ಡ್ ಬೊಕ್ಕ ಹುಂಚದ ಸ್ವಾಮಿಲು ರತ್ನಾಕರನ್ ಪಿರ ಲೆತ್ತೊಂದು ಬತ್ತಿನೈನ್ ಕೇಂಡ್‌ದ್ ಮೊಕುಲು ಸೀದಾ ಹುಂಚೊಗು ಪೋಯೆರ್. ರತ್ನಾಕರನ್ ತೂದು ಪಾತೆರ್ಲೆರ್. ಬಹುಶಃ ಮಾಪುಲಾ ಕೇಂಡ್‌ದಿಪ್ಪೆರ್. ಕಡೆಕ್ ರತ್ನಾಕರ ಪಿರ ಬೆದ್ರಗ್ ಬರೊಡು, ಎಡ್ಡೆಡ್ಡೆ ಕಾವ್ಯೊಲೆನ್ ರಚನೆ ಮಲ್ಲೊಡುಗ್ ಕೇಂಡೊಂಡರ್. ಅಕ್ಲೆನ ಎಡ್ಡೆ ಪಾತೆರೊನು ಕೇಂಡ್‌ದ್, ಗುರುಕ್ಲೆನ ಆಶೀರ್ವಾದ, ಒಪ್ಪಿಗ್ ಪಡೆವೊಂದು ರತ್ನಾಕರ

ಅಲ್ಪ ಪಿದಾಡಿಯೆ. ಕಾರ್ಲದ ಸಾಡಿಯೆ ಬೆದ್ರೆಗ್ ಬತ್ತೆ.

ಅಂತೂ ಬೆದ್ರೆಗ್ ಬತ್ತೆ ಸೇರಿನ ರತ್ನಾಕರೆ ಮಾತೆರ್ದೆ ಎಡ್ಡೆ ಮನಸ್ ದ ಪೋತ್ನಾಹ ಪಡೆವೊಂದು ಉಲ್ಲೇಸೊಡು ರತ್ನಾಕರ ಶತಕ, ಐಡ್ ಬೊಕ್ಕ ಅಪರಾಜಿತ ಶತಕ ಬರೆಯೆ. ಆ ಶತಕೊಲೆಡ್ಲಾ ಕವಿ ದುಂಬುಡು ಮಲ್ತನ ತಪ್ಪುಲೆನ್ ನೆನವರಿಕೆ ಮಲ್ತೊಂದು, ಪಶ್ಚಾತ್ತಾಪ ಪಡೆಯಿನವು ತೊಜಿದ್ ಬರ್ಪುಂಡು. ಅಂತು ಕಡೆತ್ತ ಪೂರ್ತುಡು ಎಡ್ಡೆ ಪೆಟ್ತ್ ತಿಂದಿನ ಪುತ್ಯೊಳಿದ ಲೆಕ್ಕ ಆಯಿನ ರತ್ನಾಕರೆ ಮಹಾಕವಿಯಾದ್ ಮಿನ್ಚ್ಚೆ. ಆಯನ ಭರತೇಶ ವೈಭವೊಗ್ಲಾ ಎಡ್ಡೆ ಮಾನಾದಿಗ್ ತಿಕ್ಕುಂಡ್. ಹಂಸಪಕ್ಕಿದ ಲೆಕ್ಕ ಜನೊಕ್ಕುಲು ಆಯನ ಕಾವ್ಯೊಡ್ತಿನ ಬೊಡ್ಡಾಂದಿನ ವಿಷಯೊಲೆನ್ ಬುಡ್ಡ್ ಬೋಡಾಯಿನೈನ್ ಮೋಕೆಡ್ ಪೆಜ್ಜೆದ್ ಗೆತೊಂಡೆರ್.

ರತ್ನಾಕರವರ್ಣ ಕಡೆಕ್ ಬೆದ್ರೆಡ್ತೊಂದು ಶತಕೊಲೆನ್ ಬರೆಯಿನ 'ನಗರೇಶ್ವರ' ಪನ್ನಿ ಇಲ್ಲ ಇತ್ತೆಲಾ ಬೆದ್ರದ ಜೈನ ಪೇಟೆಡ್ ಉಂಡು. ಆ ಇಲ್ಲಡ್ ಒಂಜಿ ಕಲ್ಲ್ದನೇ ಕೋಣೆ ಉಂಡು; ಐಟೊಂಜಿ ಪೂರ್ಲುಡ ಉಜ್ಜಾಲ್ ಉಂಡು. ರತ್ನಾಕರೆ ಆ ಕಲ್ಲ್ದ ಕೋಣೆಡ್ ಆ ಉಜ್ಜಾಲ್ಡ್ ಕುಲ್ಲುದು ಓದುನ, ಬರೆಪ್ಪನ ಬೇಲೆ ಮಲ್ತೊಂದಿತ್ತೆಂದ್ ತೆರಿದ್ ಬರ್ಪುಂಡು. ಅತ್ತಾಂದೆ, ಬೆದ್ರ ಪಂಡಿ ಕೊಡ್ಲೆ ಮಾತೆರೆಗ್ಲಾ ನೆನಪಾಪುನು ಸಾವಿರ ಕಂಬದ ಬಸದಿ. ಕ್ರಿ.ಶ. 1430-1462ಟ್ ಈ ಬಸದಿ ಕಟ್ಟ್ಪತ್ತೆರ್. ಪಂಡ ರತ್ನಾಕರಡ್ಲಾ ಅಂದಾಜಿ ನೂದು ವರ್ಸ ದುಂಬೇ ಕಟ್ಟ್ಪದ್ ಆ ಮಾಮಲ್ಲ ಬಸದಿನ ತೊಂಡ, ಆಯಗ್ ಬಾರೀ ಮೋಕೆ ಇತ್ತೆಂಡ್. ಆಯೆ ಆಯನ ಕಡೆತ್ತ ದಿನೊಕ್ಕೆಡ್ ಆಯನ ಶತಕ, ಬೊಕ್ಕ ಬೇಶ ಕಾವ್ಯೊಲೆನ್ ಬರೆವರ ಆ ಬಸದಿಗೇ ಪೋವೊಂದಿತ್ತೆಗೆ. ದಾಯೆ ಪಂಡ ದಾಲಾ ಸಬ್ಬದಾಂತಿನ ಆ ದೇವರೆ ಸನ್ನಿಧಿಡ್ ಆಯಗ್ ಬರೆವರ ಎಡ್ಡೆ ಮನಸ್ ಬರೊಂದಿತ್ತೆಂಡ್. ಅಲ್ಪ ಬಸ್ತಿದ ಮಲ್ಲ ಬಾಕಿಲ್ಲ ಕೈತಲ್ ಪಿದಾಯಿಡ್ ಒಂಜಿ ಪೀಠದಲೆಕ್ಕ ಉಂಡು. ರತ್ನಾಕರೆ ಏಪೊಲ ಐಟ್ ಕುಲ್ಲುದು ಬರೆವೊಂದಿತ್ತೆಗೆ. ಅವು ಅಂದ್ ಪನ್ನಿನ್ಚೆ ಇತ್ತೆಲಾ ಸಾಕ್ಷಿಯಾದ್ ಅಲ್ಪ ಕಲ್ಲ್ಡ್, ಆಯನ ಓಲೆಗರಿಟ್ ಬರೆಪ್ಪನ ಕಬೊರ್ಡ ಕಂಠೊನು ಚೂಪು ಮಲ್ಪರ ಉರತೊಂದಿತ್ತಿನ ಜಾಗೆಡ್ ಉಡೊಗ್ಗು ಗುಂಡಿ ಆತನ ಗುರ್ತು ಉಂಡು.

ರತ್ನಾಕರನ ಕಡೆತ್ತ ದಿನೊಕ್ಕೆಡ್, ಆಯಗ್-ಆಯನ ಬರವುದ ಕಾವ್ಯೊಲೆಗ್ ಬೆದ್ರೆಡ್, ಅಂಚನ ಊರು-ಪರಊರುಲೆಡ್ ಎಡ್ಡೆ ಮಾನ-ಮರ್ಯಾದೆ ತಿಕ್ಕುಂಡ್. ಅವು ಇನಿಕ್ಕಾ ಒರಿದ್ ಬತ್ತೆದ್ಂಡ್. ಆಯನ್ ಎಡ್ಡೆ ತೆರಿನ ಜನೊಕ್ಕು 'ಸಾಂಗತ್ಯ ಚಕ್ರವರ್ತಿ'ಂದ್ ಲೆತ್ತೆರ್. ಇಂಚಿತ್ತಿ ರತ್ನಾಕರವರ್ಣನ ಅಂತ್ಯೊ ಏಪ, ಎಂಚ ಅಂಡೆಂದ್ ತೆರಿಯೆಂದ್. ಅಂಡ ಜೆ. ಬ್ರಹ್ಮಪ್ಪೆರ್ ಪನ್ನಿಲೆಕ್ಕ ಆಯನ ಮರಣ ಕ್ರಿ.ಶ. 1600ಡ್ ಬೊಕ್ಕ ಕೈತಲ್ ಅಂಡ್. ಅಂಚ ಆ ಮಹಾಕವಿ ಕಾಯಬುಡ್ ಪೋದ್ ಅಂದಾಜಿ ನಾಲ್ ನೂದು ವರ್ಸ ಕರಿಂಡ್. ಆಯೆ ಬರೆಯಿನ ಕಾವ್ಯೊಲೆಡ್ಲಾತ್ ಆಯನ ಕೀರ್ತಿ ಮಾತ್ರ ಒರಿಂಡ್.

ರತ್ನಾಕರನ ಕಾವ್ಯೋಲು

'ಸಾಂಗತ್ಯ ಚಕ್ರವರ್ತಿ'ಯ ಪುದರ್ ಪಡೆಯಿದ ರತ್ನಾಕರವರ್ಣಿನ್ ಪದಿನಾಜಿನೇ ಶತಮಾನೊದ ಕನ್ನಡೊದ ಮಾಮಲ್ಲ ಕವೀಂದ್ ತೆರಿನಕ್ಲ್ ಪಂತರ್. ಆತ್‌ನಟ್ಟದ ಹೆಚ್ಚಿನ ಕವಿಕ್ಲೆಕ್ಕ ರತ್ನಾಕರೆಲಾ ಕಾವ್ಯ ಬರೆಪ್ಪನ ಕೆಲಸೊಗು ಮುಖ್ಯವಾದ್ ಕೈಪಾಡಿನ ಧರ್ಮೋದ ವಿಸಯ ತೆರಿಪಾವೆರೆಗೊಸ್ಕರನೆ. ಆಯನ್ 'ರತ್ನಾಕರವರ್ಣಿನ್', 'ರತ್ನಾಕರಸಿದ್ಧ', 'ರತ್ನಾಕರ ಅಣ್ಣ' - ಇಂಚ ಬೇತೆ ಬೇತೆ ಪುದರ್‌ಡ್ ಲೆತ್ತೊಂದಿತ್ತರ್‌ಂದ್ ತೆರಿದ್ ಬರ್ಪುಂಡು. ಆಂಡಲಾ ಸ್ವತಃ ಆಯಗ್ 'ರತ್ನಾಕರ ಸಿದ್ಧ' ಪನ್ನಿ ಪುದರೇ ಹೆಚ್ಚಿಗೆ 'ಇಷ್ಟ' ಆದಿತ್ತಂಡ್. 'ರತ್ನಾಕರ' ತುಳುನಾಡ್ ಕನ್ನಡೊಗು ಕೊರಿನ ಮಾಮಲ್ಲ ಉಡುಗಿರೆಂದ್ ಪನೊಲಿ. ತುಳುವಪ್ಪೆ ಜೋಕುಲು ಮಾತೆ 'ಆಯೆ ನಮನಾಯೆ'ಯ ಪನ್ನಿಲೆಕ್ಕ ಪೆರ್ಮೆ ಪುಟ್ಟಾಯಿನ ಆಯೆ, ಆಯನ ಬರವುದ ಬಿಸಾದಿಗಡ್ಡೆ 'ಶೃಂಗಾರ ಕವಿ ಹಂಸರಾಜೆ'ಯ್ ಬಿರುದು ಪಡೆಯೆ. ಇಂಚಿತ್ತಿ ರತ್ನಾಕರ ಆಯನ ಬದ್ಕದ ಬಗ್ಗೆ ದಿಂಜ ದಾಲಾ ಪಂಡಿಜೆಂದಾಂಡಲಾ, ಆಯೆ ಬರೆಯಿನ ಕಾವ್ಯಕೃತಿಕ್ಲೆನ ಬಗ್ಗೆ ನಮಕ್ ಹೆಚ್ಚಿಗೆ ದಾಲಾ ಗೊಂದಲ ಇಜ್ಜಿ, 'ಸೋಮೇಶ್ವರ ಶತಕ' ಆಯೆನೇ ಬರೆಯೆನಾ ಪನ್ನಿನ ಒಂಜಿ ಅನುಮಾನೊದ ಪ್ರಶ್ನೆ ಬುಡುಂಡ ಬೇತೆದಾಲಾ ಆಯನ ಪುಸ್ತಕೊಲೆ ಬಗ್ಗೆ ಚರ್ಚೆ ಇಜ್ಜಿ 'ಭರತೇಶ ವೈಭವ', 'ಶತಕೊಲು' ಬೊಕ್ಕ 'ಆಧ್ಯಾತ್ಮ ಗೀತೆಲು' - ಉಂದು ರತ್ನಾಕರ ಪನ್ನಿ ಕವಿಬ್ರಹ್ಮನ ಮೂಜಿ ಮೋನೆಯೆಂದು ಪನೊಲಿಂತ್ ತೆರಿನಕ್ಲ್ ಪಂತರ್. ಅಂಚಾದ್ ರತ್ನಾಕರನ ಬದ್ಕದ ಬಗ್ಗೆ ಒಂಜಾತ್ ತೆರಿಬೊಕ್ಕ ನನ ಒಂತೆ ಆಯನ ಬರವುದ ಬಿಸಾದಿಗದ ಬಗ್ಗೆ ತೆರಿಯೊನ್ನ.

ಭರತೇಶ ವೈಭವ : ಭರತೇಶ ವೈಭವ ಇಡೀ ನಡುಗನ್ನಡ ಸಾಹಿತ್ಯ ಲೋಕೊಡು ಲಕ್ಶ್ಯದ್ ತೋಜುನ ರತ್ನಾಕರಗ್ 'ಮಾಮಲ್ಲ ಕವೀಂದ್' ಪುದರ್ ಕೊಣತ್ತಾನ ಕಾವ್ಯೊ. 'ರಾಷ್ಟ್ರಕವಿ' ಕುವೆಂಪು ಇಂಚಿನ ಒಂಜಿ ಕೃತಿ ಇಡೀ ಜಗತ್ತ್‌ಡೇ ಇಜ್ಜೀಂದ್ ಪಂಡ್‌ದ್ ಉಂದೆನ್ 'ಜಗತ್ಕೃತಿ'ಯ್ ಲೆತ್ತರ್. ರತ್ನಾಕರಗ್ ಶೃಂಗಾರ ಪಂಡ ಮಸ್ತ ಮೋಕೆಂದ್ ತೆರಿದ್ ಬರ್ಪುನು ಉಂದೆಡ್ಲೆ. ಈ ಭರತೇಶ ವೈಭವೊಗು 'ಭರತೇಶ ಸಂಗತಿ', 'ಅಣ್ಣಾಳ ಚರಿತೆ ಪನ್ನಿನ ಪುದರ್‌ಲಾ ಇತ್ತಂಡ್‌ಂದ್ ತೆರಿದ್ ಬರ್ಪುಂಡು.

ಬರ್ಸೆರ್ ಏಪೊಲಾ ಮಾತೆಲ್ಲ ನಡಪ್ಪನ ಸಾದಿಡ್ ನಡಪ್ಪುಚೆರ್. ಪೊಸತಾದಿ ನಾಡ್ ಪತ್ತನವ್ಲೆ ಆಕ್ಲೆನ ಸ್ವಭಾವ. ರತ್ನಾಕರೆಲಾ ಅಂಚಿನನೇ ಬರ್ಸೆಂದ್ ಪನೊಲಿ. ಆಯೆ ಆಯನ ಬದ್ಕಡ್ಲಾ ಬರವುಡ್ಲಾ ಪೊಸ ಸಾದಿ ಪತ್ತರೆ ಪ್ರಯತ್ನ ಮಲ್ತೆ. ನೆಕ್ 'ಭರತೇಶ ವೈಭವೊ' ಎಡ್ಡೆ ಉದಾಣೆ. ಎಣ್‌ಪತ್ತನಾಲ್ ಸಂಧಿದ ಅಂದಾಜಿ ಪತ್ತ ಸಾವಿರೊದಾತ್ ಪದ್ಯೊಲಿಪ್ಪನ ಮಲ್ಲ ಕಾವ್ಯೊ 'ಭರತೇಶ ವೈಭವೊ'ನು ರತ್ನಾಕರ ಸಾಂಗತ್ಯೊಡ್ ಬರೆಯೆ. ನೆತ್ತ ವಿಸೇಸ ದಾದ ಪಂಡ, ಸಾಂಗತ್ಯೊ ಮಲ್ಲ ಮಲ್ಲ ಗ್ರಂಥೊಲೆನ್ ಬರೆವರ ಉಪಯೋಗ ಮಲ್ಪುನ 'ಛಂದಸ್ಸು' ಆತ್. ಅವು ಎಂಚಿನಿತ್ತಂಡಲಾ ಎಲ್ಯ ಭಜನೆದಂಚಿತ್ತಿನ ಬರೆವರ, ಅತ್ತಂಡ ಹಳ್ಳಿದ ಜನೊಕ್ಲೆ ಜೀವನೊನು ವಿವರಿಸಯೆರೆ ಉಪಯೋಗ ಮಲ್ಪುನಂಚಿತ್ತನ ಸುದ್ದ ಕನ್ನಡೊದ ಛಂದಸ್ಸು.

ಅಂಚಿತ್ತಿ ಸಾಂಗತ್ಯೋಡೇ ಮಾಮಲ್ಲ ಗ್ರಂತೊ ಬರೆಯಿನ ಒರಿಯೇ ಕವಿ ಪಂಡ ನಮನ ತುಳುನಾಡ್ ರತ್ನಾಕರಂದ್ ಪನಿಯರೆ ನಮಕ್ ಪೆರ್ಮೆ. ನಮ ರಾಗೊಡು ಭಜನೆ ಪಂಡಿಲೆಕ್ಕನೆ ಇಡೀ ಭರತೇಶ ವೈಭವೊನು ಪನೊಲಿ. ಒಂಜಿ ರೀತಿಡ್ ತೂಂಡ ರಾಗೊಡು ಪಂಡೊಂದು ಪೋಂಡನೇ ಐತ ನಿಜವಾಯಿನ ಪೊರ್ಲು-ತಿರ್ಲ ಗೊತ್ತಾಪುನು; ಇಜ್ಜಿಂದ ಗೊತ್ತಾಪುಜಿ.

ನನ ರತ್ನಾಕರ ಭರತೇಶ ವೈಭವೊನು ವಾ ವಿಸಯೊದ ಮಿತ್ತ್ ಬರೆಯೊನಾ ಐಟ್ಲಾ ಆಯನ ಬಿಸಾದಿಗ್ ತೋಜಿದ್ ಬರ್ಪುಂಡು. ಬಹುಶಃ ಇಂಚಿತ್ತಿ ಒಂಜಿ ಮಲ್ಲ ಕಾವ್ಯೊನು ಬರೆವೊಡುಂದ್ ಆಯೆ ಆಲೋಚನೆ ಮಲ್ಪುನಗ್, ಆಯಗ್ ಎಲ್ಲಿಡ್ ಗುರುಮಠೊಟ್ಟು ಅಂಚೆನೆ ಇಲ್ಲಡ್ ಕೇಂಡಿನ 'ಆದಿಪುರಾಣ' ನೆನಪಾದಿಪೊಡು. ಐಟ್ ಜೈನಧರ್ಮ ಪರಂಪರೆಗ್ ಇತ್ತೆದ ಕಾಲೊಗು ಸುರುತ್ತ 'ತೀರ್ಥಂಕರ'ರಾಯಿನ ಆದಿನಾಥೆರ್ ಜೋಕುಲಾಯಿನ ಭರತ-ಬಾಹುಬಲಿಯೆರ್ ಬಗ್ಗೆ ಆಯಗ್ ಮಸ್ತ್ ಅರ್ತಿ ಪುಟ್ಟುದಿಪೊಡು. ಆಂಡ ಅವ್ವೇ ಕತೆನ್ ಕುಡ ಬರೆಂಡ ದಾಲಾ ಬಿಲೆ ಇಜ್ಜಿಂದ್ ಆಯಗ್ ಗೊತ್ತಿತ್ತೆಂಡ್. ಅತ್ತಾಂದ್ ಅಂಚೆನೇ ಬರೆವರ ಆಯಗ್ ಮನಸ್‌ಲಾ ಇಜ್ಜಾಂಡ್ . ಅಪಗ ಮೂಲೊ ಕತೆ ಆವೆನೇ ದೀವೊಂದು ಕೆಲವು ಮುಖ್ಯವಾಯಿನ ಬದಲಾವಣೆ ಮಲ್ತೊಂದು 'ಭರತೇಶ ವೈಭವ' ಬರೆಯೆ. ಬರೆದ್ ಆಯೆ ಸೋತುದ್ ಗೆಂದೈ.

ಮುಖ್ಯವಾದ್ ರತ್ನಾಕರ ತಾನ್ ಬರೆಪುನ ಕತೆತ್ತ ನಾಯಕೆ ಆದ್ 'ಭರತ'ನ್ ಗೆತೊನ್ನವ್ವೇ ಒಂಜಿ ಮಾಮಲ್ಲ 'ಕ್ರಾಂತಿ' ಆಂಡ್. ಆಯನವು ಏರ್ಲಾ ಮಲ್ಪುಂದಿ ಬೇಲೇಂದ್ ತೋಜಿದ್ ಬತ್ತೆಂಡ್. ಮುಲ್ತ ತರಿಯೊಡಾಯಿನ ಸಂಗತಿ ಪಂಡ, ಈ ಪೊರ್ತುಗಾನಗ ಭರತ-ಬಾಹುಬಲಿಯೆರ್ ಕತೆ ಮಾತೆರೆಗ್ಲಾ ಗೊತ್ತಿತ್ತೆಂಡ್. ಸಂಸ್ಕೃತೊಡು ಜಿನಸೇನಾಚಾರ್ಯೆರ್ ಬರೆಯಿನ 'ಮಹಾಪುರಾಣೊ'ಡು, ಅಂಚೆನೆ ಮಹಾಪುರಾಣೊನೇ ಆಧಾರವಾದ್ ದೀವೊಂದು 'ಆದಿಕವಿ ಪಂಪೆ' ಬರೆಯಿನ ಆದಿಪುರಾಣೊಡು, ಈ ಭರತ-ಬಾಹುಬಲಿಯೆರ್ ಕತೆ ಪೊರ್ಲುಡು ಬತ್ತಿತ್ತೆಂಡ್. ಈ ರಡ್ಡೆಟ್ಲಾ ಭರತ-ಬಾಹುಬಲಿಯೆರ್ ಪ್ರಸಂಗೊಡು ಮಲ್ಲಜನ ಏರ್ ಪಂಡ - ಬಾಹುಬಲಿ. ಆಯೆ ಅಮ್ಮರೆಡ್ಲಾಲಾ ದುಂಬೇ ಮೋಕ್ಷೊಗು ಪೋಯಿನಾಯೆ; ಪೂರಾ 'ತ್ಯಾಗ' ಮಲ್ತನಾಯೆ. ಅಂಚಾದ್ ಜನೊಕ್ಲ ಪೂರಾ ಈ ಪೊರ್ತುಡು ಬಾಹುಬಲಿನ್ ಮೆಚ್ಚೊಂದಿತ್ತೆರ್ ದೇವೆರ್ಂದ್ ಪೂಜೆ ಮಲ್ತೊಂದಿತ್ತೆರ್. ಅಂಚೆನೆ ಭರತೆ ಪಂಡ ಮಲ್ಲ ಸಂಸಾರಿ, ಅಹಂಕಾರಿ, ಮೆಗ್ಗಡ ಯುದ್ಧ ಮಲ್ತದ್ ಸೋತ್‌ನಾಯೆ. ಅಂಚಾದ್ ಆಯನ ಬಗ್ಗೆ ಏರೆಗ್ಲಾ ಗೌರವ ಇಜ್ಜಾಂಡ್. ಆಂಡ ದಾಯೆಗಾ ಗೊತ್ತಿಜ್ಜಿ ಅಂಚಿತ್ತಿ ಭರತನ ಮಿತ್ತೇ ರತ್ನಾಕರಗ್ ಮೋಕೆ ಪುಟ್ಟೆಂಡ್. (ರನ್ನಗ್ ದುರ್ರೋಧನನ ಮಿತ್ತ್, ನಾಗಚಂದ್ರಗ್ ರಾವಣನ ಮಿತ್ತ್ ಪುಟ್ಟಲೆಕೆ) ಭರತನ್ ದೀವೊಂದು ದಾದಾಂಡ್ಲಾ ಪೊಸ ಸಾಧನೆ ಮಲ್ತೊಂದಿಂಡ್ ಆಯಗ್ ತೋಜಿಂಡ್. ಅಂಚ 'ಭರತೇಶ ವೈಭವ' ಬರೆಯೆ; ಗೆಂದ್ ಪುದರ್ ಪಡೆಯೆ.

ನನೊಂಜಿ ಸಂಗತಿ ಪಂಡ, ನಮ ಒಂತೆ ಪಿರ ತೂಂಡ, ಪಂಪಡ್ ಬೊಕ್ಕ ಬತ್ತಿನ ರನ್ನ ಕವಿ, ಆಯನ 'ಗದಾಯುದ್ಧಂ' ಕಾವ್ಯೊಡು ದುರ್ರೋಧನನ ಮಿತ್ತ್ ಮೋಕೆ ದೀವೊಂದು, ಆಯನೇ ಮಲ್ಲಜನಾಂದ್ ಮಲ್ತ್ ದ್ ಕಾವ್ಯೊ ಬರೆತ್ತೆ ಪನ್ನುನವು ತೆರಿಯುಂಡು. ಮುಲ್ವಲಾ ರತ್ನಾಕರನ ಪೆರ್ಮೆ ದಾದ ಪಂಡ, ರನ್ನ ದುರ್ರೋಧನನ್ ಮಲ್ಲ ಜನಾಂದ್ ಮಲ್ಲುಲೆಕ್ಕ ಕಾವ್ಯ ಬರೆಯೆಡ್ಲಾ ಪಿದಾಯಿಡ್ಲಾ ಅವನ್ ತೋಜಾವಂದೆ, ಭೀಮನ್ ಕಥತ್ತ ನಾಯಕೆಂದ್ ವಿವರ್ತೆ. ಈ ರೀತಿ ಅಡೆಂಗಾವುನ ಬೇಲೆನ್ ರತ್ನಾಕರೆ ಮಲ್ತ್ ಜೆ. ಬಹುಶಃ ರನ್ನ ತೋಜಾವಂದಿನ ಧೈರೊನು ರತ್ನಾಕರೆ ತೋಜಾಯೆ. ಇಂಚಿತ್ತಿ ಧೈರೊನು ರತ್ನಾಕರೆ ಮಸ್ತ್ ವಿಸಯೊಡು ತೋಜಾದೆಂದ್ ನಮಕ್ ತೆರಿದ್ ಬಪುಂಡು. ದುಂಬುದ ಕಾಲೊಡು ಮಲ್ಲ ಕಾವ್ಯ ಬರೆಂಡ, ಐಟ್ ಪದಿನೆಣ್ಣ ರೀತಿದ ವರ್ಣನೆಲು ಬರೊಡುಂದ್ 'ನಿಯಮ' ಇತ್ತಂಡ್. ಅಂಡ ರತ್ನಾಕರೆ 'ಭರತೇಶ ವೈಭವೊ'ಡು ಈ ಪದಿನೆಣ್ಣ ವರ್ಣನೆಲೆನ್ ಕೊಣತ್ತಿಜೆ. ಬೊಡ್ಚಿಂಡ್ ತೋಜಿನೈನ್ ಬುಡ್ ಬುಡಿಯೆ. ಉದಾರ್ಣೆಗ್ ಯುದ್ಧ ಪಂಡ ರತ್ನಾಕರಗ್ ಆವಂದ್. ಅಂಚಾದ್ ಇಡೀ ಭರತೇಶ ವೈಭವೊಡು ಯುದ್ಧದ ವರ್ಣನೆ ದಾಂತೆ ಕತೆ ಬರೆಯೆ. ಭರತ ಚಕ್ರವರ್ತಿನ ಅಜಿಪ್ಪಸಾವಿರ ವರ್ಸೊದ ದಿಗ್ವಿಜಯೊಡಾವಡ್, ಅತ್ತಂಡ ಮೆಗ್ಗೆ-ಪಲಯೆ ಪಂಡ ಭರತ-ಬಾಹುಬಲಿ-ಯುದ್ಧಗುಂತಿನ ಪೂರ್ತುಡಾವಡ್ ಯುದ್ಧೊದ ವರ್ಣನೆ ಇಜ್ಜೆ. ಮುಲ್ವ ಬಾರೀ ಪೂರ್ಲು ಪಂಡ ಇಡೀ ಭರತ-ಬಾಹುಬಲಿಯೆರ್ದೆ ಲಡಾಯಿದ ಪೂರ್ತುಡು ಯುದ್ಧ ದಾಂತೆ ಬಜೀ ಭರತನ ಪಾತೆರೊಡೇ ಬಾಹುಬಲಿ ಸೋತುಡ್ ವೈರಾಗ್ಯ ಪತ್ತಾದ್ ಪಿದಾಡ್ ಪೋಯಿನ ಸಂದಬೋನು ರತ್ನಾಕರೆ ವರ್ಣನೆ ಮಲ್ತನ ರೀತಿ. ಮುಲ್ವ ಆಯನ ಬಿರ್ಸಾದಿಗ್ ಎಡ್ಡೆ ಲಕ್ಶ್ಮದ್ ತೋಜುಂಡು. ಯುದ್ಧ ವರ್ಣನೆನ್ ಕೊರಂದಿ ರತ್ನಾಕರೆ, ಕಡಲ್ ವರ್ಣನೆ ಬನ್ನಗ್ ಮೈ ಕುಟ್ತ್ ದ್ ಉಂತುವೆ. ಇಂಚಿನೇ ಬೇತೆಲಾ ಕೆಲವು ವಿಸಯೊಡು ರತ್ನಾಕರೆ ಸ್ವಂತಿಕೆ ತೋಜಾದೆ.

ದುಂಬುದಕ್ಲ್ ಎರ್ರಾ ಕೊರಂದಿನಂಚಿತ್ತಿನ ಪ್ರಾಮುಖ್ಯತೆನ್ ಭರತಗ್ ಕೊರ್ದು 'ಭರತೇಶ ವೈಭವ' ಬರೆಯಿನ ರತ್ನಾಕರೆ ಇಡೀ ಕಾವ್ಯೊಡು ಆಯನ್ ಯೋಗ-ಭೋಗ ಸಮನ್ವಯದ ಒಂಜಿ 'ಆದರ್ಶ ಪುರುಷೆಂದ್ ವರ್ಣನೆ ಮಲ್ತೆ. ಇಡೀ ಕಾವ್ಯೊನು ಓದುಂಡ 'ಅಯ್ಯಯ್ಯ ಎಂಚ ಪೂರ್ಲಾಂಡ್'ಂದ್ ಪನ್ಪಿಲೆಕ್ಕನೇ ಉಂಡು. ನಮ ಇತೊರ್ತೆ ತೆರಿಲೆಕ್ಕ ರತ್ನಾಕರೆಲಾ ಬದ್ಡ್ ಮಾಮಲ್ಲ ರಸಿಕೆ ಆದಿತ್ತಿನಾಯೆ. ರಾಜಕುಮಾರಿನ್ ಮೋಕೆಮಲ್ತ್ ದ್ ತಿಕ್ಕದ್ ಬಾರಿನಾಯೆ. ಐಡ್ ಬೊಕ್ಕ ಮಸ್ತ್ ಬದಲಾದ್, ಧರ್ಮೊದ ವಿಷಯೊಲೆಡ್ ಎಡ್ಡೆ ಆರ್ತಿ ದೀದ್, ಆಧ್ಯಾತ್ಮದ ಮಲ್ಲ ಜನ ಆಯಿನಾಯೆ. ಭರತೇಶ ವೈಭವದ ಭರತನ್ಲಾ ಅಂಚಿನೇ ವಿವರನ್ ರತ್ನಾಕರೆ, ಸುರುಕ್ಕು, ಆಯನ ಭೋಗದ ವಿವರೊ ಕೊರಗ್ ಇತಿ-ಮಿತಿ ಇಜ್ಜಾಂದಿಲೆಕ್ಕ ಶೃಂಗಾರ ವರ್ಣನೆ ಮಲ್ತೆ. ಎತ್ ಪಂಡ ಭರತೇಶ ವೈಭವದ ಕೆಲವು ಸಂಧಿಲೆನ ಶೃಂಗಾರ ಭಾಗೊಲೆನ್ ಮಸ್ತ್ ಜನ ಪುಸ್ತಕೊಡ್ಲ ಬೇತೆ ದೆತ್ತದ್ ದೀದ್ ಗುಟ್ಟುಡು ಓದೊಂದಿತ್ತೆರ್ಗೆ. ಈ ಗ್ರಂಥೊನು ತೂದು ಕೆಲವು ಗುರು-ಹಿರಿಯೆರ್ಕ್ಲ್ 'ಶೃಂಗಾರ

ಹೆಚ್ಚಾಂಡ್'ಂದ್ ಪಂತ್‌ನೈನ್ಲಾ ನಮಕೇಂದ. ಐಯ್ಕ ಬಹಿಷ್ಟಾರ ತಿಕ್‌ಡ್‌ಂದ್‌ಲಾ ತೆರಿದ.

ಭರತೇಶ ವೈಭವೊಡು ಕತೆ ಪನ್ನಗ ರತ್ನಾಕರ ಜನೊಕ್ಕಿಗ್ ಈತ್ ಪೊರ್ತು ಗೊತ್ತಿತ್ತ ಕತೆನ್ ದಾಲ ಪನ್ನುಜೆ. ಅತ್ತಂದೆ ಇಡೀ ಕತೆಟ್ ಭರತೆ ಅತ್ತಂದೆ ಬೇತೆ ಏರೆನ್ನಾ ಮೆರೆವರ ಬುಡ್ಬುಜೆ. ಇಂಬ್ಬನ ಗ್ರಂತೊಡು ಕತೆ ಸುರುವಾಪುನೇ ಸುರುತ್ತ ತೀರ್ಥಂಕರರಾಯಿನ ಆದಿನಾಥೆರೆ ಮಗೆ, ಈ ಯುಗೊತ್ತ ಸುರುತ್ತ ಚಕ್ರವರ್ತಿ ಆಯಿನ ಭರತನ ರಾಜಸಭೆಡ್ ಅಲ್ಪ ಆಯನ ವೈಭವೊನು ವರ್ಣನೆ ಮಲ್ಪರ ಸುರುಮಲ್ತನಾಯೆ, ಸುರುತ್ತ ಪದಿನಾಜಿ ಸಂದಿಮುಟ್ಟ ಭರತ ಚಕ್ರವರ್ತಿನ ಬದ್‌ಕದ ಒಂಜಿ ದಿನ ಎಂಚ ನಡತ್ತಂಡ್ ಪಂಡ್ ವಿವರ್ಪವೆ. ಐಡ್ ಬೊಕ್ಕ ಅಜಿಪ್ಪ ಸಾವಿರ ವರ್ಸೊದ ದಿಗ್ವಿಜಯ ವಿವರ್ತ್‌ದ್ ಬೊಕ್ಕ ಭರತ-ಬಾಹುಬಲಿಯೆರ್ದ ಪ್ರಸಂಗೊಗು ಬರ್ಪೆ. ಅಲ್ಪ ಭರತನ ಪಾತೆರೊಗೇ ಸೋತುದು ಪೋಯಿನ ಬಾಹುಬಲಿ ವೈರಾಗ್ಯೊಡು ಪೋದು ತಪಸ್‌ಗ್ ಉಂತುದು ಮೋಕ್ಷ ಪಡೆಯಿ ಬೊಕ್ಕ, ಭರತನ ಅಮ್ಮ ಚಕ್ರಮ್ಮ ಅಂಚನೆ ಜೋಕುಲು ತಪಸ್‌ಗ್ ಪೋಪುನೈನ್ ವರ್ಣಿಸಾದೆ. ಕಡೆಕ್ ಮಂಡೆಡ್ ಒಂಜಿ ಬೊಲ್ಡು ಕೂಜಲ್ ತೂದು, ವೈರಾಗ್ಯ ಬತ್ತಿನ ಭರತ ಒಂತೆನೇ ಪೊರ್ತುಡು, ದಿಂಜ ಕಷ್ಟದಾಂತೆ ತಪಸ್ ಮಲ್ತ್‌ದ್ ಮೋಕ್ಷ ಪಡೆಯಿನ ವಿಷಯ ಪನ್ನೆ.

ಸೊನ್‌ಪತ್ತಾಜಿ ಸಾವಿರ ರಾಣಿನಕ್ಕನ ಒಟ್ಟುಗು ಸುಖೊಟ್ಟು ಬದ್ವಿನ ಭರತ ಸಂಸಾರದ ಕೆಸರಡ್ ಇತ್ತೆಡಲಾ, ಐಕ್ ಅಂಟಂದಿನ ತಾಮರೆದ ಪೂತ್ತಲೆಕ್ ಆಧ್ಯಾತ್ಮ ಯೋಗಿ ಆದಿತ್ತೆಂದ್ ರತ್ನಾಕರ ಪನ್ಪೆ. ಪಂಡ ಸಂಸಾರಿಲಾ ಎಡೆ ಕ್ರಮೊತ್ತ ಬದ್ಕನ್ ನಡಪ್ಪಾಂಡ ಮೋಕ್ಷ ಪಡೆವರ ಸಾಧ್ಯ ಉಂಡುಂದ್ ತೆರಿಪಾಯೆ. ತಾಮರೆದ ಪೂ ಕೆಸರಡ್ ಇತ್ತಂಡಲಾ ಏಪೊಲಾ ಸೂರೈನೇ ತೂವೊಂದಿಪ್ಪಲೆಕ್, ಸಂಸಾರೊಡಿತ್ತಂಡಲಾ ನಮನ ಮನಸ್ ಆತ್ಮ-ದೇವೆರ್ದ ಬಗ್ಗೆ ಆಲೋಚನೆ ಮಲ್ತೊಂದಿತ್ತಂಡ ಮುಕ್ತಿ ಕಷ್ಟ ಅತ್ತಂಡ್ ಪನ್ನೆ. ಭರತ ಚಕ್ರವರ್ತಿ ಇಂಚೆನೇ ಮಲ್ತ್‌ದ್ ಗೆದ್ದೆ; ನಿಕ್ಲಲಾ ಗೆಂದ್‌ಲೇಂದ್ ತೆರಿಪಾವೆ ರತ್ನಾಕರೆ.

ಭರತೇಶ ವೈಭವೊಡು ಪೊರ್ಲು ಪೊರ್ಲುದ ಮಸ್ತ್ ವಿವರಣೆಲು ಉಲ್ಲ ಒಂಜಿ ಉದಾರ್ಣೆ ಕೊರ್ದಂಡ - ಒಂಜಿ ಸಂದರ್ಭೊಡು ಭರತೆ ಪರ್ಬೊದ ದಿನ ಉಪವಾಸ, ಜಾಗರಣೆ ಮಲ್ತ್‌ದ್ ಮನದಾನಿ ಒನಸ್ ಮಲ್ತೊಡಾಂಡ ಅಪ್ಪೆ 'ಒಟ್ಟುಗು ಲೆತ್ತೊನ್ನೆ. ಆಲ್ ಉಂಡಿ ಬೊಕ್ಕ, ಅಲೆನ್ ತೂಂಕುನ ಮಂಚವುಡು ಜಿಪ್ಪುಡ್ ಆಯನೇ ತೂಂಕುವೆ. ಮುಲ್ಪ ರತ್ನಾಕರೆ ಪನ್ನೆ - ಎಲ್ಲಿಡ್ ಅಪ್ಪೆ ಭರತನ್ ತೂಂಕ್‌ದ್ ಜಿಪ್ಪುಡ್ ಸಾಲೊನು ಮಗೆ ಇಂಚೆ ಬೂಟೊದಿತ್ತೆಂದ್!'

ರತ್ನಾಕರೆ ಭರತೇಶ ವೈಭವೊಡು ಕತೆಟ್ ನೆಡ್ ದುಂಬು ಏರಾ ಬರೆವಂದ್‌ನ ಕೆಲವು ಸಂಗತಿಲೆನ್ ಬರೆದ್ ಸೇರ್ಪಾದ್ ಬಿಸಾರ್‌ದಿಗೇ ತೋಜಾದೆ. ಮುಖ್ಯವಾದ್, ಭರತೆ ಅಜಿಪ್ಪ ಸಾವಿರ ವರ್ಸೊ ದಿಗ್ವಿಜಯ ಮಲ್ತ್‌ದ್ ಆಜಿ ಖಂಡೊಲೆನ್ ಗೆಲ್ತ್‌ದ್ ಬತ್ತಿನ ಪೊರ್ತುಡು, ಊರ್ದಂಚಿ ಪೋನಗ ಗಡಿಟ್ ಚಕ್ರ ಉಂತುಂಡು. ದಾಯೆಗ್‌ಂದ್ ಕೇನ್ನಗ ಭರತನ ಮೆಗ್ಗುರು ಆಯಗ್ ತರೆಬಗ್ಗಾವಂದೆ ಅವು ದುಂಬು ಪೋಪುಜೀಂದ್ ಗೊತ್ತಾಂಡ್. ಕಡೆಕ್ ಅಕ್ಕಿಗ್

ಆಯೆ ಕಾಕಜಿ ಕಡಪುಡಿಯೆ. ಆಕ್ಲ ಇಂಚಿ ಬರಂದೆ ಅಂಚಿ ತಪಸ್ಗ್ ಪೋಯೆರ್. ಅಪಗ ಬಾಹುಬಲಿನಾಂಡ್ಲಾ ಒಲಿತೊಂದ್ ಬಲಾಂದ್ ದಕ್ಷಿಣಾಂಕನ್ ಕಡಪುಡಿಯೆ. ಆಂಡ ಬಾಹುಬಲಿ ಬರಿಯರ ಒಪ್ಪಂದೆ ಯುದ್ಲೊಗು ಬರ್ಪೆಂದ್ ಪಂಡ್ ಪಂಡ್ ಕಡಪುಡಿಯೆ. ಆ ಸುದ್ದಿ ಕೇಂದ್ ರಾತ್ರೆ ನಿದ್ರೆ ಬರಂದೆ ಭರತ ಪಿದಾಯಿ ಬತ್ತದ್ ತಿಗೊಂದಿತ್ತೆ. ಅಪಗ ರಡ್ಡ್ ಜನ ಸೈನಿಕರ್ ಪಾತೆರೊಂದಿತ್ತರ್. ಆಕ್ಲ ಇರ್ವರಾ ಭರತ ಸೈನಿಕೆರಡ್ಲಾವರ ಮಲ್ಲ ಜನ ಆಯೆ. ಸೈನಿಕರ್ ಅತ್ತಾಂಡ ಆಯೆ ಆಜಿ ಖಂಡೊಲೆನ್ ಗೆಲ್ವರೆ ಸಾಧ್ಯ ಇತ್ತಿಜಿಂದ್ ಪನೊಂದಿತ್ತರ್. ಐನ್ ಕೇಂಡ್ಲಾ ಬೇಜಾರಾಯಿನ ಭರತ ಮನದಾನಿ ರಾಜಿ ಸಭೆಗ್ ಬನ್ನಗ ಬೋಡುಂದೆ ಕಿನಿಕಿರಿ ಬಿರಲೆನ್ ಬಗ್ಗಾವೊಂದು ಬತ್ತೆ. ಏರಾಂಡ್ಲಾ ಆ ಬಿರಲೆನ್ ಸರ್ತ ಮಲ್ಪುಲೇಂದ್ ಕೇಂಡೆ. ಮಾತಾ ಪ್ರಯತ್ನ ಮಲ್ತರ್. ಐಕ್ ಬಂಗಾರ್ಡ್ಲಾ ಸರಪೊಳಿ ಪಾಡ್ಲಾ ಮಾತಾ ಸೈನಿಕರ್ ಪತ್ತದ್ ಒಯಿತರ್. ಆಂಡಲಾ ಸರ್ತ ಆಯಿಜಿ. ಕಡಕ್ ಭರತನೇ ದೇವರೆ ಪುದರ್ ಪಂಡ್ ಸರ್ತಮಲ್ಲೆ. ಉಂದು ರತ್ನಾಕರೆನೆ ಪೊಸತಾದ್ ಸೃಷ್ಟಿ ಮಲ್ತಿನ ಕತೆ. ಕತೆತ್ತ ನಾಯಕೆ ಆಯನ ಭರತನ ತಾಕತ್ತ್ ಎಂಚಿನಾಂದ್ ತೆರಿಪಾವುನವು ಆಯನ ಉದ್ದೇಶ. ಇಂಚಿನೆನೆ ಕೆಲವು ಪೊಸ ಸಂಗತಿಲೆನ್ ರತ್ನಾಕರೆ ಈ ಕಾವೊಡು ಸೃಷ್ಟಿ ಮಲ್ತದೆ.

ಭರತೇಶ ವೈಭವೊಡು ರತ್ನಾಕರೆ ನಮನ ತುಳುನಾಡ್ಡ್ ಮಸ್ತ ವಿಷಯೊಲೆನ್ ವಿವರ್ದೆ. ಮುಖ್ಯವಾದ್ ನಮನ ಕಡಲ್ ನ ಮುಲ್ಪ ಭಾರೀ ಪೊರ್ಲುಡು ವರ್ಣನೆ ಮಲ್ತದೆ. ಅವ್ವತ್ತಾಂದೆ ನಮನ ಭೂತೊಲೆನ ವಿಷಯೊಲಾ ನಮಕ್ಕ್ ನೆಟ್ತ್ ತಿಕ್ಕುಂಡು. ಭರತನ ದಿಗ್ವಿಜಯೊದ ಪೊರ್ತುಡು, ಆಯೆ ಮ್ಲೇಚ್ಚೆರೆ ಖಂಡೊಗು ಬರ್ಪೆ. ಅಲ್ಪ ಆವರ್ತ ಬೊಕ್ಕ ಚಿಲಾತ ಪನ್ನಿ ರಡ್ಡ್ ಪೊಡಿ ಅರಸುಲ್ಕಲ್ ಭರತಗ್ ಕೈಮುಗ್ಗಂದೆ, ಭೂತೊಲೆಗ್ ಕೈಮುಗ್ಗಿದ್, ನಿಕ್ಲೆ ಕಾವೊಡುಂದ್ ಕೆಂಡೊನ್ನೆರ್. ಅಪಗ ಕಾಲಮುಖ-ಮೇಘಮುಖ ಪನ್ನಿ ಆ ಭೂತೊಲು ಬತ್ತದ್ ಎಣ್ಣಿದಿನ ರಾತ್ರ-ಪಗಲ್ ಭಾರೀ ಜೋರುದ ಬರ್ಪೆ ಬರ್ಪಾದ್ ಉಪದ್ರ ಕೊರ್ಪೆರ್. ಆಂಡ ಭರತನ ಜನೊಕ್ಲ ಐಕ್ಲೆನ್ ಹಾಕ್ ದ್ ಗಿಡರ್ವೆರ್. ಉಂದು ಅತ್ತಾಂದೆ ಜೈನೇರ್ ತುಳುನಾಡ್ ದ ಮದಿಮೆ, ತಾಳಿಬಂದಿದ ವರ್ಣನೆಲಾ ನಮಕ್ಕ್ ನೆಟ್ತ್ ತಿಕ್ಕುಂಡು. ಭರತೆ ನಾಟಕ ತೂವರೆ ಪೋಯಿನ ಪೊರ್ತುಗು, ಔಲು ನಡಪುನ ನೃತ್ಯೊಲು, ಪರಂಪರೆದ ಯಕ್ಷಗಾನದ ವರ್ಣನೆಲುಂದ್ ಗೊತ್ತಾಪುಂಡು. ಅಂಚೆನೆ ನಮನ ಮುಲ್ಪದ ಪ್ರಕೃತಿದ ವರ್ಣನೆ, ನವರಾತ್ರಿ, ರಥೋತ್ಸವೊಲೆನ ವರ್ಣನೆಲಾ ತಿಕ್ಕುಂಡು. ಬುಡೆದಿ ಕುಸುಮಾಜಿ ಗಿಳಿಟ್ಟ ಕಂಡನೆ ಭರತನ್ ಪುಗರ್ನ ಪೊರ್ತುಗು ಕೊರ್ಪಿನ ಪದ್ ಪೆದ ಬಿತ್ತ್, ಕುಂಬುಡ್ಲ ಬಿತ್ತ್, ತಾರಾಯಿ, ಕಂಬು, ನೇರಳೆದ ಪಂದ್ ದ 'ಉಪಮೆ'ಲು ಪೂರ ನಮನ ತುಳುನಾಡ್ ದನೆ. ಇಂಚಿ ಮಸ್ತ ಪೊರ್ಲುಡ 'ಭರತೇಶ ವೈಭವ' ಏರ್ ಓದುಂಡಲಾ ಮಸ್ತ ಕುಸಿ ಕೊರ್ಪಿನ ಕೃತಿ.

ಶತಕೊಳು : ರತ್ನಾಕರೆನ ಭರತೇಶ ವೈಭವೋ ಒಂಜಿ ಶೃಂಗಾರಭರಿತವಾಯಿನ ಮಹಾ ಕಾವ್ಯಾಂದಾಂಡ, ಶತಕೊಳು ಜೈನ ಧರ್ಮೊಗು ಸಂಬಂಧಪಟ್ಟಿನ ಆಧ್ಯಾತ್ಮ ಕಾವ್ಯೊಲು.

ಈ ಶತಕೂಲೆಡ್ವಾತ್ರನೆ ತೆರಿನ ಜನಕ್ಕುಲು ಆಯನ್ “ಕನ್ನಡೊದ ಕುಂದ ಕುಂದಾಚಾರ್ಯೊಂದ್” ಲೆತ್ತದರ್. ಒಂಜಿ ರೀತಿಡ್ ಈ ಶತಕೂಲು ಪೂರಾ, ಆಯನ್ ಬದ್ಕಡ್ ರಸಿಕತೆನ್ ಪೂರಾ ಬುಡ್ಡ್ ಮಸ್ತ್ ಜೀವನೊದ ಅನುಭವೊಲೆನ್ ಪಡೆಯಿ ಬೊಕ್ಕ ಬರೆಯಿನಂಚಿತ್ತಿ ಕಾವ್ಯೊಲು. ಐಕ್ಲೆಡ್ ಮುಖ್ಯವಾದ್ ಆಧ್ಯಾತ್ಮ ಅಂಚೆನೆ ನೀತಿ ಬೋಧನೆ ಉಂಡೆತ್ತಂದೆ ಬೇತೆದಾಲ ಇಜ್ಜಿ ರತ್ನಾಕರ ಬರೆಯಿನ ಶತಕೂಲು ಮೂಜಿ 1) ರತ್ನಾಕರ ಶತಕ 2) ಅಪರಾಜಿತ ಶತಕ 3) ತ್ರಿಲೋಕ ಶತಕ. ಉಂದೆತ್ತಂದೆ ಸೋಮೇಶ್ವರ ಶತಕಲಾ ಉಂಬೆನೇ ಬರೆಯಿನೀಂದ್ ಕೆಲವುದಕ್ ಬೇತೆ ಬೇತೆ ಕಾರಣ ಕೊರು ಪಂಡೆರ್ಡಲಾ, ಅವೆನ್ ಮಸ್ತ್ ಜನ ಹಿರಿಯೆರ್ಕ್ಕಲ್ ಒಪ್ಪುಚೆರ್. ಅಂಚಾದ್ ಅವೆನ್ ಬುಡ್ಡ್ ಈ ಮೂಜೈತ ಬಗ್ಗೆ ಒಂತೆ ತೂಕ.

ಎಲ್ಲೆಡ್ಲೇ ಕವಿಯಾಯಿನ ರತ್ನಾಕರ ಬೇತೆ ಬೇತೆ ಸಂದರ್ಭೊಲೆಡ್ ರಾಜನ, ಗುರುಕ್ಲೆನ, ಜನೊಕ್ಲೆನ, ಕೋಪೊಗು ಕೆಲವು ಸರ್ತಿ ಪೆಗ್ ತಿಕ್ಕಾದ್ ಬೂರಿನಾಯೆ. ಜವನಾದಿಗಡ್ ಒಂತೆ ಪೊಣ್ಣ ಮೋಕೆದ ಮರ್ಲ್ ಕಟ್ಪೊ ಒಂತೆ ಬೇನೆ ತಿಂದಿನಾಯೆ. ಊರೂರು ತಿರ್ಗದ್ ಜನೊಕ್ಲೆನ್ ತೂದ್ ಬದ್ಕ ಪಂಡ ಎಂಚಿನಾಂದ್ ತೆರಿದ್ನಾಯೆ. ಆತ್ತಂದೆ ಎಡ್ಡೆಡ್ಲೆ ಧರ್ಮ ಗ್ರಂಥೊಲೆನ್ ಎಡ್ಡೆ ಮೋಕೆ ದೀದ್ ಓದುದ್ ಮಸ್ತ್ ವಿಷಯ ತೆರಿನಾಯೆ. ಉಂದು ಮಾತ ಸೇರ್ಪ್ಪೆ ಲೋಕೊದ ಜನಕ್ಲೆಗ್ ಎಡ್ಡೆ ನೀತಿದ ಪಾಠ ಪನ್ನಿನ ಕೋಶೊಲಾದ್ ಶತಕೂಲು ಮೂಡ್ತು ಬತ್ತ. ಅಂಚಾದ್ ಈ ಶತಕೂಲೆಡ್ ಇತ್ತಾನ ಪದ್ಯೊಲು ಮಾತಾಕಾಲೊದ ಜನೊಕ್ಲೆಗ್ಲಾ ಪಾಪೊಡು ಮುರ್ಕಡೆಂದ್ ಲೆತ್ತಲೆತ್ತ ಪನ್ನಿಲೆಕ್ಕ ತೋಜುಂಡು. ಕೆಲವು ಪದ್ಯೊಲು ಹಾಳ್ ಬೇಲೆ ಮಲ್ಪಿನ ಜನಕ್ಲೆಗ್ ಚಾಟಿಡ್ ಪೆಟ್ಪ ಕೊರಿಲೆಕ್ಕ ತೋಜುಂಡು.

ರತ್ನಾಕರ ಶತಕೊ ನಾಲ್ಗೆರೆತ್ತ (ಚೌಪದಿ) ನೂತ್ತಿರೆತ್ತೆಣ್ಣ ಪದ್ಯೊಲುಪ್ಪನೆ ಒಂಜಿ ಕಾವ್ಯೊ. ನೆಟ್ಪೆ ಜೈನಧರ್ಮೊಗು ಸಂಬಂಧಪಟ್ಟಿನ ರತ್ನತ್ರಯೋ, ಆತ್ಮಾನ ಸ್ವರೂಪ, ಮೋಕ್ಷ ಸಾಧನೆ ಮಲ್ಪುನಾಯನ ಮನಸ್ ಇಪ್ಪೊಡಾಯಿನ ರೀತಿ, ದೇಹೊದ ಅಸ್ಥಿರತೆ, ಸಂಸಾರ, ಭವಮಾಲೆ, ವೈರಾಗ್ಯ, ಅಹಂಕಾರ, ಪಾಪೊ-ಪುಣ್ಯ, ಮೋಕ್ಷ, ಪೂಜೆ, ದೇವೆರ್ ಪುದರ್ ಪನ್ನಿತ್ತೆತ್ತ ಮಹತ್ವೊ, ಮಂತ್ರೊದ ಪೆರ್ಮೆ - ಇಂಚ ಮಸ್ತ್ ವಿಷಯೊಲೆನ್ ರತ್ನಾಕರ ವಿವರ್ದೆ.

ರತ್ನಾಕರ ಶತಕೊ ಪುಸ್ತಕೊಡು, ಕವಿ ಪಂಡಿನ ಕೆಲವು ಮುಖ್ಯ ವಿಷಯೊಲು ಇಂಚ ಉಂಡು : “ನಮ ಏಪೊಲಾ ತುತ್ಪತ, ಪದ್ವೇಯಿ ಬಂಗಾರ್ ಪಾಡ್ ನಮನ್ ಪಿದಾಯಿಡ್ ಸಿಂಗಾರ ಮಲ್ಪುವ. ಆಂಡ ಉಂದು ದಾಲಾ ಪ್ರಯೋಜನ ಇಜ್ಜಿ. ಉಲಾಯಿ ಆತ್ಮೊನು ಸಿಂಗಾರ ಮಲ್ಪುಲೆಕ್ಕ ಎಡ್ಡೆ ಧರ್ಮೊದ ವಿಚಾರೊಲೆನ್ ನಂಬುನ, ತೆರಿಯುನ, ಆಚರಣೆ, ಕಮ್ಮೆನ ಮಲ್ಪುನ ಮುಖ್ಯೊ. ಆ ಆತ್ಮೊ ಓಲುಂಡು ಕೇಂಡ, ಅವೆನ್ ಕಣ್ಣೊಡ್ ತೂವರೆ ಆಪುಜಿ, ಅನುಭವೊಡು ತೆರಿಯೊಲಿ (ಸಕ್ಕರೆದ ತೀಪೆನ್ ತೆರಿಲೆಕ್ಕ) ಕಲ್ಲ್ಡ್ ಬಂಗಾರ್, ಪೂಟ್ಪ ಪರಿಮಳೊ, ಪೇರ್ಡ್ ನೈ, ಕನಕ್ಡ್ ತೂ ಇತ್ತಿಲೆಕ್ಕ ನಮನ ಸರೀರೊಡು ಆತ್ಮ

ಉಂಡು. ಅವೆನ್ ತೆರಿಯುನ ಪ್ರಯತ್ನ ಮಲ್ತೊಡು. ನಮನ ಸರೀರ ಸ್ಥಿರ ಆತ್ಮ, ಆತ್ಮ ಮಾತ್ರ ಸ್ಥಿರ. ಅಂಚಾದ್ ಸರೀರೊದ ಬಗೆಟ್ ದಿಂಜ ಯೋಚನೆ ಮಲ್ಪುನತ್ತ್. ಆತ್ಮನ ಬಗ್ಗೆ ಆಲೋಚನೆ ಮಲ್ತೊಡು. ಏರಾಂಡ್ಲ ಸೈತ್ಯಾಂಡ ನಮ ಬುಲಿಪುವ. ಆಂಡ ಬದ್‌ಕ್‌ಡ್ ಏರ್ ಬೇತಕ್ಲೆನ ಸೇವೆ ಮಲ್ತೊಂದು, ಮನಸ್‌ಡ್ ಆತ್ಮನ್ ಚಿಂತನೆ ಮಲ್ತೊಂದು, ದುಡ್ಡು-ಕಾಸ್‌ನ್ ಎಡ್ಡೆ ಧರ್ಮೋ ಕಾರ್ಯಾಲೆಗ್ ವಿನಿಯೋಗ ಮಲ್ತೊಂದ್ ಕಳಪ್ಪನಾ ಆಯಾಗಾತ್ರ ಏರಾ ಬುಲಿಪುರ ಬಲ್ಲಿ; ಆಂಡ ಸ್ವಾರ್ಥಿಯಾದ್, ದೇವೆರೆನ್ ಆತ್ಮನು ಆಲೋಚನೆ ಮಲ್ಪಂದೆ, ದಾನ- ಧರ್ಮ ಮಲ್ಪಂದೆ ಬದ್‌ಕ್‌ಡ್ ಸೈಪನಾ ಅಂಚಿ ಪಾಪಿಗೋಸ್ಕರ ಮಾತೆರಾ ಬುಲಿಪೊಡು..." ಪಂಡ್‌ಡ್ ರತ್ನಾಕರೆ ಪನ್ನೆ.

ರತ್ನಾಕರ ಶತಕೊನು ಅಂಚೆನೆ ತೂವೊಂದು ದುಂಬು ಪೋಂಡ ರತ್ನಾಕರೆ, ಏರ್ ಪೊಣ್ಣು ಮಣ್ಣ್ ಬಂಗಾರ್‌ದಂಚಿನ ವಿಷಯೊಲೆಡ್ ಬೂರು ಪರಡೊಂದುಲ್ಲೆರಾ ಆಕ್ಲೆನ ಬಗೆಟ್ ಮಸ್ತ್ ಬೇಜಾರ್ ಮಲ್ತೊನುವೆ. ಬೊಡ್ಡಾಂದಿ ವಿಷಯೊಡು ಮೋಕೆ ದೀವೊಂದು ಬೋಡಿತ್ತಿನೈನ್ ಮದತ್ತ್‌ಡ್ ಬುಡಿನ ಜನೊಕುಲ್ ಬಗೆಟ್ ಬೇಜಾರ್ ಮಲ್ತೊಂದು, ಅಂಚಿನಕ್ಲೆನ್ ದೇವೆರೇ ಕಾಪೊಡುಂದ್ ನಟ್ಪವೆ. ಆಯೆ ಪಂಡಿಲೆಕ್ಕ್ ಏರೆಗ್ ಕಷ್ಟ ಬತ್ತನಪಗ ವೈರಾಗ್ಯ ಬರ್ಪುಂಡಾ ಅವು ನಿಜವಾಯಿನ ವೈರಾಗ್ಯ ಆತ್ಮಗ್. ಸುಖೊಟ್ಟು ಬರ್ಪುನ ವೈರಾಗ್ಯೋನೇ ನಿಜವಾಯಿನ ವೈರಾಗ್ಯಂದ್ ಪನ್ನೆ.

ಬದ್‌ಕ್‌ಡ್ ಪಾಪ-ಪುಣ್ಯನೇ ಮುಖ್ಯಾಂದ್ ಪನ್ನಿನ ರತ್ನಾಕರೆ, ಪಾಪೊಡ್ ದುಃಖ, ಪುಣ್ಯೊಡ್ ಸುಖ ಪಡೆಪ್ಪುನ ನಮ ಜೀವನೊಡು ಜಾಗ್ರತೆ ಮಲ್ತೊಡುಂದ್ ಪನ್ನೆ. ನಮ ಪುಣ್ಯದ ಕೆಲಸ ಮಲ್ತೊಡು ಪನ್ನಿನ ಆಯೆ, ನಮನ ದುಂಬುದ ಜನ್ಮೊದ ಪುಣ್ಯೊಡ್ಲಾತ್ರ ನಮಕ್ ದುಡ್ಡು-ಕಾಸ್ ಮಾತ ತಿಕ್ಕುಂಡು. ಐನ್ ದಾನ-ಧರ್ಮಗು ಉಪಯೋಗ ಮಲ್ತೊಡು. ದಾಯೆ ಪಂಡ ಎಡ್ಡೆ ಬೇಲೆಗೆ ವಿನಿಯೋಗ ಮಲ್ಪಂದೆ ದೀಂಡ ದುಡ್ಡು ದಾಲ ಒರಿಯುಜಿ. ಕೌರವೆ ಪಾಂಡವೆರೆಗ್ ದಾಲಾ ಕೊರ್ಪುಜೀಂದ್ ಪಂಡೆ ಆಂಡ ಆಯಗ್ ಒರಿಂಡಾ? ಪಂಡ್‌ಡ್ ರತ್ನಾಕರೆ ಕೇನುವೆ.

ಏಪೊಲಾ ನಮನ ಬದ್‌ಕ್ ಕೆಸರ್ದೆ ಲೆಕ್ಕಂತಿನ ಸಂಸಾರೊಡು ಇತ್ತಾಂಡ್‌ಲಾ, ನಮನ ಮನಸ್ ಐಟಿತ್ತಿ ತಾಮರೆದ ಪೂ ಸೂರ್ಯನ್ ತೂಯಿಲೆಕ್ಕ್ ಆತ್ಮನ್-ಪರಮಾತ್ಮನ್ ತೂವೊಡು. ಗಾಳಿಪಚೊ ಮಿತ್ತ್ ಬಾನೊಡು ತಿರ್‌ಗ್‌ಂಡಲಾ ಐತ್ತ ಬಲ್ಲದ ಕೊಡಿ ನಮನ ಕೈಟ್ಟಿ ಇತ್ತಿಲೆಕ್ಕ್ ನಮನ ಮನಸ್‌ಲಾ ಓಡೋಡೆ ಪೊಂಡಲಾ ಅವೆನ್ ಏಪೊಲಾ ದೇವೆರೆ ಪಾದೊನು ನೆನೆಪ್ಪನ್ನೆಟ್ ದೀವರ ಪ್ರಯತ್ನ ಮಲ್ತೊಡುಂದು ಪನ್ನೆ ರತ್ನಾಕರೆ. ಅಂಚೆನೆ ಅಧಿಕಾರ-ಅಂತಸ್ತ್ ಪಂಡ್‌ಡ್ ಮೆರೆಪ್ಪುನ ರಾಜೆರ್‌ಕ್‌ಲೆನ್, ಮಲ್ಲ ಜನೊಕ್ಲೆನ್ ಟೀಕೆ ಮಲ್ಪುನ ಕವಿ ನಮಕ್ ಎಂಚಿನ ಒದಗ್‌ಡ್ ಬತ್ತಂಡಲಾ ಅವು 'ಪೂರ್ವಾರ್ಜಿತ' ಕರ್ಮೊಡ್ಲ ಬರ್ಪುನು. ಐಕ್ ಅಹಂಕಾರ ಮಲ್ಪರೆ ಬಲ್ಲಿ ಪಂಡ್‌ಡ್ ಕಡೆಕ್ಕ್ ಎಂಚಿನ ಇತ್ತಾಂಡಲಾ ನಮ ನಮನ ಸರೀರದ ಮಿತ್ತದ ಆಸೆನ್ ಬುಡ್ಡೆ ಐಡ್ಡೆ ಬೇತೆ ಆದುಪ್ಪುನ ಆತ್ಮನ್ ತೆರಿದ್ ತೂದ್, ಐಟ್ಟೇ ದೇವೆರೆನ್

ತೂವೊಂದು, ಕಡೆಕ್ ನಮಲಾ ದೇವೇರೇ ಆಪುನವು ನಮ ಮಲ್ಯೊಡಾಯಿನ ಬೇಲೆಂದ್ ಪನ್ನೆ. ಈ ಶತಕೊದ ಕಡೆಟ್ ದೇವರೆನ ಪುದರ್ ಬೇತೆ ಬೇತೆ ಇತ್ತಂಡಲಾ, ಅವು ಕಡೆಕ್ ಸೇರುನು ಒಂಜೇ ಕಡೆಕ್ ಪಂಡ್ಲ್ ಆ ಮಾತಾ ಪುದರ್ ಡಿತ್ತಿನ ದೇವರೆನ್ ತೆರಿದ್ ಸುಖೊ ಪಡೆಪ್ಪನ ಭಾಗ್ಯೋ ನಮಕ್ ಬರೊಂಡುಂದ್ ರತ್ನಾಕರೆ ತೆರಿಪಾದೆ.

ರತ್ನಾಕರೆ ಬರೆಯಿನ ನನೊಂಜಿ ಶತಕೊ 'ಅಪರಾಜಿತೇಶ್ವರ ಶತಕ'. ಆಯೆ ರತ್ನಾಕರ ಶತಕೊನು ಸಂಸಾರಿಯಾಯಿನ ಗೃಹಸ್ಥರೆಗ್ ಬರೆಯೆಂಡ, ಅಪರಾಜಿತ ಶತಕೊನು ಸಾಧನೆ ಮಲ್ಪುನ ಸಾಧಕರೆಗ್ ಬರೆಯಿಲೆಕ್ಕ ತೋಜುಂಡು. ಅಂಚಾದ್ ವಿದ್ವಾಂಸರಾಯಿನ ಜಿ. ಬ್ರಹ್ಮಪ್ಪೆ ರತ್ನಾಕರ ಶತಕೊನು 'ಸಾಗಾರ ಶತಕ' ಪಂಡ್ಲ್ ಲೆತ್ತೆರ್, ಅಪರಾಜಿತ ಶತಕೊನು 'ಅನಾಗಾರ ಶತಕ' ಪಂಡ್ಲ್ ತೆರಿಪಾದೆರ್. ತಾರ್ಕಣೆ ತೂಂಡ ಉಂದು ರತ್ನಾಕರ ಶತಕೊಡ್ ಒಂತೆ ಗಟ್ಟಿ ಉಂಡುಂದು ಪನೊಲಿ. ಜೈನ ಧರ್ಮೋದ ಮೂಲ ತತ್ವವಾಯಿನ ರತ್ನತ್ರಯೊಡ್ಲೇ ಈ ಶತಕೊಲ್ನಾ ಸುರುಮಲ್ತನ ರತ್ನಾಕರೆ, ಬದ್ಕಾಗ್ ಬೋಡಾಯಿನ, ಸಾಧನೆ ಮಲ್ಪರ ಉರ್ಬ್ ಹೆಚ್ಚಾವುನ ಪಾತೆರೊಲೆನ್ ಪನ್ನೆ.

ಅಪರಾಜಿತ ಶತಕೊಡು ಬರ್ಪುನ ಕೆಲವು ಮುಖ್ಯೊ ಎಡ್ಲೆ ಪಾತೆರೊಲು ಇಂಚ ಉಂಡು - "ಧರ್ಮೋದ ತತ್ವೊಲೆನ್ ಎಡ್ಲೆ ತೆರಿಯೊಡು, ನಂಬೊಡು, ಆಚರಣೆ ಮಲ್ಪೊಡು. ಅಪಗ ಮಾತ್ರ ಪ್ರತಿಯೊರಿಲಾ ತನ್ಕಾಲೆ ಆತ್ಮೊನು ಪರಮಾತ್ಮ ಸ್ಥಿತಿಕ್ ಕೊಣವೊಲಿ. ಪ್ರತಿಯೊರಿಲಾ ಧ್ಯಾನ ಮಲ್ಪುನ ಮೂಲಕ ನಿಜವಾಯಿನ ಆತ್ಮನ ಸ್ವಭಾವೊನು ತೆರಿಯೊಲಿ. ಆಂಡ ಮನಸ್ ನ ಓಲೋಲು ಪೋವರ ಬುಡಿಯೆರೆ ಬಲ್ಲಿ; ಅಪಗ ಮಾತ್ರ ಸಾಧನೆ ಮಲ್ಪೊಲಿ. ಬದ್ಕಾದ್ ಆತ್ಮೊಗು ಅಂಚಿನ ಕರ್ಮಲೆನ್ ನಾಶಮಲ್ಪುನವ್ವೆ ಮುಖ್ಯ ಆವೊಡು. ಸಂಸಾರೊ, ಆತ್ಮನ ವಿಷಯ ಬುಡ್ಡು ಬೇತೆ ಕಡೆಕ್ ಮನಸ್ ನ್ ಒಯ್ಪುನ ಕೇಂದ್ರೊ. ಅವೆಟ್ ಏಪೊಲಾ ನಮನ ಸರೀರ ಸುಕೊತ್ತ ಯೋಚನೆ ಇಪ್ಪುಂಡತ್ತಾಂದೆ, ಆತ್ಮನ ನೆನಪಿಪ್ಪಜಿ. ಅಂಚಾದ್ ನಮ ಏಪೊಲಾ ಈ ಸರೀರೊ ಒಂಜಿ ದೇವಸ್ಥಾನದ ಲೆಕ್ಕಂದ್ ತೆರಿದ್, ಮನಸ್ ದ ಪೀಠೊಡು, ಪವಿತ್ರವಾಯಿನ 'ಆತ್ಮ' ಪನ್ನಿ ದೇವರೆನ್ ದೀವೊಂದು, ಕಣ್ಣ್ ಮುಚ್ಚಿದ್, ಆ ಶುದ್ಧಾತ್ಮನೇ ಏಪೊಲಾ ನಿನೆಪ್ಪೊಡು. ಅಂಚೆ ಆತ್ಮನಂಚಿ ಮನಸ್ ನ್ ಒಯಿಪರಗೋಸ್ಕರ ಪೂಜೆ, ಭಕ್ತಿ, ವ್ರತ, ನಿಯಮ ಮಲ್ಪೊಡು" ಪಂಡ್ಲ್ ರತ್ನಾಕರೆ ಪನ್ನೆ.

ರತ್ನಾಕರ ಶತಕೊಗು ತಾರ್ಕಣೆ ಮಲ್ತಂಡ ಅಪರಾಜಿತ ಶತಕೊನು ರತ್ನಾಕರೆ ನನಲಾತ್ ಅನುಭವೊಡು ಗಟ್ಟಿ ಆಯಿಬೊಕ್ಕ ಬರೆಯಿಲೆಕ್ಕ ತೋಜುಂಡು. ಆತ್ಮೊನು ಜೈನ ತತ್ವ ಪ್ರಕಾರ 'ಪರಮಾತ್ಮ ಸ್ಥಿತಿಕ್ ಕೊಣೊಪ್ಪುನಂಚಿನ ಸಾಧಕರೆಗ್ ಈ ಅಪರಾಜಿತ ಶತಕ ಮನ್ತ್ ಎಡ್ಲೆಂತಿ ಕಾವ್ಯೊಂದ್ ಪನೊಲಿ. ಈ ಪುಸ್ತಕೊಡು ಅಲ್ಪ ರತ್ನಾಕರೆ, ಯಾನ್ ಸಂಸಾರೊದ ಸುಖ-ಭೋಗೊಡು ಬೂರ್ಲು ಹಾಳಾಯೆ, ಈ ಸರೀರ, ಮೋಕೆ ಎನನ್ ಹಾಳ್ ಮಲ್ತಂಡ್ ದುಃಖ ಮಲ್ಪುವೆ. ಪಂಡ ಉಂದೆನ್ ಓದಿನ ಸಂಸಾರಿ ಸರೀ ತೆರಿದ್ ಇಂಚೆನೆ ಬೇಜಾರ್ ಮಲ್ಪೊಡು ಪನ್ನಿನ ಸಂದೇಶ ಕೊರ್ಪೆ ವಾ ಪೊಣ್ಣು ಮಣ್ಣ್ ಬೊಲ್ಲಿ-

ಬಂಗಾರ್, ಆಸೆ-ಮೋಕೆಲೆಡ್ಲ ಬೂರಂದೆ ಬಟಾವಾಲೆ ಪಂಡ್‌ದ್ ಎಚ್ಚರಿಸಾವೆ. ಪರಿಗ್ರಹೋನೇ ನಮನ್ ಹಾಳ್ ಮಲ್ಪುಂಡು. ನಮನ ಶರೀರೊಲಾ ಒಂಜಿ ಪರಿಗ್ರಹಾಂದ್ ತೆರಿದ್, ಐತ ಆಸೆ ಬುಡ್ಡು ಆತ್ಮನ್ ಎಡ್ಲೆ ಮಲ್ಪುರ ಮನಸ್ ಕೊರ್ಲೆ ಪಂಡ್‌ದ್ ಜನೊಕ್ಲೆಗ್ ರತ್ನಾಕರೆ ಸೂಚಿಸಾಬೆ. ಉಂದುವೇ ಪೂರ್ತುಡು ಪಿದಾಯಿಡ್ಲ ಸನ್ಯಾಸಿ-ತ್ಯಾಗಿಲೆನ ವೇಷ ಪಾಡೊಂದು, ಉಲಾಯಿ ಮೋಕೆ, ಅಹಂಕಾರ, ಕಿಚ್ಚಿಲೆನ್ ದೀವೊಂದಿಪ್ಪುನಕ್ಲೆನ್ ಮಸ್ತ್ ಕಡೆಕ್‌ಡ್ ಟೀಕೆ ಮಲ್ಪುನ ರತ್ನಾಕರೆ ಮನಸ್ ಶುದ್ಧ ದೀವೊನೊಡು, ಸಾಧನೆ ಮಲ್ಪೊಡುಂದ್ ತೆರಿಪಾವೆ. ಕಡೆಟ್ ಆಯೆ, ತಾನ್ ಬೇತೆಕ್ಲೆಗ್ ಪನ್ನುಜಿ, ಎಂಕೇ ಪನ್ನೆ ಪಂಡ್‌ದ್ ದೇವೆರಾಯಿನ ಅಪರಾಜಿತೇಶ್ವರನ್ ಸ್ತುತಿ ಮಲ್ತ್‌ದ್ ಎನನ್ ಕಾಪುಲೇಂದ್ ನಟೊನುವೆ. ಒಟ್ಟುಡ್ ಈ ಶತಕೊಡು ರತ್ನಾಕರೆ ನಮಕ್ ಒರಿ ಮಾಮಲ್ಲ ಯೋಗಿಯಾದ್ ತೋಜಿದ್ ಬರ್ಪೆ ಎಡ್ಲೆ ಸಂದೇಶೊಲೆನ್ ಕೊರ್ಪೆ.

ರತ್ನಾಕರೆ ಬರೆಯಿನ ನನೊಂಜಿ ಶತಕೋ 'ತ್ರಿಲೋಕ ಶತಕ'. ಉಂದು ಜೈನ ಧರ್ಮೋದ ಪ್ರಕಾರ ಈ ಇಡೀ ಜಗತ್ತ್ ಎಂಚ ಉಂಡು ಪನ್ನಿನ ವಿವರೊನು ಕೊರ್ಪುಂಡು. ಪಂಡ ಜೈನ ಸಿದ್ಧಾಂತೊದ ಪ್ರಕಾರ, ಪ್ರತಿಯೊಂಜಿ ಜೀವಿಲಾ ಮೋಕ್ಷ ಪಡಪ್ಪುನೇ ಆಲೋಚನೆ ಮಲ್ಪೊಡುಂದಾಂಡಲಾ, ಅವು ಸಾಧ್ಯ ಆವಂದಿ ಪೂರ್ತುಡು ಆಯಾಯೆ ಮಲ್ತಿನ ಪಾಪ-ಪುಣ್ಯ ಪನ್ನಿ ಕರ್ಮಾಲೆ ಪ್ರಕಾರ ನಾಲ್ ಬೇತೆ ಬೇತೆ ಗತಿಟ್ ಪುಟ್ಟುದು ತಿರ್ಗೊಡಾವುಂಡು. ಈ ಸ್ವರ್ಗ, ನರಕ, ತಿರ್ಯಂಚ, ಮನುಷ್ಯ ಪನ್ನಿ ನಾಲ್ ಗತಿಕ್ಪುಲು ಎಂಚ ಉಲ್ಲ, ಲೋಕೊಡು ಐಕ್ಲೆ ಇಪ್ಪುನ ಜಾಗೆ ಒವು, ಈ ನಾಲ್ ಗತಿಕ್ಪುಲು ಆತ್ತಾಂದೆ ಐಕ್ಲೆನ ಸುತ್ತ ಇಪ್ಪುನ ಲೋಕೋ ಎಂಚ ಉಂಡು. ಮೋಕ್ಷ ಪಡೆಯಿನಕ್ ಓಡೆ ಪೋಪೆರ್.... ಇಂಚಮಾತ ಈ ಲೋಕೊಗು ಸಂಬಂಧಪಟ್ಟಿನ್ ಮಸ್ತ್ ವಿಷಯೊನು ಈ 'ತ್ರಿಲೋಕ ಶತಕ' ತೆರಿಪಾವುಂಡು. ಜೈನ ಧರ್ಮೋದ ಪ್ರಕಾರ ಇಪ್ಪುನ ಪದಿನಾಜಿ ಸ್ವರ್ಗೊಲು, ಏಳ್ ನರಕ್ಕೊಲು; ಅಲ್ಲ ಪೋಯಿನ ಜೀವೊಲು ಅನುಭವಿಪ್ಪುನ ಕಷ್ಟ-ಸುಖೊಕ್ಕುಲು... ಉಂದೆನ್ ಪೂರ ನೆಟ್ ಕವಿ ವಿವರ್ತದೆ. ಪ್ರತಿಯೊರಿಲಾ ಮೋಕ್ಷೊಗು ಪೋವೊಡುಂದಾಂಡ ಮನುಷ್ಯ ಲೋಕೊಡ್ಲೇ ಪೋವೊಡು. ಐಕ್ ನಮ ಎಂಚ ಇಪ್ಪೊಡುಂದ್ಲಾ ಮುಲ್ಪ ತೆರಿಪಾಬೆ. ನಿಗೋಧ ಕ್ಷೇತ್ರೊಡು ಸೂಕ್ಷ್ಮಜೀವಿಯಾದ ಪುಟ್ಟಿನ ಜೀವೊ ಎಂಚ ರಡ್ಡ್ ಗೆಗಳೆಡ್ ಪದಿನೆಣ್ಣಿ ಸಾವಿರ ಸರ್ತಿ ಸೈತ್‌ದ್ ಪುಟ್ಟುಂಡು ಪನ್ನಿನ ಸೂಕ್ಷ್ಮೊನ್ನಾ ಪಂತೆ. ಒಟ್ಟುಗು ಇಡೀ ಲೋಕೊ ಎಂಚ ಉಂಡು, ಅಲ್ಲ ಬೇತೆ ಕಡೆಟ್ ಇಪ್ಪುನ ಜೀವೊಲು ಎಂಚ ಉಪ್ಪುವ, ಏರೇರ್ ಓಡೋಡೆ ಪೋಪೆರ್, ದಾಯೆ ಪೋಪೆರ್ ಉಂದೆನ್ ಮಾತಾ ರತ್ನಾಕರೆ ಈ ತ್ರಿಲೋಕ ಶತಕೊಡು ವಿವರ್ತದ್ ಪಂತೆ.

ಆಂಡ ಮಸ್ತ್ ಜನ ವಿದ್ವಾಂಸೆರ್‌ಕ್‌ಲ್ ಈ 'ತ್ರಿಲೋಕ ಶತಕ' ಬೇತೆ ರಡ್ಡ್ ಶತಕೊದಾತ್ ಎಡ್ಲೆ ಇಜ್ಜಿಂದ್ ಪಂತೆರ್. ಅಂಚಾದ್ ಕೆಲವೆರ್, ಉಂದೆನ್ ಆಯೆ ಮಾಮಲ್ಲ ಕವಿ ಆವೊಡ ದುಂಬೇ, ಒಂತೆ ಬೇಗೊನೆ ಬರೆದಿಪ್ಪೊಡುಂದ್ ಪಂತೆರ್. ವಿಷಯೊದ ದೃಷ್ಟಿಡಾವಡ್, ಸಾಹಿತ್ಯೊದ ದೃಷ್ಟಿಡಾವಡ್ ಈ ಶತಕೊ ಬೇತೆ ರಡ್ಡ್ ಶತಕೊದಾತ್

ಮಾನಾದಿಗೆ ಪಡೆದಿಜಿ.

ಆಧ್ಯಾತ್ಮ ಗೀತೆಲು (ಕೀರ್ತನೆಲು) : ರತ್ನಾಕರ ಸುಮಾರ್ ರಡ್ಡ್ ಸಾವಿರೊ ದಾತ್ ಭಜನೆ ದಂಚಿತ್ತಾನೆ ಕೀರ್ತನೆಲೆನ್ ಬರೆತ್ತೆಂದ್ ದೇವಚಂದ್ರೆ ರಾಜಾವಳಿ ಕಥೆಟ್ಪಂತ್. ಅಂಡ ನಮಕ್ ಅವು ಪೂರ ತಿಕ್ಕದಿಜಿ. ಇತೊರ್ತು ತಿಕ್ಕಿನವು ಹೆಚ್ಚಿ ಪಂಡ ಒಂಜಿ ಮುನ್ನೂದು ಆವು. ನೆಕ್ಕ್ 'ಅಣ್ಣನ ಪದೊಕ್ಕುಲು' ಪಂಡ್ ದಾಲಾ ಪುದರುಂಡು. ನೆಕ್ಕ್ ಮಸ್ತ್ ಪದ್ಯೊಲೆನ್ ಆಯೆ ಕಾರ್ಲಗ್ ಪೋದ್ 'ಆಸ್ಥಾನ ಕವಿ' ಆವೊಡ ದುಂಬೇ ಬರೆದಿಪ್ಪೊಡುಂದ್ ಪನ್ಪೆರ್. ದಾಯೆ ಪಂಡ ರತ್ನಾಕರ ಬರೆಯಿನ ಈ ಪದೊಕ್ಲೆನ್, ಬೆದ್ರದ ಮಾತಾ ಇಲ್ಲಿಲ್ಲಡ್ ಪನೊಂದಿತ್ತೆರ್ಂದ್ ತೆರಿದ್ ಬರ್ಪುಂಡು. ಐಡ್ ಬೊಕ್ಕ ಈ ಪೊರ್ಲುದ ಪದಕ್ಕುಲು ಗಟ್ಟದ ಮಿತ್ತಗ್ಲಾ ಪೋದು ಜನಕ್ಕುಲು ಅರ್ತಿಡ್ ಪನೊಂದಿತ್ತೆರ್ಂದ್ಲಾ ನಮಕ್ ಗೊತ್ತಾಪುಂಡು. ದಾಯೆ ಪಂಡ ಮಲ್ಲ ಪಂಡಿತರಾಯಿನ ಹಂಪಾ ನಾಗರಾಜಯ್ಯರ್. ತುಮಕೂರುದಲ್ಲದ ಬಿದಿರೆ ಗ್ರಾಮೊಡು ಇತ್ತಿನ, ಓಲೆಗರಿಟ್ ಬರೆದಿತ್ತಿನ ಈ ರತ್ನಾಕರನ ಪದೊಕ್ಲೆನ್ ಕಟ್ನ್ ನಾಡ್ ಪತ್ತೆದ್, "ರತ್ನಾಕರನ ಪದೊಕ್ಕುಲುಂದ್" ಪ್ರಕಟ ಮಲ್ತೆದರ್.

ಪದಿನಾಜಿನೇ ಶತಮಾನೊ ಹರಿದಾಸೆರಕ್ಷಣ ಕಾಲೊ. ಅಕ್ಲ ಅಪಗ ಮಸ್ತ್ ಕೀರ್ತನೆಲೆನ್ ಬರೆದ್, ಊರೂರುಡು ಪನೊಂದ್ ತಿರ್ಗೊಂದಿತ್ತೆರ್. ಅಂಚಾದ್ ಅವ್ವೇ ಪೂರ್ತುಡು ಇತ್ತಾನ ರತ್ನಾಕರಗ್, ಯಾನ್ಲಾ ಅಂಚೆನೆ ಪದೊಕ್ಲೆನ್ ಬರೆವೊಡುಂದ್ ಆಸೆ ಪುಟ್ಟುದಿತ್ತೆಂಡ್ ಐಟ್ ಆಶ್ಚರ್ಯ ದಾಲಾ ಇಜ್ಜಿ. ಅಂಚ ಜವ್ವನಾದಿಗ್ ಬರ್ಪುನ ಪೂರ್ತುಡೇ, ಪದೊಕ್ಲೆನ್ ಬರೆಪ್ಪುನ ಮಲ್ ಪುಟ್ಟಿನ ಕಾಲೊಡೇ ರತ್ನಾಕರ ಮಸ್ತ್ ಈ ಕೀರ್ತನೆಲೆನ್ ಬರೆಯೆ. ಈ ಪದ್ಯೊಲು ಪೂರ ಒಂಜಿ ರೀತಿಡ್ ಜೈನಧರ್ಮದ ಸೂತ್ರೊಲೆ ಲೆಕ್ಕ ಉಲ್ಲಾಂದ್ ತೆರಿನಕ್ಲ ಪಂತೆರ್. ಬೇತೆ ಬೇತೆ ವಿಷಯೊಲೆನ್ ದೀವೊಂದ್ ಭಕ್ತಿಡ್ ಬರೆಯಿನ ಈ ಎಲ್ಲೆಲ್ಲ ಪದ್ಯೊಲು ರಾಗೊಡು ಪನ್ಪಿಲೆಕ್ಕ ಇತ್ತಾನೆಡ್ಲಾವರ ಜನೊಕ್ಲೆಗ್ ಬೇಗೊಡೇ ಇಷ್ಟ ಆಂಡ್. ಆಧ್ಯಾತ್ಮ ದೇವೆರ್ ಭಕ್ತಿ, ವೈರಾಗ್ಯ, ನೀತಿ, ಇಂಚಿತ್ತಿ ವಿಷಯೊಲೆನ್ ತೆರಿಪಾವುನ ಈ ಪದ್ಯೊಲು ಸಾಹಿತ್ಯ ಬೊಕ್ಕ ಸಂಗೀತ-ರಡ್ ದೃಷ್ಟಿಡ್ಲಾ ಮುಖ್ಯವಾದುಂಡು. ರತ್ನಾಕರ ಐನ್ ಉಡಲ್ ದಿಂಜಿದ್ ಬರೆತ್ತಾನೆಡ್ಲಾವರ ಐಕ್ಕುಲು ನಮನ ಮನಸ್ಸನ್ ಮುಟ್ಟುಂಡು, ತಟ್ಟುಂಡು. ಕೆಲವು ಪದೊಕ್ಲೆಡ್ ಕವಿ 'ದೇವೆರೇ ಎಡ್ಡೆ ಮಲ್ಪುಲೇಂದ್' ಪನ್ಪಿಲೆಕ್ಕ ಇತ್ತೆಂಡ್, ನನ ಕೆಲವು 'ಅಯ್ಯೋ ಹಾಳಾಯೆನೇ' ಪನ್ಪಿಲೆಕ್ಕ ಉಂಡು. ಹರಿದಾಸೆರಕ್ಷಣ ಬರೆಯಿಲೆಕ್ಕನೇ ಎಡ್ಡೆ ಉಪಮೆಲೆನ್ ಮಾತ ಕೊರ್ದು ರತ್ನಾಕರಲಾ ಪೊರ್ಲುಡು ಬರೆತ್ತೆ. ಇಂಚಿನ ಕೀರ್ತನೆಲೆನ್ ಬರೆಬರೆದ್ ಎಡ್ಡೆ ಪಳಗಿನ ರತ್ನಾಕರ, ಐಡ್ ಬೊಕ್ಕ 'ಭರತೇಶ ವೈಭವ' ಬರೆವರ ದೈರ್ಯ ಮಲ್ತೆಂದ್ ಪನೊಲಿ.


ಇಂಚ ಬೇತೆ ಬೇತೆ ಛಂದಸ್ಸದ ಶೈಲಿಲೆನ್ ದೀವೊಂದು ಬೇತೆ ಬೇತೆ ರೀತಿದ ಕಾವ್ಯೊ ಬರೆಯಿನ ರತ್ನಾಕರ ತಾನೊರಿ ಬಿಸಾರ್ ದಿಗದ ಮಲ್ಲ ಕವಿ ಪನ್ಪಿನೆನ್ ತೋಚಾದ್ ಕೊರ್ತೆ. ಆಯಗ್ ಲೋಕೊಡು ಎಡ್ಡೆ ಪುದರ್ ಕೊಣ್ಣಿನವು 'ಭರತೇಶ ವೈಭವ'

ಮಹಾಕಾವ್ಯವಂದಾಂಡಲಾ, ಅವೆನ್ ಬರವುನ ಉಲ್ಲಾಸೊನು, ಧೈರ್ಯೊನು ಕೊರಿನ ಆಧ್ಯಾತ್ಮ
ಗೀತೆಲುಲಾ ಮಸ್ತ ಮುಖ್ಯಾಂದೆ ಪನೊಲಿ. ಅಂಚೆನೆ ರತ್ನಾಕರನ ಅನುಭವೊಲೆನ್ ಪೂರ ನೀತಿ
ಬೋಧನೆದ ಲೆಕ್ಕ ಧಾರೆ ಮೈತ್ ಕೊರಿನ ಶತಕೊಲುಲಾ ಕವಿ ಸಮಾಜೊಗು ಕೊರಿನ ಮಾಮಲ್ಲ
ಉಡುಗಿರೆಂದ್ ಪನೊಲಿ. ಪತ್ನಾಕರ ಕವಿನ ನಿಜವಾಯಿನ ಪೆರ್ಮೆ ಎಂಚಿನಾಂದ್
ತೆರಿಯೊಡುಂದಾಂಡ ನಮ ಆಯೆ ಬರೆಯಿನ ಪೂರ ಪುಸ್ತಕೊಲೆನ್ ಕೈಕ್ ದೆತ್ತೊಂದು
ಓದುದು ತೊವೊಡು.

★ ★ ★

ರತ್ನಾಕರ ವರ್ಣಿ ನಮನ ತುಳುನಾಡ್‌ದ ಮಾಮಲ್ಲ ಕವಿ. ಆಯೆ ಆಯನ
ಬಿರ್ಸಾದಿಗೇನ್ ಕನ್ನಡೊದ ಬರವುಡು ತೋಜಾಯೆಂದಾಂಡಲಾ, ಆಯೆ ತುಳುವಪ್ಪೆನ
ಮಟೆಲ್ಡೆ ಪುಟ್ಟಿನ ಬಾಲೆಂದ್ ಪನ್ನಿನವು ನಮಕ್ ಮಾತ ಕುಸಿತ್ತ ಸಂಗತಿ. ರತ್ನಾಕರ ಎಲ್ಲಿಡೇ
ಎಡ್ಡೆಡ್ಡೆ ವಿಷಯೊಲೆನ್ ತೆರಿಯೊಂಡೆ; ಪ್ರತಿಯೊಂಜಿ ವಿಷಯೊಡ್ಲಾ ಪೊಸ ಪೊಸ ರೀತಿಡ್
ಆಲೋಚನೆ ಮಲ್ತೆ; ಸಾಹಸೊ ಸಾಧನೆ ಮಲ್ತೆದ್ ಮಾತೆರಾ ಆಯನಂಚಿ ತಿರ್ಗ್‌ದ್
ತೊಪುಲೆಕ ಮಲ್ತೆ. ಆಯನೇ ಸಾದಿಡ್ ಆಯೆ ನಡತ್ತ್‌ದ್ 'ಯಾನೊರಿ ಬಿರ್ಸೆಂದ್'
ತೋಜಾಯೆ. ಆ ಬಿರ್ಸಾದಿಗೇಡ್‌ದಾತ್ರ ಪುದರ್ ಪಡೆವೊಂಡೆ, ಜನೊಕ್ಕನೆ ನೆನಪುಡು
ಒರಿಯೊಂಡೆ.

ರತ್ನಾಕರ ಈ ಲೋಕೊನು ಬುಡ್ಡ್ ಪೋದು ನಾಲ್‌ನೂದು ವರ್ಸ ಕರಿಂಡಲಾ
ಜನೊಕ್ಕುಲು ಇತ್ತೆಲಾ ದಿನೋಲ ಆಯನ್ ನಿನೆಪ್ಪುವೆರ್. ಆಯನ ಪುಸ್ತಕೊಲೆನ್ ಓದುದು
ಕುಸಿ ಪಡೆವೆರ್. ಆಯನ ಬಗ್ಗೆ ಆಯನ ಬರವುದ ಬಗ್ಗೆ ಜನ, ಸಂಘಸಂಸ್ಥೆಲು ಚರ್ಚೆ
ಮಲ್ಪುವೆರ್. ನನ ಏತೋ ಜನ ಆಯನ ಪುಸ್ತಕೊಲೆನ್ ಓದುದು, ಐತ್ತ ವಿಷಯೊಲೆನ್
ಮನಸ್‌ಗ್ ದೆತೊಂದು ದೇವೆರ್, ಧರ್ಮೋಡು ಶ್ರದ್ಧೆ ದೀದ್ ಸಾಧನೆ ಮಲ್ತೊಂದುಲ್ಲೆರ್.
ಮಲ್ಲ ಸ್ವಾಮಿಲೆನ್‌ಕ್ಲ ರತ್ನಾಕರನ ಪಾತೆರೊಲೆನ್ ಉದಾರ್ಮೆ ಕೊರ್ಪು ಧರ್ಮೋಪದೇಶ
ಕೊರೊಂದುಲ್ಲೆರ್. ಮಲ್ಲ ಮಲ್ಲ ವಿದ್ವಾಂಸೆರ್‌ಕ್‌ಲ್ ಆಯನ ಮಿತ್ತ್ ಮಲ್ಲ ಲೇಖನ-ಪುಸ್ತಕ
ಬರೆದ್ ಸಮಾಜೊಗು ಕೊರೊಂದುಲ್ಲೆರ್. ಅಲ್ಲ ಆಯನ್ ನೆಂಪು ಮಲ್ಪುನ, ಆಯನ
ಪುಸ್ತಕೊಲೆನ್ ಪೊಸ ಪೊಸ ದೃಷ್ಟಿಕೋನೊಲೆಡ್ ತೊಪುನ ಪ್ರಯತ್ನ ಮಲ್ತೊಂದುಲ್ಲೆರ್. ನಮ್ಮ
ನಾಡ್‌ಡ್ ಒವ್ವೇ ಸಾಹಿತ್ಯೊದ ಕಾರ್ಯಕ್ರಮ ಆಂಡಲಾ ಅಲ್ಪ ಒಂಜತ್ತಾಂಡ ಒಂಜಿ ರೀತಿಡ್
ರತ್ನಾಕರನ ನೆಂಪು ಮಲ್ತೊನ್ನೆರ್. ಒರಿ ಕವಿಕ್ ನೆಡ್ಡ್ ಮಿತ್ತದ ಮಾನಾದಿಗೇ ಬೇತೆ ದಾದ
ಬೋಡು? ದಾಲ ಬೊಡ್ಡಿ ಆತ್ತೆ?



ಒವ್ವಾಂಡಲಾ ಒಂಜಿ ಮರ್ಗಿಲ್ಡ್ ತುಳುಬಾಸೆ ಸಂಸ್ಕೃತಿ, ತುಳು ಸಂಪೊತ್ತುದ ಬುಳೆಚಿಲ್‌ಗಾದ್ ಅಕುಲೆ ಸೇವೆ ಸಂದ್‌ದಿತ್ತಂಡ ಅಂಚಿನ ಪುಣ್ಯಾತ್ಮರೆನ ಬದ್ಕ, ಸಾಧನೆಲೆನ್ ನೆಂಪುಡು ಒರಿತೊನುನವು ನಮ್ಮ ಧರ್ಮೊ. ಈ ನಿಲೆಟ್ ಕರಿದ್ ಪೋಯಿನಕುಲೆನ ಪುದರ್‌ಡ್ ಅಕಾಡೆಮಿ ಬೂಕುಲೆನ್ ಬರೆಪಾದ್ ಮದಪ್ಪೆರಾವಂದಿ ತುಳುವೆರ್ ಪನ್ನಿ ಗ್ರಂತ ಮಾಲೆಡ್ ಬೊಳ್ಳು ಗು ಕನವೊಂದುಂಡು.

ಭರತೇಶವೈಭವ ಪನ್ನಿನ ಮಹಾಕಾವ್ಯೊನು ಬರೆಯಿನ ರತ್ನಾಕರವರ್ಣಿ, ಭರತೇಶ ವೈಭವೊಡು ಆಯೆ ಸುರುಟ್ ಬರೆತಿನ ಪದ್ಯ 'ಅಯ್ಯಯ್ಯ ಎಂಚ ಪೊರ್ಲಾಂಡ್‌ಂದ್ ತುಳುವರು ಮೈಯುಬ್ಬಿ ಕೇಳಬೇಕಣ್ಣಾ' ಪನ್ನಿನ ಸಾಲ್‌ನ್ ಓದ್‌ನಗ ಗೊತ್ತಾಪುಂಡು.

“ಜ್ಞಾನಾನವನಾತ್ಮಗರ್ಪಿಸುತಿಹ ನನ್ನ ಪಾನವ ಮೈಗೀವುತಿಹನು
ಜ್ಞಾನಿಗಳಲ್ಲದೆ ಭರತೇಶನೆದೆಯ ಸಂಧಾನವ ಬಲ್ಲವರಾರು”

ಪಂಡ್‌ಡ್ ಕವಿ ಭರತೇಶನ್ ಯೋಗ - ಭೋಗ ಸಮನ್ವಯವಾದ್ ಮಲ್ತೊಂದಿತ್ತಿ ಬಲಿಷ್ಠ ಅರಸುಂದ್ ವರ್ಣನೆ ಮಲ್ತದೆ. ಈ ಕಾವ್ಯೊಡ್ ತುಳುನಾಡ್‌ದ ಪರಿಸರದ ವಿವರಣೆ ಉಂಡು. ಕಡಲ್‌ದ ವರ್ಣನೆ ಉಂಡು. ಜೋಕುಲೆನ ಗೊಬ್ಬುದ ಬಗ್ಗೆ ಬರೆತೆ. ತುಳುನಾಡ್‌ದ ತಿಂಡಿ ತೆನಸ್‌ದ ಬಗ್ಗೆ ಬರೆತೆ. ತುಳು ಸಂಸ್ಕೃತಿನ ನೆಗತ್ ತೋಜಾದೆ. ತುಳುವೆರ್ ಈ ಕಾವ್ಯೊನು ಓದುದು ಬೆಕ್ಕಸ ಆಪೊಡ್‌ಂದ್ ಪನ್ನೆ.

ರತ್ನಾಕರವರ್ಣಿನ ಬಗೆಟ್ ತುಳುಟ್ ಬತ್ತಿನ ಒಂಜಿ ಸುರುತ ಬೂಕು ಪಂಡ್‌ಡ್ ಪನ್ನಿನ ಅಕಾಡೆಮಿಗೊಂಜಿ ಪುಗರ್ತೆ. 'ನೆನ್ನ ಬರೆದ್ ಕೊರ್ನ್ ಮೂಡಬಿದ್ರೆದ ಮುನಿರಾಜ ರೆಂಜಾಳ ಮೇರ್ ತುಳುಭಾಷೆದ ಮಿತ್ತ್ ಅಭಿಮಾನ ಇತ್ತಿನಾರ್. ತುಳು - ಕನ್ನಡೊದ ಮಲ್ಲ ವಾಗ್ಗಿ ಸಾಹಿತ್ಯದ ಮಲ್ಲ ಮಲ್ಲ ಲೇಸ್‌ಲೆನ್ ಪೊರ್ಲು ಪೊಲಿಗಿಡ್ ಸುಧಾರಿಕೆ ಮನ್ಪುನ ಸಾಮರ್ಥ್ಯವಂತೆ. ಮೂಡಬಿದ್ರೆದ ಜೈನ ಪ್ರಾಥಶಾಲೆಡ್ ಕನ್ನಡ ಗುರುಕುಲಾದ್ ಬೇಲೆ ಬೆಂದೊಂದುಪ್ಪುನ ಮೇರ್ ಕನ್ನಡೊಡು ಕೆಲವು ಬೂಕುಲೆನ್ ಬರೆತೆರ್. ತುಳುಟು ಉಂದು ಆರೆನ ಸುರುತ ಬೂಕು. ಸುರುತ ಬೂಕುಡೇ ಆರ್ ತುಳು ಬಾಸೆದ ಮಿತ್ತ್ ಆರೆಗಿತ್ತಿನ ಹಿಡಿತೊನು ತೋಜಾದ್ ಕೊರ್ತೆರ್. ಆರೆನ ಸೋದನೆದ ಪ್ರವೃತ್ತಿನ್ ತೆರಿಪದೆರ್. ಇತ್ತಿನೆನ್ ಇತ್ತಿಲೆಕ, ಕೇಂಡಿನೆನ್ ಕೇಂಡಿಲೆಕ ಪ್ರಾಮಾಣಿಕತೆ ದೀದ್ ಬರೆತೆರ್.

ಡಾ. ಪಾಲ್ವಾಡಿ ರಾಮಕೃಷ್ಣ ಆಚಾರ್
(ಗುರ್ಕಾರ್ ಪಾತೆರೊದ ತಿರ್ಲ್)